

# WIISUUPULULA, EKAPIITULU YANEEEXEXE MPANTTE III



Kooxukhuru Munna Neville. Apwiya yooreeriheni nave. Nto mooxeleliwa, anammusoma Bibilia. Nto ehaali aya atthu othene voosiis'ula? Vaareera, kinniroromela. Amen. Hiyo ntoko wira...ela yaari ehapari yaamukhaani naarinaahu wira nihimye wira naamukhala vaava voosiis'ula, okhala wira nkaarina e...muttala aka waapakiwe paahi wa liini kaarowaaka orowa. Nto ola okhalaka wira vano woopakiwa wa miyeeri mithanu na mosa sintharelana, ahe, nto, miyo kuupuwela wira yaamureerela hiyo okhalana muteko w'okokhorela voosiis'ula okhala wira onoovira okathi vakhani kihinatthi otthika-tho, ntoko sinsuwel'aka; khino ephovo ela.

<sup>2</sup> Nto kino...hiyo ninrowa okhuma naanaano esumana ela enrwa nirowaka oBeaumont, Texas, weiwo ompaceryaahu wuuwu esumana enrwa ni ninrowa okhalana muthukumano wa mahiku mathanu na mararu wala muloko weiwo ni wiiraana wa ale o—ootaphuwa ni ikereja soohiyana-hiyana. Vekeekhai enikhaliheriwa ni ikereja sa *Nsina na Yesu* oBaumont wu, Texas, weiwo naarinaahu muthukumano muulupale okathi uwo ovinre, emalakarum okumihwiwa elatarato *ela*. Ni awo...miyo koosuwela wira yooheliwa evakawu ya muteko iwe ni, kookupali, ivakawu miloko miili ni thanu na piili...ahiiso kampoyi ni ivakawu miloko miili ni thanu na piili, aarwa vamuthukumanoni oBeaumont. Ti weiwo mukhulupale a epooma aarinaawe weetta woothataana waavinre mphironi, ni othene aya. Naahikhalana okathi wooreera oBeaumont, nto nintthikela-wo esumana ela enrwa. Vano nto naaniroromela ovira oSan Antonio, masi khaninrowa okhalana okathi oniphiyerya yeeyo, vooikhala naatthikaka.

<sup>3</sup> Ni ninrowa okhuma weiwo mpakha oPhoenix, Los Angeles, mpakha oLong Beach. Vano nto ninootthika, Apwiya yatthuna, otthikela Olimani Onkela nsuwa, otthikela oVirginia ni oKarolina Wookuusini. Ninootthikela nto oBloomington, Illinois. Nto okhuma weiwo mpakha Exikola Yuulupale Lane Tech, esumana yookiserya Aprili, Alipa a Nakoso aKristu. Vano nto kinookhuma weiwo kirowe onkela ephoyo wa Columbia Britaanika, kirowaka mpakha Alaska, nto kikhale weiwo mpakha Junho. Vano, nto, hiyo ninroromela oviriha okathi wooreera.

4 Nivekelaka nto wira othokosiwa wa . . . memmo oryaaka-mo mwa okathi mwaha wa mpoosito wa soophwanya, enaasiwa ekereja va, onoomala okathi yoowo. Vano nto nino . . . Kinoowerya orowa ilapo s'okhopela nto yakhala siiso, Junho ene, yoowo onrowa okhala saana orowa wAfrika; maana Junho, Julho, ni Agosto, wa—wAfrika. Vano miyo vekeekhai kinnitthuna mavekelo anyu.

5 Ni hiyo ninwehererya orwa w'Apwiya. Itthu sothene iya ti “wakhalaru otthuna w'Apwiya,” moone. Hiyo khanisuwenle, Awo yaamuwerya . . . Iya khasihiyo miyeettiheryo vekeekhai, hiyo niroothukumanya olattuliwa wothene vamosa khuvekelela, khwaakoha Apwiya, “Ephiro zeeni nirinaahu orowaka?” Ni—ni yaakhala ntoko, nto, miyo nkinihiya wira sothene sikhumeke wa miyo, kinnaahiya akina wira yuupuwele yeeyo, avekelele. Vano nto yaakhala ntoko wira hiyo othene noona weettiheriwa orowa onkela nsuwa, okuusini ni onkela nsuwa okathi ula. Tivo nto hiyo naahikhalana olattuliwa mapuro othene, vano hiyo khupacerya emosa-emosa. Nto nipuro noopacerya naari vamurimani vaka waari oBeaumont ahiiso oSan Antonio. Vano hiyo khuphavela, ni naahikhalana olattuliwa mapuro oomanli. Ni e . . .

6 Hiyo naaihanne emosa oBeaumont. Ni okhalaka wira awo yaarina ikereja miloko mixexe ni piili sikhaliheryaka, ya aPentekosite Oowiiwanana ni sikina, hiyo nuupuwela wira ni autitooriyu mmosa muulupale yaamukhala yooreera waavaha mahiku oophiyaka muloko ohikhanle waavaha mathanu ni mathanu wa khula nipuro. Kinoona wira mwakhaliha nipuro nimosi siiso ti yooreera. Vano, aakhala a—atthu anci-ene ootthuna oBeaumont wothene ni epantt'ile yothene ya patarooya y'oTexas iwe, nto siiso hiyo ninwehererya okathi wooreera oBeaumont.

7 Nto, vano, khanimphavela orowa otthu siri-wo ipa suulupale ni mapuro maalupale. Masi nimphavela orowa ntoko Apwiya anrowaaya oneettiherya wira nirowe, hata wira ti nikhaani wala nuulupale, vakhalaru wira Apwiya anooneettiherya. Vano, khula okathi, Awo yaamuwerya onivaha mwiihanelo wa *oMasetooniya* ni hiyo naamukhuma vapuwani khula okathi mwaha wa etthu Awo yaarowaaya oniihanela wira nivare, nipuro pi nipuro.

8 Ni hiyo vekeekhai nooviriha saana okathi ula wo opatthana mwa Masu a Muluku ni nyuwo atthu ooreera murima. Kinroromela wira munookhala ooromeleya vano ni orwa okereja ni otthara miixuttiho sa Bibilia ni munn'ihu oominyala va, Munna Neville, yoowo miyo kinootumereryaakani vancipale ntoko murumeyi a Apwiya Muluku, ni oneetta moowiixerya ni moowiixerya ni Muluku, ni kinnitteeliwa murima mwaha wa yeeyo.

9 Ni ekereja yaamukhaani, kinnoolopolani mwa Nsina n'Apwiya Yesu wira munnuweke mwa mahala a Muluku,

mukhale oolipa saana ni nweheke oKalvario okathi wothene, mukumihaka mitathaari sothene soowaawa mmurimani mwanyu ni munepa, wira Muluku oorumeelekeni khula okathi. Nyuwo mwakhalakhalaru moonaka wira etthu, wala muupululo wala etthu emosa enoorweelani vootikiniha-vo, etthu yoolopolakani wala etthu, mukhale ookasoopa! Satana t'ocencera ni nsuwela-muteko ntoko sinweryaawe okhala. Munnona? Nwehe ni Masu a Muluku mmukohe pastore anyu. Munnona?

<sup>10</sup> Ni munooophwanya soovaha ni sikina sikelaka voopuruleya mukereja, ni ovara muteko wa soovaha iya. Muhinatthi ohiyererya sivaraka muteko ni itthu, toko...Woono sootumereryakani vamurimani vanyu...Vano, nwanani tthiri t'ocencerya. Munnona? Nto ti yeeyo entepanya ikereja kapattikapatti khula okathi, ti yoovaha y'ekeekhai yoovareliwa muteko voovonyeya. Munnona? Etthu emosa Muluku ontthun'awe wira, vano khunavareliwa muteko voovonyeya, eyo vekeekhai—eyo paahi eno...Kahi woonanarihani paahi, masi enoopwexakasa ekereja yothene. Munnona? Nwehawehe, mwaavyaavye ni Bibilia, vano mwehererye nto moone aakhanle-ene Muluku wala nnari. Mukhale mwehereryaka paahi ni mootolaka, moone yaaryeene yoolikana muliinyani ni yoolikana ni Masu. Vano nyuwo muri oolikana, moone.

<sup>11</sup> Vakhalaru wira Masu aahimya wira yaamukhala va, yaarowa ovara muteko enamuna yeela, mukhale ni yeeyo. Muhikhalakhale mukhumaka, hata wira mutthu oniira exeeni, hata ekhalaka ntoko y'ekeekhai moota xeeni. Yaahoonihereyeke mwa Soolempwa okhuma Maphattuwelo mpakha Wiisuupulula, muhiye meekhaaya. Muheererye, hiyo nri mahiku ookiserya Satana oryaawe oowoka ntoko sinweryaawe okhala.

<sup>12</sup> Mukilevelele vakhala wira kineererya okhala nipuro na mukhulupale; nkihiyo mukhulupale. Masi kinnoona wa nyuwo ntoko Paulo saahimenry'awe ottuli wu muthukumano awe emaara emosa, "Nyuwo mwa ittheneeri sa ekhara aka." Kalapuvelaru muttetthe epantte ekina iwe, kikumana ni nyuwo mwa mukhalelo ole woovuwihwiwa, kintthuna mweemele vale mwaarye ntoko ittheneeri vakharani vaka. Munnona? Ni kintthuna wira mukhale weiwe, kintthuna kikhale weiwe.

<sup>13</sup> Ni kinnuupuwela mwa yoowoona aka okathi woonaly'aka Mukhalelo w'Apwiya, ahiiso atthu Aya Mmuttettheni mme woovuwa iwe, miyo khuwehaweha, khwaahimeerya...Vano awo khukileela wira Awo yaarowa okiphuka miyo toko ni Ehapari yooreera kinlaley'aka. Miyo khwira, "Voolikana siiso Paulo olaleiye-awe Yeeyo!"

<sup>14</sup> Nto atthu ale imilyawu sene yaahikhuwela, "Hiyo nimmumula vaavo!" Munnona? Munnona. Vano, kintthuna wira ekhale siiso. Ni ninoorowa okumana weiwe nihiku nlo.

15 Ni Muluku khonamurumeke Munna Neville ni miyo wira nikhale akhulupale, hata vakhani. Hiyo n'axinn'inyu paahi, moone, awiixuttihi mwa Ehapari yooreera. Tivo nrowe othene nivare muteko vamosa.

16 Nto imaara sikina vakhala—vakhala wira etthu envara muteko ehaana wiihaniwa wala—wala ohimmwa etthu ya yeeyo, opwapweliwa wala etthu ntoko siiso, nto mutthu orina yoovaha eyo khunakhootta, muupuwele paahi... onakhootta, muupuwele, yoovaha khayaari yooloka. Khaari Muluku opacerya wene. Erooho ya Muluku okathi wothene ti yoolikana wira elokihiwe, yoomaala ni yoowiiyeviha, yoothuna. Moone. Yaavenyakaru ni wira, “Miyoo kinimwiira nnakhala vo,” moosuwela moota imaara sikina... Muupuwele paahi, irooho soowiisoona khasihiyo sa Muluku. Munnona? Tivo xeeni okuxaka erantteliho okathi itthu sothene, elapo yothene, eryeene yoosareya Ovuwa wa Muluku, nyuwo moone, owerya w'ekeekhai wa Muluku. Mwaha wa xeeni naarowaahu okuxaka erantteliho? Hiyo khanireere orowa mwa okathi vano; masi muupuwele, Bibilia oohimya wira owo aarowa okela ntoko e... v'elavilavi saana ntoko saaweryaawe okhala, ni owoototha ale Oothanliwa vaakhanle wira vaaniweryaneya. Munnona?

17 Nto, vano, imaara sikina hiyo ninuupuwele wira n'ale Oothanliwa, ni miyo kinroromela wira na yaawo, masi nrowe nikhale oratta-ene ni Bibilia. Vano nto itthu sothene sakhalaru oratta-ene ni Yoolempwa, ni voolikana ni Yoolempwa, siruuhaka Ovuwa wa Muluku ni nlemeliho wa ekereja, ni sikina, vano noosuwela wira ti ya Muluku okhala wira Bibilia onnikhaliherya. Masi eyuupuwelelo ahu paahi khenrowa okhala saana, enoovonya.

18 Vano nto yakhala etthu enithananinhe, hata wira enikhala ntoko y'ekeekhai sayi, yaahikhale yoolikana, yooikhala ya Yoolempwa, mwiihuluxe eyo naanaano va; okhala wira yookhala—yookhala Ele y'ekeekhai enlipelela, moone.

19 Vano, nvekele vano. Ni okathi wothene, ni etthu p'itthu eniir'anyu, mukivekelele. Mukivekelele okhala wira vano ninkela mmapuwani wa okathi wookiserya, mwa muupuwelelo aka. Hiyo vano ninrowa . . .

20 Nto, muupuwele, itthu suulupale sinookhumelela, ti soohisuweliwa varyari v'olumwenku. Yesu aahirwa, khukhala, khukhwa, khuvaheriwa mukuttho, khutthikela Movuwani, nto atthu imilyawu sene khanatoko hata osuwela etthu eyo. Munnona? Kehiyo ya maluwa, yuulupale, yo wunnuwa; ti “Owo aarweene ale Awawe,” moone. Nto e . . . “Ole ori ni maaru, aiwe ele Erooho enleelaaya ikereja.” Kahi w'ale a ota, “Ekereja.” Ti Ekereja enaakhela othathiwa Waya.

21 Miyoo kaanuupuwelaka voovirikana ni yeeyo mpakha nihiku nimoso Owo olavula ni miyo; aahikitthikeliha Mmasuni ni

wuupuwela moota maprofeta othene yaalavul'aya mwaha wa okathi Yohani aarwiiy'awe, khwira, "Mapuro oottukhuwa yaamwaapatthiwa, ni mapuro oowaataleleya yaamukhalihwiwa oottukhuwa." Ni moota owerya wa Muluku waarowaaya ovara muteko! Ni e—e... "Miyaako sothene saamutupha ntoko ipwittipwitthi sikhaani, ni mataakhuru yaamooa ikuphwi." Ahe, yaakhala ntoko wira vekeekhai etthu yaarowa wiiraneya. Munnona? Nto vairaly'aya siiso, exeeni yiiraneieye? Mulopwana mmosa a khalayi aahirwa okhuma mothakoni, alakela ireru sinnunwe-ene ni esapala ya epwittipwitthi ya khalayi aiputaputenle-ene. Khisaakhanle iphwanelo iwe mothakoni. Owo aahikhala weiwo okhuma okathi waary'awe iyaakha mithanu na mixexe, vano owo aarina miloko miraru okathi uwo. Aarwiiye eettaka okhuma mothakoni, anyakelaka, alaleeryaka orukunxa murima, eemenle mmaroveni mpakha mmakuthani, khino, mukerekhere wa Yordani. Nto owo p'ukathi mapuro oottukhuwa yaapatthiwaaya ni mapuro oowaataleleya yaakhalihwiwaaya oottukhuwa. Munnona? Eyo e . . .

<sup>22</sup> Muhaana okhalana maiwelo a erooho. Muupuwele, Muluku khonaireke ni khonkhalakhala airaka, mulaponi mu, okhala mookaryani. Owo t'ovirikanya eyo. Owo khonkhalakhala . . . Mitthaka suulupale khasinrowa okhala "omukhalihwi muulupale *lexe ni lexe ni lexe ni- . . .*" Khoniira siiso. Arumeyi Awe khanvara muteko enamuna yeeyo. Okarya Wawe ni ovuwa ti w'osulu.

<sup>23</sup> Nsana, ahiiso mahiku maili avinre, kikhumaka orowa oKentucky, oKentucky wu ni mpatthani aka ooreera murima, Munna Banks Wood, aahikhala muthiyana mmosa mupiliisa eemenle vale, nto owo khwira, "Mmiravo, vanreerela nivukule mweettelo," khwira, "ole t'owali."

<sup>24</sup> Nto miyo khwira, "Ayo, ti yeeyo." Miyo khwira, "Elapo yaphiyerya—ru nipuro atthu imilyawu sene anvaraaya muteko vano khuphiyerya waakuxa athiyana, waakhalihwi mapiliisa ni waaruma ota iwe, ni anamweettiha itaakisi ni itthu siiso, nlo ti nimoso wa malepa maalupalexu mulaponi mwahu." Owo ori saana ota iwe ntoko e—ntoko namarokolo muhina mw'epirikha y'onuna. Munnona? Eyo paahi—eyo paahi—khanihyo nipuro nawe paahi. Nto miyo khwira, "Eyo yaanikihaaxaka vanci-ene, masi vano miyo kinnipacerya wuupuwela, 'Vano, khivanxankiha, ola ti—ola khuhiyo omwene ahu, hiyo kanihiyo a olumwenku yoola.'" Awo ahaana . . . nyuwo . . .

<sup>25</sup> Xeeni athiyana (athiyana ahu) ohiwaraka sawaya—maihi aya ookhuveya, ni soowiisoottiha, ni rock and roll, ni itthu sothene iya? Vano, atthu anoorowa ikereja soolimaleleya ni itthu, anuupuwela, "Eyo eri saana." Mwaha wa xeeni? Eyo . . . awo—awo atthu a wAmerika; awo atthu a wAmerika, arina erooho ya wAmerika. Hiyo kanihiyo atthu a wAmerika, hiyo na aKristu.

Hiyo ninkhala . . . erooho ahu ti ya Omwene mukina. Vaakhanle wira erooho ahu yaari ya omwene yoola weeso naamukokhorela n'itthu seiya, vano hiyo naamukokhorela masipo ala othene eethiru ni omukokhorela rock and roll ula othene. "Vari murima anyu, vaavo ti vari mihakhu sanyu." Nto mihakhu sahu siri osulu. Vano tivo hiyo ninrowa Momweneni.

<sup>26</sup> Ela kehiyo etthoko ahu, hiyo nineetta ekwaha paahi nno niphavelaka waakumiha anammuttettheni akina mw'epiphini. Ni ninoorowa epooma emosa khino okhalana ekampaanya emosa mpooma mothene, ovara muteko saana mwa esumana emosa wala mahiku muloko, mwaha wa munepa mmosa woorikarika iwe; mmosa, mmosa paahi okilaanthe vale.

<sup>27</sup> Nyuwo pooti wira, "Muthukumano waari mureerelo muulupale, atthu ikonto thanu yaahirwa waltaari"; pooti ohikhala hata mmosa w'ale ooponwe, hata mmosa a awo. Munnona? Ni khino yaamukhala . . . Nyuwo khino mwaamuupuwela wira weiwo, "Atthu anli paahi jaarwiiye-aya waltaari"; masi mmosa a awo pooti okhala nniya. Hiyo paahi ninrihela ntthavi mmuratthini. Muluku t'onthanla ihopa, Owo onnisuwela ele ekhanle ehopa ni ele ehikhanle.

<sup>28</sup> Tivo, moone, hiyo ninoolaleya paahi. Ni muupuwele wira nyuwo muniira etthu emosaru mutapernakulu mu. Masi kweekwe muupuwele ela, "Ipwittipwitthi Saka sinnisuwela Nsu Naka." Nto Nsu na Muluku ti Masu Awe.

<sup>29</sup> Miyo kaamuupuwela nihiku nlo moota atthu ala anihimy'aya wira khenakhaleke . . . Muromolelo mmosa wa ikereja wiiraka, "Ovonihwa wa Muluku khuhiyo woolikana. Khonakhaleke hata mutthu aavahiwe yoovaha ya ovonihwa wa Muluku woohikhala Paulo Oowaarya wala arummwa, ale muloko n'aali empa y'osulu. Awo ti yaavahiwe yoovaha ya ovonihwa wa Muluku, nto eyo yaari yothene. Eyo yaahimaliha mwaha."

<sup>30</sup> Masi, moone, mwa ekwaaturu ila yooreeraxa Munna Willie, va, onitthokihenryaawe vooreeraxa, nliinya nle naamukhaani ninnikhalaka mwa ikereja ephiro yothene. Kaatthuna kisuwele etthu muromolelo ene yoowo onihimyaaya mwaha wa wahala a ekereja, wa Irinewu, wa Martin Oowaarya? Ni anamakhwela waamini awo othene moovirani w'okathi, mwa miyaakha imiya sene nuumala okhwa wa arummwa, yaalavunle ilavulelo ni waavonihwa aretta ni waahihimuxa alipa-ookhwa ni yaapanke miiriirya, ekereja yothene. Kaatthuna kisuwele ankhwi awo, vakhala wira yaari ya arummwa paahi?

<sup>31</sup> Munnoona moota ekhanlyaaya yoorika? Awo kharina maiwelo a muroohoni, ti yeeyo tu. Moone, "Ohoona! Ookhwa mutampini ni soottheka!" *Etampi* enihimya "ohaamini." Etthu p'itthu mwa ohaaminii enkhala etampi. Mutthu akhalana e—etiitulu so yoorakama (ya D.D., L. piili, Ph.D., L.L.D.) ni wira "khiivo etthu iyo ntoko ovonihwa wa Muluku wala

opatiiso wa Erooho Yoowaarya,” mutthu uwo ohookhwa mutampini. Owo pooti owerya otaphulela inamuna sothene sa miiriirya mBibiliani, masi makhalelo awe ene (onamoona awe) onnooniherya wira owo ohookhwa. Owo ohookhwa mutampini ni sootheka okhala wira natampii.

<sup>32</sup> Etampi ohaamini. Mutthu ti mutthu aahaana... Etampi, khuhiyo oraruwa ni waavura asikaro ni wiina ni—ni wira siiso. Eyo kehiyo etampi, iyo mikhalelo sa ohaamini. Masi mu—mulipa—oowaamini... Hata wira mutthu onoohiwurya, ohinvura sikaro, ohiira itthu iya, khonatoko ohimya nuulumo noonanara, onneetela Sooruma Muluko sothene, owo nlelo pooti okhala natampi ooriipa, moone, ootakhala tu sikhanyaaawe okhalaka. Owo aakhoottakaruru khula etthu ya owerya wa Muluku, owo natampii! Nuulumo *etampi* “ohaaminii.” Vano, nyuwo mphavele paahi, moone yaari ekeekhai wala nnari. Mulipa—oohaamini Masu a Muluku, owo natampii ni khokhanle oovolowaka Momweneni wa Wirimu.

<sup>33</sup> Vano, oh, kaahuupuwela nto voosiis’ula, wihelela mmansaka n’utthuna w’Apwiya, ni yooruma ya Erooho Yoowaarya, wira kirwe-tho mutapernakulu ni khino kookhaliheni nyuwo othene iwoora piili wala tthaaru. Masi kinthuna kimalihe eliivuru ya kapiitulu 4 ya Wiisuupulula kihinatthi orowa. Nto vano kinroromela wira khenkhala yookhulumula wa nyuwo, kinroromela wira enookhala—enookhala ovuwa wa nyuwo. Kinroromela wira eyo etthu enrowa wookhalihani saana ni wookhaliheryani mahiku anoorwa.

<sup>34</sup> Nto vano khino... Miyo koomuleela Billy wira orwe va voosiis’ula wira okawe ittikitti sa mavekelo yaakhanle—ene aletto eriyari ahu, okhala wira hiyo ninookhuma, ni... vano, nto miyo nkisuwenle okathi onrow’ahu otthika. Muluku paahi t’onsuwela eyo. Ni miyo kaatthuna... koono wira khino muthukumano wookiserya vakhala wira... nto okathi owo okiihanne—awe nto woophiyaka—woophiyaka ewoora yaneethanu na xexe khwira, “Paapa, aakhala atthu kamosa—kamosa iwe wira evekeleliwe. Miyo kihaakoha, masi” ahimmye wira, “awo atthu a—awo atthu anrwa okereja okathi wothene.”

<sup>35</sup> Miyo khwira, “Vano muhikawe hata ittikitti sa mavekelo, moone.” Miyo khwira, “Okhala wira awo atthu... Nakhalanaru ovekeleliwa w’aretta voosiis’ula, ninoowiihana atthu awo naavekelele.” Masi miyo khwira, “Vakhala—yakhalaru wira atthu anrwaaka otapernakulu hiyo ninaasuwel’ahu... Nnari, kimmuthuna muletto.”

<sup>36</sup> Vano owo khwira nto, owo khukhuma vale minuutu vakhani sivinre okathi okumann’awe ni miyo keemenleene vate vale, khwira, “Ahe, kookawa ittikitti sa mavekelo kamosa—kamosa.” Khwira, “Vakhani paahi mpaani mme, kookawa

ittikitti sa mavekelo.” Khwira, “Nyuwo pooti wira etthu p’itthu entthun’anyu.”

37 Miyo khwira, “Ahe, nnimoona moota mutthaka onrowaaya, noone vatthu vary’ahu, vano nto ninoorowa. Miyo. . .”

38 Owo khwira, “Ahe, atthu anci-ene yaanithhuna ittikitti sa mavekelo, vekeekhai, masi” khwira “awo yaari atthu ari mme mukereja.” Munnona?

39 Ahe, hiyo noosuwela wira Muluku Mulukuu. Ni, wulu, itthu Owo oniir’awe! Vano, te—telefooni onniruma okathi wothene, a atthu a itthu soohiyana-hiyana, a itthu sikhaani imaara sikina, ni moota Muluku onaakhulaawe mavekelo!

40 Kaatthuna kisuwele sinto mwaamuthiyana’owo wala aiy’awe ari vaava anikhuma oNew Albany, yaamuruuhale ttutthu ule oottiyeya iphumu ohiyu ule, aarina penewumoniiya, owannyaka voophiyaka ewoora ya namuloko ni piili, emosa ya makaaripi? Vo, vaareera. Ori sayi ttutthu? [Munna mmosa oniira, “Mukumi.”—Mol.] Mukumi, vaareera, vaareera.

41 Mukihiye kiwooniheni paahi, moone, wira eyo etthu emosa mwahaarow’anyu osuwela, ehinrowa ohoolo okathi Erooho Yoowaarya enlavul’aya. Fred Sothmann, munn’ihu oophwanelaxa, Fred; Koomwiiwa wira “Amen” okathi vakhani ovinre, masi nkaawerya omoona. Ori vayi? Owo ori vaava? Va, vaava va, Munna Fred Sothmann. Ni wooniherya moota ery’aya yookhweya. . .Owo aahikhalana apatthani kamosa-kamosa jaarwa, yoowo aari Munna Welch Evans, wona waka, miyo nkisuwenle. Awo yaahikhalana eterela iwe; awo yaaroowala mikhora nto Fred khimurimeela ihulelo, vano aahikhala aphavelaka mapuro othene ni khaawerya ophwanya hata nipuro. Nto Munna Welch aamoowa mphironi. Vano khuphiya nihiku owo aarowaawe ophiya ni itthu, awo khiyaawerya ophwanya ehulelo hata nipuro, vano owo khulikarela owaani, khwira, “Munna Branham, ihulelo siri vayi? Naarowa ophwanya vayi?”

42 Vano, eyo pooti wootikiniani akina a nyuwo, ya mulopwana okoha etthu ntoko yeeyo. Masi nwehererye minuutu mmosa paahi, munniwuupuwela aana a Yese ewaavyaka apuuru? “Vano kaarina etthu yoovaha mmatatani mwaka, kaamukuxa koonihe. . .kaamukoha, kaamunvaha profeta, nto khino owo aannihimeerya vatthu apuuru ale yaary’aya.” Munnuupuwela yeeyo?

43 Nto okathi eettaawe mphironi yaahikumana ni profeta. Owo khwira, “Munaaphavela apuuru ale.” Khwira, “Vo, mutthikele owaani,” khwira, “awo aathikasa.” Ti siiso?

44 Miyo khuvekela. Fred khurowa khuttotta ihulelo. Ti yeeyo. Munnona?

45 Munna Ed Daulton, muri vayi? Ori vayi Ed Daulton? Koosuwela wira owo ori vaava nipuro nlo, koomoona



okathi vakhani ovinre. Oh, ottuli mu...ole ori vale. Owo ookiwa muhina mwa elaleyelo ya mpaani ahiiso esisteema ya elaleyelo vaatthuni. Ohiyu uwo telefooni aahiruma nto Munna Ed aari mmukattiyamihoni woosankiha. Miyo kaatthuna omukhaliherya. “Nnari,” khwira, “Kinthuna paahi wira munvekele Muluku.” Miyo khwaavekela Apwiya wira emukhaliherye. Nto mmeeloni mwaya amwaar’awe khulikari, aahirwa mutthu omoopola. Vaareera. Ti yeeyo, Munna Ed?

<sup>46</sup> Moone, Owo Mulukuu paahi. Ti yeeyo tu, Owo Mulukuu paahi. Moone, Owo paahi. . . Eyo okathi wothene voohihyererya eri okhuma nipuro nimosa mpakha nikina, nipuro nimosa mpakha nikina. Hata wira mulattu xeeni okhanle, Owo Mulukuu. Hiyo khaninrowa iwo, wiikuxererya mwaha wa itthu iyo, khaninkhanle wiiraka. Muhihye ntata noolopwana wala noothiyana osuwela etthu ntata noolopwana nniiraaya. Hiyo ninlavula eyo yoohiru masi khaninkhuwelela eyo nipuro nlo. Okhala wira iwo wiisoona, ntoko, “Muluku aawerya omwiirela paahi mutthu mmosa.” Owo aammwiirela khula mutthu oni—onimwaamini Yoowo. Eyo ekupalelo, waamini! Sothene—sothene muntthun’anyu wira, sothene sikhanel miyuupuwelo sanyu, muirohe wa Muluku. Owo—Owo—Owo—Owo onnivaha sothene. Kahi siiso? Tivo Owo onnaakhula mavekelo. Owo ti . . . Muluku ti Tithi onaakhula mavekelo.

<sup>47</sup> Vano, nto tivo mu...Kaahuupuwela, kimalihaka mwa mithukumano iya sookiserya ni sikina, ntoko saaryaahu... ntoko siniiraahu, hiyo naamu—khino naamukhalana olamula sa mmurimani wookiseryani wa muthukumano, Apwiya yatthuna, nto khino okathi ene yoowo wa muthukumano. Hiyo khanisuwenle etthu Awo anrow’aya wira. Miyo okisivela enamuna yeeyo. Muhitthokihe etthu, mmuhiye Owo aire paahi ntoko Owo sintthun’awe wira.

<sup>48</sup> Vano, mukhunle kapiitulu 4 ya Eliivuru ya Wiisuupulula, ni mweemexe eroroco.

<sup>49</sup> [Munna mmosa onlavula ni Munna Branham—Mol.] Ayo. Ayo, munna. [Munn’owo onootthikela olavulaka. Nipuro vahiiitthu mufiitani.] Vekeekhai, miyo kinnaamini iyo. Voomalela, kookupali yeeyo.

<sup>50</sup> Va, Munna Welch Evans, miyo kinoona wira ti yoowo okilaanthe ottuli iwe. Mukihye. . . Nikhunlaka Wiisuupulula 4.

<sup>51</sup> Nno woohikhala khalayi, nyuwo othene muhiiwa ni moosoma mpapheloni mwa ihapari mwaha wa anamatuphela ala oLouisville aniiyasa ikaaro, anroiha oKentucky nipuro nlo, vowaakuvaxa. Ni oKentucky nyuwo khamurina okhalanaka epaphelo ya omwaneene, awo animoopakelani emosa oKentucky. Tivo nyuwo paahi. . . etthu emosa paahi murin’anyu wira oroiha weiwe khutumiha. Vano awo anookuxa ikaaro iya n’uroiha n’utthimakiherya iwe ni opintari-tho, n’ukumiha

ikaaro iyo n'utumiha. Sothene murin'anyu okhalana nummaru nanyu na mutooro nto awo—awo animoopakelani epaphelo. Tivo awo anookuxa ekaaro muramphani khuroiha voowaakuva khukeliha mufisina nipuro nlo, khurukunxa etthu yothene voomalela, moone, ni—ni khupintari-tho ni itthu sothene, okumiha n'utumiha. Yookhala ewokelo ya yeeyo, ni vanci-enexa Estadu Unidu wothene, ni yuulupale—epantte yuulupale ya yeeyo eri oKentucky. Miyo koomusoma artiiku mmosa mpapheloni mwa ihapari nno woohikhala khalayi mwaha wa yeeyo.

<sup>52</sup> Ahe, Munna Evans oophwanelaxa, muulupale, ooreera murima ni amusi awe, aneettiha ekaaro okhuma Macon, oGeorgia, osulu nno khula Ettiminku wira yiiwe Ehapari yooreera. Oh, apatthani xeeni ooromeleya, ni eekeekhai! Vano onoorowa oKafeteriyya Miller weiwo . . .

<sup>53</sup> Kahi kinimwaalaleya aMiller, masi vekeekhai kinoona wira awo arina yoolya yoomalela oreera oKentucky; oLouisville, Kentucky, khula enamuna. Mpakha va . . . nkinihimya mmawaani w'omeekha kitonko aka olya-wo, vano, kinihimya wa (moosuwela) ota. Ni miyo kinnoolya weiwo, nave. Kinoowerya waalyiha amusi aka weiwo vookhweya ehisapo ovikana sikhlanlyaaka waalyihaka owaani. Ti yeeyo.

<sup>54</sup> Tivo nto miyo kaarookela mme, ni nto Munna Evans aahikela khuphwanya etthu wira olye ni opweha ekaaro awe vate vale. Owo akhumaka (ni ikuwo sawe sothene) ni amusi ni othene aya, owo khaarina ekaaro wala hat'etthu. Sothene saahirimeela. Ahe, mutthu oohaawa, Munna Evans mutthu ntoko hiyo othene, owo orina nakoso mwaamukhaani iwe, owo onvara muteko ni ikaaro, onoothuma ikaaro sohononeya n'ulokiha. Owo mutthu oohaawa, ni onrumeela musurukhu awe arwaaka nno okhala wira onnaamini enamuna yeela ya Ehapari yooreera. Miyo kininkekela Muluku aaveleliherye namitthaka weiwe nipuro nlo, wira aakhaliherye epant'ile.

<sup>55</sup> Vano, Munna Evans khurwa, tivo owo khaasuwele etthu yo wira. Owo aahaaleela mapiliisa n'awo khiyaawenrye ophwanya. Vano owo khurwa owaani, owo ni Munna Fred n'akina, hiyo naahikilaathi mpaani khulavula yeeyo. Miyo khwira, "Vano . . ." Ti siiso hiyo nniir'ahu, hiyo ninkilaathi mpaani, khusuwela etthu enikhumelela, nto nuumala ninrowa wa Muluku. Tivo okathi waavekenlyaahu Apwiya, "Wira emuhokoloxe mutthu aarina ekaaro eyo, omuhokoloxa, nipuro ti nipuro aaryaaawe."

<sup>56</sup> Voolimaleleya awo anroiha oBowling Green wala nipuro nlo, anookumiha nno nipuro noowoopiha, moone, wira ewerye . . . mpakha opintari-tho n'ulokiha. Ela yaari ekaaro yooreera, kookupali wira yaari ekamiyawu yaamukhaani. Yaari yeeyo, Munna Evans? Yaari e—ekamiyawu yaamukhaani.

<sup>57</sup> Vano, nto siiso etthu yaakhumelenle, hiyo naarookokhora khuvekela. Nto a—Apwiya khunivaha onamoono, sothene saari saana, sothene sooreera. Vano nto owerya w'Apwiya khukela ni hiyo. Munna Evans khukhuma khupacerya weetta, khweetiheriwa orowa ephiro eyo.

<sup>58</sup> Owo khuhokolowela wenco oJeffersonville. Ekaaro yaaiyiwe oLousville; va yaaphwanyaneya ekaaro awe yeemexiwe-ene vale ni kasoliina oophiyerya wira akuxe...oh, ookhuma-mo, wira akuxe voophiyerya waattamela oBowling Green n'uhokolowa. Awo yaarookhuma mukaaroni, khweemexa ekaaro, khuhiya ehulelo memmo, khurwasa yeetaka khuhiya eyo vaavale, wenco nno oJeffersonville nipuro aakhanlyawe ophwanyaka-vo; kahi Louisville, wenco nno oJeff., khuhokoloxa mpakha wenco.

<sup>59</sup> Moosuwela, Apwiya anniwerya owiiriha axipalame owiwelela Yaawo, Awo anniwerya owiiriha atthu owiwelela Yaawo, Awo anniwerya omwiiriha nwanani Aya owiwelela Yaawo. Awo...Ayo, mulopwana, Awo ti Muluku. Va yaaphwanyaneya ekaaro awe ehihaleelaka hat'etthu, ni etanki nuusu ya kasoliina paahi weiwo owo aahalenlyawe ophiya oBowling Green, ni Erooho Yoowaarya siiso yiirale, "Murukunuwe! Mutthikele iwe muroihe ekaaro eyo oJeffersonville. Muhiye vaava mphironi, mweemexe vaava *va*, (okhala wira Miyo kinrowa omuruma owo ephiro ene *yeela* ni ephiro *yeela* wira ophwanye)." Eyo ekeekhai, Munna Welch? Ti yeeyo. Munnona.

<sup>60</sup> Owo Mulukuu! Owo onnaakhula mavekelo, Munna Roy. Owo paahi...Eyo ti, Munna Slaughter, eyo etthu emosaru tu, Owo oonvonihla mwalapwa anyu mwaamukhaani. Ni miyo koosuwela wira Owo onnivorihla, Owo onnaakhula mavekelo, Owo nlelo onnipaka miiriirya, Owo nlelo Mulukuu, Owo okathi wothene aari Muluku, Owo okathi wothene onookhala Muluku!

Owo—Owo ti Muluku vataratoni, (Exeeni iyo,  
munna oniip'awe va mukereja?)  
Muluku vanaapeiwa, Muluku omatta,  
Muluku mukaaroni, Owo Mulukuu mapuro  
othene,  
Owo Mulukuu othene—mwa sothene, Muluku.

<sup>61</sup> Oh, moota ereeraly'aya! Naamurowa olaleya nuumala okathi vakhani ni ohiphiyerya nisomi nenla.

Vaareera, nrowe nuuramihe miru sahu okathi vakhani wira nivekele.

<sup>62</sup> Tithi a Wirimu Oomoriwa ikharari, hiyo ninnisiveliwa saana ni Masu Anyu Oowaarya mpakha mirima sahu sinnivahaaya mwa hiyo, naasuwelaka wira Erooho Anyu ennikhuruwa eriyari ahu nto vaavo ennilavula ni hiyo, nto mirima sahu sinitaphuwa

ni okuxa Yeeyo. Ni vekeekhai ninnoona oreera mwaha wa Yeeyo, Pwiya.

<sup>63</sup> Ni osuwela wira okathi ula w'epiphi vaavo vahireere evitikavitika. . . Ntoko profeta sihimaly'awe, "Mahiku ookiserya yaamoorwa etala," etthu siiso, "kahi ya yoolya ni ya maasi, masi yo wiwa Masu a Muluku eekeekhai; nto atthu yaamweetta ikwaha okhuma onkhuma nsuwa mpakha onkela nsuwa, onkela epheyo ni okuusini, ephavelaka ophwanya Masu a Muluku eekeekhai." Masu! Exeeni Masu? Yesu ti Masu, "Nsu naahiipaka erutthu khukhala ni hiyo." Wira noone wooniheriwa wa Masu eekeekhai a Muluku owooniheriwa ntoko Soolempwa ni omaliheriwa, ya, moota atthu yaarowaaya weetta ikwaha ni ophavela ni yaarowaaya ovonya ophwanya Yaawo. O Muluku, hiyo ninnixukhuru vanci-ene, oxukhuru saana omphwanya Owo miyaakha sivinre, ooreeraxa a murima ahu, ni woona wira khanitepanyeiye hata vakhani.

<sup>64</sup> O Muluku, Nyuwo muhimmye wira, "Ale ammusuwela Muluku aya animwiilipiha nihiku nle." Nto hiyo nri va mahiku ookiserya, noonaka itthu sothene Yesu ohimaly'awe wira saamwiiraneya, sooniheriwaka vaava eriyari ahu. Ithoonyeryo imosaru, mitikiniho, miiriirya opakiwa, airaka enamuna emosaru Owo iiralyaawe. Ntoko Owo sihimaly'awe, "Ntoko saary'aya mahiku a oSotoma, siiso onookhala orwa wa Mwaana a mutthu."

<sup>65</sup> Nto, Pwiya, Nyuwo munitthuniherye, ni Erooho Yoowaarya, niphiiyerye Masu awo ni nikuxe itthu iyo s'eekehai ni niphitaanye oKalvario, ni Masu, ni noone wira mwa Yoowo hiyo nookhalana omalela. Nto mihakhu ni iparakhani ni ovuwa ni sothene sinrowa wa Yoowo okhanle oophwanela, aarwiye khukuxa Eliivuru mmatatani noolopwana na Ole aakilaanthe Veehicieni, nto khukilaathi Vaavo Yoowo mwaneene, maana Owo oiviwe okhuma opattuxiwaka-ru olumwenku.

<sup>66</sup> Hiyo nimmuhimya Yoowo voosiis'ula, Tithi. Hiyo ninvekela wira Nyuwo mureerihe mirima sahu. Mutthuniherye Erooho Awe yeetteette eriyari ahu ni enireerihe, ni esarihe musuwelelo ahu, ni evonihe iretta eriyari ahu, ni enivahe mahala ooxintta.

<sup>67</sup> Ni, Muluku, okathi onkhumaaka orowa mmapuwani okumana ni nwanani, kisuwele wira koolipihiwa khula ewoora ni mavekelo. Oh, moota onlipanaaka olipihiwa weiwo, nwanani aattamelaka, masi koosuwela wira olipihiwa onnivarelela okhala wira aximaama ni axipaapa, ni amiravo n'aximwali, aKristu, ooyariwa vasya ni musuwelelo, Atthu anrowa Wirimu arookokhora evekelaka, "O Muluku, nvahe ovuluwa!" Ni Tithi, hiyo ninvekela wira Nyuwo munitthuniherye okhuma nikelaka muliinyani mwa nwanani wu ni nimwaakhe khula munepa wooreeraxa onliplelela. Mwiire, Pwiya, ni mwaakumihe

mweepiphini mwaakelihe moWaaryani. Maana hiyo ninvekela mwa Nsina na Yesu. Amen.

<sup>68</sup> Vano, kapiitulu 4 ya Eliivuru ya Wiisuupulula. Noomaliha ekapiitulu 3, nto nrowe nikhale oottittimiha kinimwiilipiha wira kihooisiheni vanci-ene. Masi mukapiituluni 3 mu, Ekereja yaahiwela ntoko ethoonyeryo, okathi Yohani aavenyihwaawe. Ekereja yaahiwela, nto okhuma okathi yoowo envara muteko ni Isarayeli, mpakha Orwa-tho. Khamunoono moota ery'aya? Atthu olelo, moota siniiraaya, "Etthu yuulupale enoorowa ottikinya olumwenku wothene ni sothene." Eyo ti yoohilempwa! Nnari, mulopwana. Etthu enttharelana voolikana orowa wa Ekereja. Musome m'okathini wa ekereja, munimoona etthu . . .

<sup>69</sup> Vano, itthu iya sikina sintthuneya wira sikhumelele, okathi wa Niira N'othelana Ekereja erye-ene Movuwani. Muluku onootthika ni mitikiniho suulupale wira apake, miiriya sa elapo yothene ni itthu, ni a Yuta, muhirowe Okereja nnakhala.

<sup>70</sup> Kapiitulu 3 emmaliha okathi wa Ekereja. Ti yeeyo. Ni okathi wa Ekereja ommalela ni atthu vakhaani saana nimphwanyaaahu. . . Nwiryane va paahi. Miyo—miyo koosomatho ela voosiis'ula, eyo yaahala okikhaliha kapatti-kapatti, nipuro ni mweettelo wa Kristu woomalelani w'okathi wa Ekereja, omphwanyaneya okhuma versiikulu 20 mpakha versiikulu 22 ya Wiisuupulula 3. Mmuupuwele Kristu, woomalelani, vatthu Owo oryaawe! Owo ori vayi woomalelani wa okathi wa Ekereja? Ota wa ekereja Awe, ookakheliwa ota ni miromolelo ni iyaaminelo. Mweettelo Awe t'uvi? Ophavelaka okela-tho. Owo mukhalelo wookhupanyerya!

<sup>71</sup> Vano hiyo ninnoona va, "nuumala itthu iya," owo aahiiwa Nsu naalavula ni yoowo wira. . . Oh, yaari exeeni iyo? Erooho yaahiiya elapo ya vathi. "Nuumala itthu iya," empacerya kapiitulu 1, ahiiso—ahiiso versiikulu 1:

*Nuumala yeela kaahiweha, nto, kaahoona mukhoro  
ohuleiye wirimu. . .*

<sup>72</sup> Wiisuupulula 4:1, nuumala Ekereja orowa, vano mu—Mukhoro waahihuleya. Ni hiyo noovira mwa sothene iyo khuphwanya wira owo aari Kristu, aari Mukhoro. Nto Nsu nimosaru nenlo neetta varyari va mithuko mithanu na miili sa eweero naari-tho Nsu nimosaru owo aaiwalyaawe Wirimu, niiraka, "Nwele va." Yohani khuwela. Eyo yaathoonyerya Ekereja ekelaka Mokuxiwani.

<sup>73</sup> Yohani aawenle Muroohoni, khuroihiwa Wirimu nto khoona khalayi ene itthu sothene Muluku aalaiheryaawe ni khwaahimeerya awiixutti, "Erivo yawinyu exeeni owo akhala vale mpakha Miyo vanrwaaka?" Owo aahoona orwa wa Apwiya ni etthu yaarowa okhumelela. Owo aahoona elapo ya vathi etthu yaarowa okhumelela elapo ya vathi mpakha Okuxiwa

wa Ekereja, ni aahikuxiwa khoonihiwa sothene mpakha ovira eMileeniyu. Oh, eyo kahi yoothamaleya?

<sup>74</sup> Vano, hiyo naamuhin'ye Ettiminku evinre kapiitulu 4 ni versiikulu 4.

*Nto mukerekhere mwa ehice mwaahikhala ihice miloko miili ni xexe: ni vasulu va ihice kaahiwoona mahumu miloko miili ni maxexe yaakilaanthe, ewanre ikuwo sootteela; ni yaahikhhalana mmuru mwaya ikhilempa sa eweero.*

<sup>75</sup> Vano, hiyo noophwanya wira ala yaari mahumu. *Humu* khoniheleliwa Nlaikha wala hata Ookhala. Owo mutthu oovuluxiwa, mahumu! Okhala wira awo. . . Ihice, ikhilempa, ni omwene khasinahimeriweke, Malaikha. Masi ikhilempa ni ihice, ni siiso, anaasiwa athu. Nto mahumu ala yaawanre ikhilempa ni ikuwo ni yaakilaanthe vasulu va ihice. Ni nihaaphwanya mapuro makina a Soolempwa wira yaari arummwa muloko n'aili ni yaari axitiithi muloko n'aili. *Miloko miili ni axexe* a yaawo, enihimya "miloko miili ni axexe": arummwa muloko n'aili, axitiithi muloko n'aili.

<sup>76</sup> Ni, noophwanya wira, hata epooma enkhuruwa wa Muluku okhuma Wirimu. . . Elapo vammalaaya ophuliwa nto yothene khukhala kapatti-kapatti ni hat'etthu kuhihala mulaponi woohikhala ittuurwa sa vulkawu (eyo ti yothene enrowa ohala), khenrowa-tho okhala epahari. Epahari enimuuma.

<sup>77</sup> Ntoko saalavul'aka nsana ohiyu ni mutthu mmosa, ahiiso nsana, nipuro nlo, wira elapo yaahitoko okhala *sa*, yoowookowa, yoorukurerya nsuwa, oviha woolikana okhuma osulu mpakha vathi. Wu muxeeluni wa Ankelesi, vanniweryaneya otthukula soophutula iwe imeeturu miloko mithanu ni miili khuphwanya miri sa makutthi. Eroorwa naanaanoru, khuriiriha khuuma iyo ntoko oriiriha vano. Ntoko *omalihha maasi*, ni siiso, ni *ixileera* sanyu ni ikonxelatoore simpwehiwa ntuva ni itthu mwa miyaakha ni miyaakha ni miyaakha sinrwa. Munnona? Eyo t'inamuna emosaru yaaryaaya okathi ule. Naanaanoru khurwa ohonona wa mutaseke khusamiha elapo yothene. Nto vaireiyeya, ikuru s'atomu khukumihha munrekonni mwaya, khuriirya khuuma khukhala vaavale. Munnona? Muthipe munoowerya ophwanya, osulu ipantte sa aartiku, miri sa makutthi ni siiso. Yooniherya wira yaahitoko okhaliwa vooreera, yooweemela saana. Masi vano eroottikinyiwa khurukunuwa.

<sup>78</sup> Vano, vatthu kinuupuwel'aka wira Muluku vaaphwaannyaawe maasi awo, okathi Maphattuwelo ampaceryaaya, Maphattuwelo 1, "Elapo yaari ehimalelihiwe, ni khiyaakhanle etthu, ni maasi yaari vasulu v'epiphi. Erooho ya Muluku yaaneetteetta vasulu va maasi nto khwira, 'Okhale okokola.'" Muluku khuvalaanya nto ethhaya ni maasi, yeeyo epanke elapo. Masi elapo yothene yaari yookhuneeliwa.

Vano, etthu Owo iiralyaawe, Owo paahi...ovira mphakani, Owo paahi...ephaka ti...Iphaka ti soosareya itroxeeniyu ni oksixeeniyu, ni sikina. Vano Owo paahi aavenxale elapo khuvaaanya. Khiyaakhanle hata epahari mulaponi okathi uwo. Muluku aaninaaniha elapo, hata khiyaarupa ipula. Owo aanaaniha eyo ni anaattuutu a maasi ni itthu, okhuwari. Vano okathi Owo...Etthu emosa paahi Owo iiraly'awe nto... .

<sup>79</sup> Okathi mutthu ophunlyaawe khukumiherya ota wa nreko naya, epantte emosa, exeeni yiiraneieye? Yaaroorihela ottuli mu...oviha vathi *va*, ni oriirya osulu *iwe*. Nto oviha ni oriirya, exeeni enthukumanya? Moone mu mucanelani mme naanaano va, oviha mpaani mu ni oriirya vate. Munnoona oviheriwa? Ni epula kehiyo hat'etthu woohikhala oviha, orettheela. Ni maasi ittuurwa. Vano nto okathi eyo... .

<sup>80</sup> Okisivela nsipo nle:

Nyuwo moohela ntata Nanyu, Pwiya  
ooreeraxa, mmathalani,  
Moohela ntata Nanyu nooreeraxa mmatta;  
Pwiya, Nyuwo mooyeehi muro,  
Moovenxa mwaako,  
O Pwiya, muhele ntata Nanyu nooreeraxa mwa  
miyo.

Nyuwo moopaka meeku, moopaka meeku  
akhalinhe epula,  
Okhuma epula khupaka ephareya,  
Okhuma ephareya khuruuha meeku,  
Wira munivahe ekumi voowaatta;  
Munnivarelela elapo ni erimu ni oruma Wanyu,  
Pwiya,  
Oh, xontte muhele ntata Nanyu nooreeraxa  
mwa miyo. (Oh, muulupale! Ayo, Muluku a  
Wirimu.)

<sup>81</sup> Vano okathi ula muulupale, eyo ethetemanenle ottuli *sa vano*, ni Owo oonimanela hiyo natiri, “Kahi maasi tho, masi mooro ekwah'ela!” Ohiya orihela...Awo arihenle elapo ottaiwene okhuma vansuwani, vekeekhai, khukhala yooriirya. Nyuwo mwarihelaru vansuwani, enoopaheya. Nto siiso ntoko Owo aapwetexalyaawe ni maasi khuhela ekhweyi osulu, Owo “khaarowa wira-tho,” vano, Owo oomuhimya natiri wira Owo “aampaha!” Tivo vale munoophiya nipuro etampi ni soosiveliha sothene ni onanara wothene... .

<sup>82</sup> Ni woohikhala khalayi keettiha ekhavallo kiviraka mmathalani. Kiri mwammiravo kaanuupuwelaka, kaakuxaka iliivuru saka sa ihantisi ni xeyokarafiiya ni wuupuwela ilapo suulupale soowaataleleya sa epantte onkela nsuwa. “Nihiku nlo,” miyo khwira, “Kinookhala weiwe ni murettele ni voomaaleleya weiwo ohikhanle etampi, ni kinimweetteetta

mmapuwani ni kinoorowa oxaya ntoko aHinti. Ni kinoo—kinookhala weiwe, makhalelo a murettele, mahiku othene a ekumi aka.” Masi vano ti . . . mukunya onkhala weiwe. Weiwo mukunya onrowaawe, etampi eri ni yoowo. Owo ti namwiiva muulupalexa ni mulipa-oowiiva a athu othene mulaponi, ti mukunya. Owo t’okhanle ootakhala murima a makhuli othene!

<sup>83</sup> Nno woohikhala khalayi mpapheloni mwa ihapari (Munna Thom, a wAfrika), Kaahimoonna artiiku mmosa a epaphelo ya ihapari isumana piili sivinre, kookupali wira yaari yeeyo, nto owo aahimya wira . . . awo yiira, “Athu a wAmerika nlelo yatthuniheriwa orowa wAfrika, miyaakha muloko okhuma vano mwatto muulupale a wAfrika onoomalamala, itthepo.” Atakhali animoopela khula nipuro awo anweryaaya. Elatarato ya oolopwana aili aalupale ephavelaka onvarela oolopwana mmosa oovulala. Yaakhala ntoko maithori yaanimora mmaithoni mwaya. Awo khiyaatthunasa e . . . oolopwana khiyaatthuna wira oothiyan okhwe. Nto khula mmosa omukhaliheryaka owo mpararini mwawe, sa, wira emukhottiherye omorela yawawe . . . vathi. Owoopeliwa kapatti-kapatti. Mutthu onoopela khula etthu siiso khomphwanela okhalana kapwitthi mmatatani. Ti yeeyo. Khamurina akhili oophiyerya wira mmweettiherye.

<sup>84</sup> Vano, miyaakha miili sivinre, kitthunaka osukiherya nikoto, na itthove, wa mpatthani aka ooreera murima, Munna Roy Roberson n’akina ale ottuli iwe, okathi waahool’aka oColorado; kaahisuwela wira naahikhalana nikoto nooreera. Jeff ni miyo naahikhalana iwe mwa miyaakha ni miyaakha, miru soophiyaka miloko mithanu na miraru sa itthove munikotoni. Awo yaarimwaahiya amosa-amosa w’aximiravo ala a oskritooriyu a oDenver orowa iwe ni ewaranse-ene ikalsa ipulusa iya, ni mwetto wa mukala. Ale anamaxaya. Hmm! Va awo khuphiyasa iwe, nikhuru nimoso, mukaaroni sa ajiipi ni itthu siiso, khukela mulaponi mwahu iwe.

<sup>85</sup> Nto miyo kaaroiha itthove iya omwaako ottuli waya, ntoko emiilya emosa wala piili, nto awo yaarowa othukumanya. Muhaana okhaliha soomwaramwareya, soolopwana iye suulupale ni itthu; mwaahiire, munookawanya nikoto nanyu. Siri ntoko ohuwa inyompe wala etthu. Inama sa mutakhwani saahaana okhala vomasaru wa hiyo. Kehiyo eluluwanyelo. Mwaatthunaka woopela etthu awo aakhalanasa nipuwa no owoopela-vo. Ti yeeyo. Ti yootakhala wiiva itthu siiso. Eyo ti y’etampi, ti yootakhala!

<sup>86</sup> Nto kaahaalikela iyoopelo emiya emosa ni miloko miili ni tthaaruu sookhuma, ntoko, metaralyatoora, yoopaka mmakhatani mwaya. Nto voosiisu wootharelana, Munna Banks Wood va ni miyo, naahirowa omwaako, kaahaalikela mapuro muloko ni mathanu na maxexe a ephome. Khiyaasuwelasa hat’etthu ya oxaya; nyuwo pooti omoopela mwaamunama muulupale siiso, khino munoommana saana voophiyerya omwiiva. Vano



awo yaarootaphuwa paahi, “bang, bang, bang,” yoopelaka emosa ni ekina. Vano, iyo sinimookhwa. Nto exeeni enrowa . . . Nuumala ophwanya ehooma, mwaphwanya vale khasina-muteko, sinimunnta naanaanoru; vano anamathola, akhwatte ni itthu, anookhuura. Mapuro muloko ni mathanu na maxexe a ephome, soolopwana suulupale, mapita *siisaale* maalupale, ni ephome evuuvaka isentiimeturu miloko mithanu na mosa vaavo saathoroliwaaya ni ikapwitthi iye. Khiyaarina otthuniheriwaka mutakhali siiso okhalana kapwitthi mmatatani. Ti yeeyo. Owo khorina akhili wira amweetiheryeke kapwitthi. Oh, ti yoowoopiha, y’etampi wira siiso.

<sup>87</sup> Eyo ti yootakhala, masi owo ti mutthu a wAmerika. Canada, nyuwo atthu oreera murima a oCanada! Amerika atthikela-ru arowaka, Canada onookhala ootakhalexa ntoko Amerika, nuuvira okathi vakhani. Mwaattamele mikaano sa oCanada khula nipuro, nto munikhalana mukhalelo yoowo wa wAmerika. Amerika ola ti namuttompe a ilapo. Vekeekhai ti yeeyo okhanlyaawe, ni onrowa okhala ootepa ovikana vahitonko awe vano. Onrwa woomalelani wawe! Bibilia onnihimya omalamalihiwa wawe, onnihimya moota onrowaawe okhala. Amerika: ootakhala, oowunnta, oonanara, oohireera. Eyo ekeekhaii voolikana. Owo onnikhalaka elapo yuulupale. Owo onnikuxaka mutthaka wa Ehapari yooreera. Exeeni enimukhaliha ele owo okhanlyaawe? Okhala wira owo ookhootta Mutthaka wa Ehapari yooreera, ni ookhootta Ikeekhai. Owo t’onanaraxa. Owo onimoona erwaaka, muhixanke. Miyo kaahoona eyo mwa yoowoona ntoko SIISO ANIHIMYA T’APWIYA! Enimoorwa. Owo onoorowa oliva mwaha wa itampi sawe.

<sup>88</sup> Ottuli okathi Amerika aary’awe Amerika, owo aari elapo yuulupale. Yuulupalexa olumwenku otonko aya osuwela opacerya Isarayeli, aari Amerika, masi vekeekhai owo ohiihonona mmansawe vano. Owo orookhootta Mutthaka. Khokunxe etthu woohikhala paahi. . . Vano yoowo mwaneene ohi. . . Munooverya woona vary’awe vano. Atthu othene annisuwela eyo, mwaathanle ookiserya onnooniherya vari mukhalelo awe wa erooho. Uh-huh. Owo khonsuwela.

<sup>89</sup> Vano, mahumu ala akilante-ene veehiceni ni ekhilempa awe. Vano, eversiikulu 5, ninrowa opacerya:

*Veehiceni waanikhuma overunya. . . itari. . . masu: ni saahikhala mithuko mithanu ni miili saapatta mooro ohoolo w’ehice, seiyo siri Irooho thanu ni piili sa Muluku.*

<sup>90</sup> Oh, okisivela ela! Ankhi nyuwo? Oh, kinoona ntoko wira ekasako aka ennikilikanela, moosuwela. Miyo paahi. . . okathi. . . Oh, kinihimya ekhasako ya erooho, vekeekhai, moosuwela. Vaareera.

<sup>91</sup> “Okhuma Veehiceni.” Nrowe nilavule Ehice yeela vano minuutu vakhani. Ela khiyaari Ehice ya omoriwa ikharari. Ehice ya omoriwa ikharari yoomala; khuuvo-tho omoreliwa ikharari, eri voohimoreliwa ikharari. Moota xeeni onrowaahu... Moota xeeni ehice ya olamuliwa enrowaaya okhala ehice ya olamuliwa ya Kristu, ehice ya olamuliwa, Olamuliwa wa Veehiceni Yootteela? Onoorowa okhala omoreliwa ikharari nto? Khuuvo hata okathi wa ikharari wira ovahiwe. Veehiceni wa olamuliwa mwaamuwerya okhuwela “ikharari” mpakha ohiwerya okhuwela-tho, nto ti, vaareerela hata mukhuwelele ettheke nipuro nlo, okhala wira khuuvo-tho omoreliwa ikharari.

<sup>92</sup> Vano ti nikhanye nihiku no omoreliwa ikharari! Vano, nrowe nitthikele mwa Waataana wa Khalayi va vakhani paahi no noone ele ekhanye omoreliwa ikharari. Nitthikele ottuli noone etthu yaakhumelenle Ehice ela. Ehice ela, vekeekhai, ti e—ekhukulu y’olamuliwa—vo. Ni okhala... mwaha wa yeeyo olelo sikhanyaaya ikharari, okhala wira mukhuneelo ti wootatheliwa ettipiheryo. Ephome! Vaakhalakaru wira Ephome eri veehiceni va olamuliwa nto khukhanye-tho olamuliwa, onkhala omoreliwa ikharari, okhala wira Etthu emosa ehookhwa wira yeemexe olamuliwa. Moonaka vale, mwiire, “Amen.” [Muthukumano oniira, “Amen.”—Mol.] Vaakhalakaru wira Ephome eri vamukhuneeloni, yooniherya wira Etthu emosa ehookhwa wira yeemexe olamuliwa. Masi okathi Ekereja enikuxiwaya, mukhuneelo onkhala ehice ya olamuliwa!

<sup>93</sup> Iwe, moosuwela, Waataana wa Naanaano nno, nave, “Ni empa y’okokhorela.” Ti vaavo—amwaakihi... empa yo okokhorela, mphuki vakhukuluni mpaani. Vano, ekhukulu iyo ya olamuliwa mpaani m’okokhorela yaakhala yoosareya mwiixi. Yaari exeeni iyo? Ntoko Mwaako Sinayi, olamuliwa! Ikharari saahihiya e—Ehice ya Muluku. Muluku onoorowa olamula olumwenku voohimoriwa ikharari. Akavi ansuwela yeeyo?

<sup>94</sup> Etthu emosa paahi Owo onrowaawe osuwela nihiku nle, exeeni Iyo? Ephome. Eyo t’itthu emosa paahi yaammaalinhe Muluku oovirwa.

<sup>95</sup> Atamu ni Hawa yaahipaka iventaale sooreera ntoko khula Mmetotista, muPatista, Prespiteriyaano, wala, muPentekosite aakhanlyaawe opakaka, eyo yaahikhuneela epwitipwiti aya. Masi Muluku aaniwerya woona ovira memmo, tivo Owo aahiiva etthu khukuxa isapala sookhwa sa i—isapala sa mwaamunama ookhwa khukhuneela. Ephome yaahaana okhala opuro aya. Eyo yaahimaaliha ovirwa Wawe, Owo aahona ephome nto khutthika, okhala wira etthu emosa yaahimwaraxa ekumi aya. O Muluku!

<sup>96</sup> Muupuwele yeeyo! Etthu emosa paahi enrowa omuttikiha Muluku Ephomee. Ni eri Ephome emosa paahi Owo onrowaawe

otthika-vo, nto owo ti Mwan'Awē Yoowo. Owo oonaru wira Ephome ya Mwan'Awē Yoowo, Owo onoothika. Okhala wira eyo ti yoovaha ekhanle. . . Muluku oonvaha Mwan'Awē, wira aavuluxe ale Owo aasuwenly'awē khalayi ene, ni eyo ennimuttikiha Muluku wa ehukhumu Awē. Masi okathi Ephome eyo enikumihwaaya, ni othene yaasuveliwe khalayi-ene aniihaneliwaaya mw'Erutthuni yooreeraxa, Ekereja Awē khukhalihwa yoolikana ni khukuxiwa, nto oviruwa wa Muluku ori mw'atthuni.

<sup>97</sup> Oh, munna, muhikhalakhale mutthunaka weemela vale! Kinnamputi weemela ohoolo wa ekapwitthi metaralyatoora, othikilasiwa kapatti-kapatti, oremmwa epolekaata ti epolekaata, etthu p'itthu (ntoko elaphelo ya Anakhavalo a Columbus), kihuliwe erukulu aka n'upahiwa ni esoofiri ni itthu sothene sikina mwa miyo, ni miyoono saka ni metto othikiliwa, etthu p'itthu ekhanle, masi *ohikhalakhala* keemelaka Woolamuliwani vale wa Ehice Yootteela ohoolo wa Muluku.

<sup>98</sup> Oh, mukihye kikuxe ehice ela yaamukhaani *nmo* ohoolo wa mukhuneelo wa Kristu ni okupali Ephome Awē. Hat'etthu nkinruuha mmoononi mwaka, Pwiya.

Khekanle ephattuvelo ekina ensuwel'aka,  
Hat'etthu woohikhala Ephome ya Yesu. (Ti  
yeeyo tu ensuwel'aka.)

Ola ti nrromelo aka wothene ni mukhaliheryo,  
Hat'etthu woohikhala Ephome ya Yesu.

<sup>99</sup> Khivanxankiha Eddie Perronet. . . yaakhoottiwaaya masipo awe. Orye-ene muKristu, muKristu oororomeleya, awo khiyaatthuna othuma masipo awe. Nihiku nimosa owo khwira, "Kinoolepa nimosa, nto nihiku nlo. . . nlo awo animwaakhela." (Nto atthu yaatthuna etthu ekina yookhalaxa ya vano mwa masipo a etiini.) Nihiku nimosa iwe Erooho Yoowaarya khunvara, nto owo khukuxa ekaneta khulepa:

Atthu othene evuwihe owerya wa Nsina na  
Yesu!

Malaikha ookokhora emore;  
Niruuhiwe nleha na omwene,  
Ni awarihiwe Yoowo Pwiya a mapwiya.

Maana mwa Kristu, Mwala woolipa  
kinneemela;

Ithaya sothene sikina mithaaka sinkomowa,  
Ithaya sothene sikina mithaaka sinkomowa.

<sup>100</sup> Enakhaleru ekereja, onakhaleru mpatthani, onakhaleru nwanani, enakhaleru elapo, sinakhaleru mihakhu, onakhaleru ohaawa, onakhaleru oreera, wala etthu p'itthu, ithaya sothene sikina mithaaka sinkomowa! Eyo t'itthu emosa paahi, vookiserya enoolakaseya. Masi:

...Kristu, Mwala yoole woolipa, miyo  
kinneemela;  
Itthaya sothene sikina mithaaka sinkomowa.  
(Muhele eyo mmuruni.)

<sup>101</sup> Nwehe! Nirowe mwa Onamukuttho 16, nisome ottuli, ottuli saana wu wa Bibilia vano, mwa ikano sa Onamukuttho, noone va Onamukuttho—Onamukuttho kapiitulu 16. Ni nipacerye eversiikulu 14 y'ekapiitulu 16. Oh, miyo—miyo okisivela oviriha okathi aka mwa itthu iya, okumiherya ota. Onamukuttho mulo-... ahiiso Onamukuttho 16:14.

*Nuumala okuxe ephome ya mwaanyompe, nto otathele n'ikatha awe vasulu va mukhuneelo* (Vasulu va mukhuneelo! Nwehe, ninrowa okela mwa yeela okathi vakhani)... *onikhuma nsuwa*...

<sup>102</sup> Muhiliyale nuulumo nlo “Onikhuma nsuwa”! Yesu onrowa okhuma woowi? Onikhuma nsuwa, muneekuni na Ovuwa. N-s-u-w-a ninkhuma woowi? Onikhuma nsuwa. M-w-a-a-n-a onrowa okhuma woowi? [mw'Enkelesi moolumo nsuwa ni mwaana aniiweya voolikana—Mot.] Onikhuma nsuwa. Mukhuneelo waapwehiwe vayi? Epantte onkhuma nsuwa. Mwaha wa xeeni kookilaathin'haakani nyuwo othene epantt'ila nwehaka onkhuma nsuwa? Mwaha wa xeeni? Altaari ori epantte onkhuma nsuwa. Nnimoona nuvira okathi vakhani, moota kinrowaaka, okweretha vooreera-vo. Kaahaavekela ancine ntoko saaweryaaka wira eruuhe ipaphelo ni siiso, wira nikwerethe maapha ala minuutu vakhani. Vaareera:

*...otathele...mpantta onikhuma nsuwa; ni ohoolo wa mukhuneelo otathele...ephome n'ikatha awe imaara thanu na piili.*

<sup>103</sup> Oh, eyo kahi yooreera? “Imaara thanu na piili mpantta onikhuma nsuwa.” Exeeni iyo? Okathi Mithanu na Miili wa Ekereja onrowa okhuneeliwa ni Ephome. Aleluya! Ephome ya Yesu Kristu ti yoophiyeryaxa, nsana, olelo, ni mahiku othene, ni wa khula okathi, wira emoopole khula natampi, envonihe khula mutthu onwereiwa, eruuhe khula mwiiriirya, khula ethoonyeryo wiiraneya. “Imaara thanu na piili,” ottuli wu mwa Waataana wa Khalayi, iyaakha ekonto emosa ni imiya xexe ni miloko mithanu na mixexe Kristu ohinatthi orwa. Muupuwele yeeyo! Ekanyeryo, “imaara thanu na piili sinoo...”

*Nuumala ohite epuri yoolopwana...mukuttho wooliverya etampi, s'athu, ni okuxe ephome aya ni e... mwa ekuwo, iirihe ephome eyo siisaale siirinhaawe ephome ya mwaanyompe,... otathele vasulu va mukhuneelo, ni ohoolo wa mukhuneelo:*

*Nuumala ohele mukuttho wooliverya itampi nipuro nooreerihwa, mwaha wa...so... wa sootakhala s'ana a Isarayeli, ni mwaha wa sootheka saya mwa itampi*

*saya sothene: siiso-tho onimwiiriha mwaha wa eheema  
ya muthukumano, yeeyo enkhala varyiyari ale ari  
varyiyari va—va soonanara saya.*

104 Yaari exeeni iyo? “Mukhuneelo.” Siri yayi vano? Nto muhina mwa nivuku mme yaari exeeni? Ikano. Nto ikano, ohonona yooruma emosa waari okhwa woohimoreliwa ikharari. Masi okhalaka wira mwaamuwerya omoreliwa ikharari, ephome yaahaana okhala waltaari. Awo yaatathela mukhuneelo. Nto mukhuneelo altaari nyuwo onkokhoraanyu-vo n’uvekela omoreliwa ikharari. Ehiiraneye hiyo okhalakhala nikumihaka mukereja mwahu, altaari ule a khalayi vaavo athu akhanlyaaya okokhoraka ni omuxontela Muluku wira aamorele ikharari. Ni omoreliwa ikharari ti woowaatta, ni onikhwalala mahalane okhuma Mphomeni mwa Pwiya Yesu. Vano, nave-tho, iwo t’umoreliwa ikharari. Owo ti mukhuneelo.

105 Masi nwehe va, khiwaari mukhuneelo, maana waahikhala “overunya ni etari ni masu.” Khuuvo overunya ni itari vammoreliwa ikharari. Iwo olamuliwa.

106 Nrowe nikhunle mwa Okhuma, kapiitulu 19 ya Okhuma versiikulu 16. Okhuma, kapiitulu 19 ya Okhuma, nto nipacerye eversikulu 16:

*Nto vaahiiraneya . . .*

Nwiryane etthu . . . okathi Muluku aawenlyaawe vaMwaako Sinayi:

*Nto vaahiiraneya mmurotoni mwaya voosiisone, saahoopa itari . . . okukutteya, ni neeku nooriipa vamwaako, ni oruma wuulupale wa nlope; (Exeeni ekhanle nsu na nlope? Ti nlaikha nuulupale.) mpakha athu othene . . . (Nwiryane!) . . . athu othene . . . yaari omaxaaxani othukumela.*

107 “Olamuliwa!” Whish! Awo yaaheetta mpakha iwe ni Muluku aahaavaha mahala wira yeetteke ekwaha, masi awo yaavekenle ikano. Awo . . . Muluku aathuna wira awo ehikhale muromolelo; awo yaathuna opaka muromolelo mwa yeeyo, etthu yaakhanlyaaya onyakulihanaka mwaha wa yeeyo, ohiya omutthara Muluku paahi ni okhala vathi va olamula Wawe, vathi va owerya Wawe. Mahala yaahinvaherya profeta, mahala yaahinvaherya ettipiheryo ya itampi (mwaapwittipwitthi), mahala yaahinvaherya itthu sothene iya, nave nnakhala vo awo yaathuna olamuliwa. Awo yaathuna etthu yaawery’aya wira.

108 Muluku khwira, “Mwaathukumanye vamosa, Miyo kinimwaaleela exeeni iyo. Miyo kinoowooniherya exeeni iyo.” Musome! Nwiryane! Nto oruma wa nlope waahikhala wuulupale ni wuulupale mpakha ottikinya elapo. Munnoona ele okhanle olamuliwa. Miyo nkinthuna eyo. Mukivahe ikharari!

109 [Munna Fred Sothmann oniira, “Munna Branham?—Mol.] Ni...[Munna Branham?”] Ayo? [“Yoolempwa eyo—eyo yookiserya musomalyaanyu yaari evi?”] Eyo yaari Okhuma, e—e—ekapiitulu 19 ni eversiikulu 16, Munna Fred. Okhuma 19:16.

110 Vano, nwehe eversiikulu 17:

*Nto Moise aahaakumiha atthu omaxaaxani wira yakumane ni...Muluku;* (Oh, wulu! Kintthuna kikumane ni Yoowo ni murettele, kahi siiso.) *nave awo yaaheemelasa mmukhitte mwa mwaako.* (Ottaiwene saana.)

111 Muupuwele, mwaak’owo waahikhalana mikaano saakwerethiwe mukerekhere. Hata enyompe yakwanyaru mwaako ole, yaahaana okhwa vaavale vene, khiyaakhanle orwaaka Ohoolo wa Muluku. Nto Muluku...“Ni Moise aahaakumiha atthu.”

112 Vano, eversiikulu 18, eversiikulu enttharelana:

*Mwaako Sinayi wothene waatthuwa...mwiixi, okhala wira APWIYA yaakhuruwenle-vo mwa mooro:... (Otthuwaka mwiixi paahi ni opattaka ntoko ttukuttha.)*

113 Awo yaakhurunwe sayi? Kahi mwa Ovuwa Waya wa Shekinah, masi mooviruwani wa ilamulelo Saya.

*...nto mwiixi aya waatthuwa ntoko mwiixi wa ttukuttha, vano mwaako wothene waanithukumela vancipale.* (Munna, miyo nkinthuna okhala iwe!)

*Nto oruma wa nlope waahitepa wiiwanyeya, ni oruma wuncerereyaka wuncerereyaka, Moise aanlavula, ni Muluku aanimwaakhula ni oruma wookukutteya.* (Moise aanlavula; kahi atthu, awo yaamuthukumela kapatti-kapatti.)

*Vano a—vano APWIYA yaahikhuruwela omwaako Sinayi, vasulu vamwaako: nto APWIYA yaahimwiihana Moise wira arowe vasulu vamwaako; vano Moise aahiwela.*

*Vano APWIYA yaahimuleela Moise wira, Mukhuruwe, nto mwaalopole atthu, wira ehituphe mukaano wira ewoone APWIYA, okhala wira anci-ene animookhwa.*

114 [Nipuro vahiitthu mufiitani—Mol.] Atthu anookilaathi ottuli wa ekereja n’umutheya mutthu onlavula ilavulelo, wala wiina mwa Erooho; oopweteya, aaveeha Erooho Yoowaarya, ootthittiwa ekanyeryo mahiku othene! “Ole onrowa olavula nuulumo noovirikanya Erooho Yoowaarya khankhalakhala oleveleliwaka olumwenku ula, nnakhala molumwenkuni onrwa.” Muhiwehe Eyo! Mwiirakamelihe Eyo ahiiso mukupali Yeeyo!

115 Vanreerela nihiye Yoolempwa eyo. Mutthikele musomaka, ekina aya, moone etthu Muluku ohimaly'awe. Nto atthu yiirale, "Oh, Moise, nyuwo mulavule. Muhimuhiye Muluku olavulatho! Hiyo naanitthuna vano nahaavekenle yeela." Munnona? "Nyuwo mulavule ni hiyo, Moise. Muluku alavula, hiyo othene ninookhwa." Moone, Muluku aahipaka ettipiheryo.

116 Vano, "Nsu na Veehiceni." Nkawehani Veehiceni va, "ohoolo wa Ehice saahikhala ittheneeri thanu na piili," Masu a ittheneeri. "Masu," moone. Yaahikhala tho mwa Wiisuupulula 4 va, ahiiso 5, hiyo ninniphwanya, "Nto Veehiceni waanikhuma overunya, itari, ni masu." Kahi nsu *nimosa*; "masu," oowaatta. Yaari xeeni iyo? Muluku alavulaka ni ekereja, aisooniheriyaka Mmansawe mwa Irooho thanu na piili. Okathi oottikittheliwa eekeekhai a Muluku onlavulaawe, ti Nsu na Muluku! Okhootta Nenlo onkhala okumiha muthuko. Munnona? "Masu," Nsu na Okathi Mithanu na Miili wa Ekereja (va vanloothoni), masu elavulaka ni etari ni overunya.

117 Mahiku ala awo t'o, "Ahe, hiyo khinnaamini ohimya 'omooroni' vapulpitu." Oh, ikharari! Vano blah! Hmm! Hiyo ninaatthuna atthu a Muluku, atthu ahinrowa omaala!

118 Vano, atthu othene khakhanle okhalaka mulaleyi, masi nyuwo muhaana nsu. Nto mwaahiwerye waaleerya atthu mutthaka... Mwakhalala mulaleyi, muniitthaneliwa vapulpitu wira mulaleyeke. Mwaahikhale, nlelo mwa mulaleyi, masi *mwaakhalele* atthu elaleeryo. Elaleeryo anyu ekhaleke ya *makhalelo*, nto nlo ti Nsu na Muluku ninrowa oruaha wuuliwa muru w'ale ankhootta Nenlo. Awo aniira, "Khaavo onwerya othoonya ni ekatha awe makhalelo a mulopwan'ole wala muthiyan'ole. Awo t'osivela, ankhala... Awo... Vakhala wira ootoko okhala mutthu a Muluku, ti mulopwan'ole wala muthiyan'ole." Moone, mutthareke makhalelo a ilaleeryo sanyu. Muheererye olaleya vakhala wira khamwiitthaneliwe okhala mulaleyi; munootapanya sothene, khula enamuna, ni wiiivitikanya, ni munimwaavitikanya atthu, ni khamunrowa osuwela... Ahe, nyuwo muni—munimwaahonona awo ni nyuwaano, nave. Mutthareke makhalelo a elaleeryo anyu paahi!

119 Mulaleyi oniitthaneliwa olaleya yawawe, ni otthara makhalelo a yeeyo nave. Mwaahiweryeke okhala Yeeyo, weeso muhiye olaleya Eyo. Masi muhaana otthara makhalelo a ilaleeryo sanyu.

120 Vaareera, va yaari "masu." Oh, moota omphavelaahu oJeffersonville masu ikonto sene ookhaliwa, etari ya Muluku yoopaka mwa omaaleleya ni oreera murima, oloka, makhalelo oohipahuwa, yeettaka mulaponi olelo, oohikhalana nlepa. Ayo, mulopwana, aKristu eekeekhai, awo etari yoonvirikanya nwanani. Xetwani khoncala moota xeeni mukhanly'anyu ookhuwelaka vancipale; xetwani khoncala moota xeeni

mukhanly'anyu otuphaka wala moota xeeni sinwery'anyu wira *ela* wala okhuwela. Masi etthu eninvulaliha xetwani wona makhalelo awo, ooreerihiwa oowaarya oovahereriwa wa Muluku; mmulele khula etthu, mmwiihane khula etthu, oomaala sinweryanyaaya okhala ni okelela ohoolo. Oh, wulu! Eyo ennimurihela ottaiwene, eyo ti etari emmuttikinya xetwani.

121 Ntoko paahi, "Ahe," nyuwo muniira, "vaakhanle wira owo aaniwerya olaleya ntoko Billy Graham wala Oral Roberts, wala mutthu, mulipa-oolavula muulupale oovara murima, owo aarowaawe okhala..." Oh, nnari! Imaara sikina xetwani onnitheya paahi yeeyo. Owo khoncala-tho eyo ovikana etthu ekina. Nyuwo munookhalana teyoloxiyya othene—teyoloxiyya mwaatthun'anyu ni oxuttihiwa w'oseminaariyu, nto xetwani onookilaathi ottuli paahi n'utheya. Masi okathi owo onoon'awe Makhalelo ale!

122 Nkaaweheni awiixutti ale iwe, mwaan'ole oovahuwa nihiku nle aarina ecile, yiiraka, "Mmukhume, xetwani! Mmukhume, xetwani! Mmukhume, xetwani!"

123 Xetwani okilaanthe-ene vale, khwira, "Vano, khamwiniisuuliha muru mmansinyu? Vano, munnoona eniiraanyu? Yesu ohoolaelani, Owo ohoorumani, wira murowe mukoomole. Khaavo mmosa a nyuwo onwerya wira."

124 Masi, munna, awo yamoonaru Owo orwa, Mmosa aarwa eettaka voomaaleleya. Uh-huh. Oh, wulu! Owo khaarina y'ohimya hat'etthu. Xetwani uwo aahituthuwa okathi ene yoole. Owo aahisuwela wira aahaana okhuma, khweeli, okhala wira jaarwa Ekumi; kahi elaleeryo paahi, masi Ekumi. Khwira, "Mmukhume." Oh, wulu! Eyo yaahiira! Voomaaleleya; Owo aanisuwela etthu Owo aahimy'awe, Owo aanisuwela etthu Owo iir'awe.

125 Vano, "Masu," masu a malope mathanu na manli, yaari masu a ittheneeri thanu na piili, anamitthaka athanu n'aili. Masi vano nwehe va:

*...ni...mithuko mithanu na miili...ohoolo wa ehice, seiyo iri Irooho thanu na piili sa Muluku.*

126 "Mithuko mithanu na miili." Nrowe nikwerethe vakhani va, Ehice, nipuro noowaarya, muthukumano. Nto vaava *va* saari (emosa, piili, tthaaru, xexe, thanu, thanu na mosa, thanu na piili) ittheneeri thanu na piili, mithuko mithanu na miili, anamitthaka athanu n'aili, Irooho thanu na piili; kahi otthunaka ohimya mara wira Muluku ori mwa Irooho thanu na piili, masi "wiisooniherya mithanu na miili wa Erooho Yoowaarya emosaru."

127 Erooho Yoowaarya eri vayi? Va Veehiceni, yaaryaka mwa khula okathi wa ekereja. Okathi *ula* wa ekereja onooniherya enamuna *ela*, masu a Muluku, Yesu Kristu mmosaru nsana, olelo, ni mahiku othene. Moone, thanu na piili, yaahikhala "masu."



“Ni mithuko mithanu na miili soovarela,” Irooho thanu na piili, “seiyo siri Irooho thanu na piili sa Muluku.”

128 Munnuupuwela wira Ittiminku piili sivinre naahikelela yeeyo, tiyamante muulupale? Masi onnithikiliwa mwa inamuna sinci-ene soovirikana wira ooniherye mooro ni waarya mwa yoowo. Ti siiso, “Yesu Kristu ti epacerelo ya opattuxa wa Muluku,” Wiisuupulula 1. Eyo ekeekhai? Vano Muluku opattuxiwe liini? Owo ti epacerelo ya opattuxa wa Muluku. Ni Muluku ti Oohimala. Eyo ekeekhai? Masi okathi Muluku opattuxiw’awe...okathi mwaana mwaamukhaani aarupaliwaawe mmirimani mwa maama, harusi. Nto owo khupacerya wunnuwa irukuruku iya mwa yoowo wira amuyare mwaan’ola mwaamukhaani, eyo yaari epacerelo ya opattuxa wa Muluku, “Maana Muluku aahiipaka erutthu khukhala ni hiyo, khukhala *Emanuweli*, ‘Muluku ni hiyo,’ epacerelo ya opattuxa wa Muluku.”

129 Vano mwa Nniya nle nuulupale naakhumme vatthayani... okhala wira Owo aapakiwe ni etthaya. Eyo ekeekhai? Owo aahilya yoolya ntoko miyo, Owo aahilya yoolya ntoko nyuwo. Yeeyo, ntthupi na erutthu, Owo aahikhala kalsiyu, epotaasiyu, patarootya, waarya wa olumwenku, masi mwa Yoowo waakhala Waarya Ohinimala. Khivanxankiha asuweli yiirenyaaaya Ettheneeri, “Muneetiherye mwa Waarya wanyu wooloka.”

130 Awo yooniherya Waarya paahi wa Waarya mmosa wooloka voomalela. Ni Owo aari vale, Waarya wooloka wa Muluku, epacerelo ya opattuxa wa Muluku. Vano, muhina mme aaphwanyaneya Owo... .

131 Owo aawerya sayi otthikela wiisooniherya Mmansawe wa ittheneeri Sawe sa elapo ya vathi, vaamanlyaaya asuweli omoona Owo Wirimu, nto iyo khukhala irooho sinrumeela elapo ya vathi va? “Owo ohaaxeriwe (Tiyamante muulupale, oothikiliwa) mwaha wa soottheka sahu, onyakatteliwe sootakhala sahu, ehukhumu ennivaha murettele yoomulemela Yoowo, makhwatta Awe t’anivoninhe.” Owo aaira exeenii? Ooniheryaka!

132 Khula mutthu onihimya okhala murumeyi a Muluku, onikhootta ovoniha wa Muluku ni owerya Wawe, khonaakhela waarya wawe muTiyamanteni memmo, khonaakhela waarya wawe Veehiceni vale. Okhala wira Eyo enoomooniherya Yoowo mmosaru nsana, olelo, ni mahiku othene mwa ittheneeri thanu na piili ni Okathi Mithanu na miili wa Ekereja.

133 Oh, avuwihewe Muluku! Kinoona wira ti yoophwanelela murumeyi omukokhorela Muluku okhuma vapulpitu, ni oxukhuru ni ovuwaha, nttittimiho ni owerya. Oh, moota ekhanlyaaya y’ekeekhai, moota enihakalalihaaya munep’aka mpakha kinoonaaka ntoko kaamuwerya okhuwela, n’utthimaka ni otupha osulu saana ntoko saaweryaaka, okhala wira yookhala Etthu mwa miyo ekirukunxale ele kaari-aka. Nkihiyo

ele yaathuneya wira kikhale, ni nkihiyo ele kintthun'aka wira kikhale, masi koosuwela wira koorukunxiwa mwa ele kaakhanlyaaka. Yookhala etthu ekhumelenle, etthu ekuxale opuro!

<sup>134</sup> Ni weemela va woona Masu ala Ahinimala avilenle etarupa yothene! Okathi awo yaaphavenlyaaya waapaha aBibilia ni sothene, Awo yaahikelela ohoolo vamosaru, okhala wira Awo aahimya, "Erimu n'ilapo ya vathi sinoovira, masi Masu Aka khanvira."

<sup>135</sup> Osulu nno waattamela oChicago naanaano, ni bi—Bibilia ori vapulpitu va ekereja emosa. Khalayi ehinatthi Ekhotto Yoopacerya ya Mulaponi, misiyonaariyu mmosa aahikhalana vano mulopwana mmosa khurukunxa murima, nto owo aathuna onvaha Bibilia awe misiyonaariyu, khwira, "Miyo nkikhanle woovahakani yoola, ame aka t'akivanhe ola." Khwira, "Miyo, kaphiya owaani, kinimooveleeliheryani mmosa."

<sup>136</sup> Owo khupacerya otthika alapuwaka epahari nto supimariinu a wAlemaanya khumphutula pa—paketi. Khinnaphwanyiveke hata nipattuusa nawe. Nto miyaakha miili ohoolo waya, ottaiwene olimani, awo yaahoono ekaaxa elenleyaka. Akina wa awo yuupuwela wira yaamuweryaneya okhala etthu yasamme, nto siiso awo khukumiha ekaaxa khutthukula, axilopwana anli yeettasaka. Nto muhina mme, etthu emosa paahi yooonwe, aari Bibilia ole owo aanveleeliheryaawe misiyonaariyu. Owo ori vapulpitu nno vakhiviru oChicago olelo, mukereja Metotista. "Erimu n'ilapo ya vathi sinoovara, masi Masu Aka khanvira."

<sup>137</sup> Okathi wa maasi oosarya nno, mwaakha wa 1937, ekerej'aja yaamukhaani, okathi vathi va marove ni sikina saaryaaya memmo, hiyo naaniwerya ovira vasulu vaya va mm—mmwaatiyani wa ikaafi. Osarya maasi waahiwela. Nto, ahe, ohiy'ule okathi waalaleiy'aka Ehapari yooreera ni kaamuhin'ye-aka Bibilia aka oryeene ookhunliwa vapulpitu okathi waaronw'aka owaani; kilaleeryaka wira osarya iwe wa maasi waamurowa orwa, miyo khwira, "Kihoona mphimo wa imeeturu thanu na mosa ni nuusu vasulu va Ephiro Spring ohitto nno."

<sup>138</sup> Munna humu Jim Wiseheart n'akina khukitheya. Munnuupuwela yeeyo, Munna George? Miyo khwira... Owo—owo khwira, "Oh, Billy, mwaakha wa '84 saari ntoko isentiimeturu muloko ni thanu vasulu va Ephiro Spring."

<sup>139</sup> Miyo khwira, "Koomoona mulopwana mmosa akhuruwaka okhuma osulu, khukuxa ekopo ya mphimo nto kuhela iwe Ephiro Spring, khwira imeeturu thanu na mosa ni nuusu."

Owo khwira, "Nyuwo murootannyeya paahi."

Miyo khwira, "Miyo nkitannyeyiye! Eyo ti SIISO ANIHIMYA T'APWIYA!"

<sup>140</sup> Mwaakohe imeeturu kavi saari vasulu va Ephiro Spring. Imeeturu thanu na mosa ni nuusu va—vapolekaatani yoolikana! Voolikana.

<sup>141</sup> Nto Bibilia ole a khalayi memmo mwaalaleeriwe-mo ohiy'ule. . . Yaahipacerya orupa epula, osarya wa maasi oviraka ni sikina, ni ekereja ela ya khalayi. . . Ikhatera khurowa osulu mpakha vapathoni, Bibilia khurowa osulu mpakha vapathoni, oviraka va ni maasi ale othene envenxeryaka osulu. Epulpitu khurowa osulu. Iyo khukhuruwa; ni khula ekhatera khukhala voolikana-ene nipuro nimosaru, ni Bibilia khukhala nipuro nimosaru voolikana-ene, ni maasi ale othene, ni nlelo ookhunliwa-ene, ekapiitulu emosaru yeele nipuro nenle.

<sup>142</sup> “Erimu n'ilapo ya vathi sinoovira, masi Masu Aka khankhalakhala aviraka.”

<sup>143</sup> Moota Bibilia ole aalenleiye-awe mmaasini mme a maakha miyaakha miili ehinaanne hata moolumo Mme! Masu a Muluku t'ekeekhai. Amen.

<sup>144</sup> Kinnuupuwela nuumala yeeyo, Munna humu Jim Wiseheart khaareere osiveliwa ni yeeyo, khula okathi waanwereyaawe moonoo awe. . . Aahiphwanya enamuna emosa ya mukacamiho okathi ophiyalyaawe miyaakha soophiyaka miloko mithanu na miili ni mithanu, aaroomphwanya mwaamukokho. Owereya waanimuhaaxa *va*, aanitthimaka khumukuxa Bibilia, khimukhunla, ompweha vale, owereya okina *va*. Miyo kaahirwa vale nihiku nimosa nto owo aahikhalana aBibilia anci-ene vasulu wawe vahaaweryaaka omoona Munna Jim, owo aarina aBibilia paahi mapuro othene! Owo khwira, “Owo natiri a Muluku!” Ti yeeyo.

<sup>145</sup> “Erimu n'ilapo ya vathi sinoovira, masi Masu Aka khanvira.”

<sup>146</sup> Kinnimuupuwela humu aarwaaka okoona. Ni khaavo mmosa w'atthu awe ari va woona waka. Nto miyo kaanimukhaliheryaka vakhani, moosuwela, okelela ohoolo, okhala wira aahuuluvala ni aanitthuna musurukhu nto aanirwaaka. Owo khwira. . . Nihiku nimosa miyo kaarowa oCanada, khurukunuwa, khurowa vamukhora paahi, nto owo khwira, “Billy, mwan'aka, nimosa wa mahiku awo munootthika nto Halu Jim mutokweene khonrowa-tho okhala aviraviraka nno ni nno rampha ola va.” Owo waari okathi wookiserya. Okathi waary'aka oCanada, kaahaakhela ewarakha; owo aahikhwa ota iwe mmoononi mwa Munna Morgan muthiyana. Owo waamphwannye owereya wa murima, nto khuroihiwa oxipiritaali, owo khunweha nto khukhwa.

<sup>147</sup> Munna Margie muthiyana, ori vaava voosiis'ula? Owo okathi p'ukathi onnirwaaka. Nyuwo othene moosuwela. Mmosa wa myiaha suulupalexsa sa kankuru vaavo iwe Oxipiritaali Patista owo okhwiyaawe mwa miyaakha muloko ni mithanu na miili,

Okliinika ya Mameetiku iwe saalempwe, sa “okhwa ni kankuru,” miyaakha muloko ni mithanu na miili. Owo onkhala Ephiro Knobloch 412, onvara muteko ntoko nfulumeera nno. Oh, mahala ooreeraxa, nsu xeeni noosivela!

148 Jim Tom Robertson, mulapeli mmosa oLouisville, ni hiyo othene ninnimusuwela Jim Tom. Ti yeeyo emuruuhale owo waamini Mutthaka ola, owo aahirowa weiwo. Ni atithi awe amosa w’akhulupale a nikhuru nle iwe oxipiritaali. Owo aahirowa khwaavaavya, wira osuwele vakhala wira yaari ekeekhai wira owo aakhwa ni kankuru, ni khulenvwa khurummwa orowa owaani, ni yuupuwela mpakha vaasuwel’aya wira aahikhwa. Nto atithi awe khwaavyaavya okhuma wopaceryani mpakha wookiseryani, nto ekeekhaii. Nto Jim Tom khwira, “Ti yoowoothiwa; owo okilaanthe vaava naanaano va, kinoowerya woorihani wa yoowo.”

149 Oh, oh, Owo—Owo Muluku eekeekhai, kahiyo? Kinnitthapa Owo oweryaka oweha vasulu va soovonya sahu, ankhi nyuwo? Onniniiriha omphenta Yoowo ni murim’ahu wothene.

150 Ihice, overunya. . . Exeeni? “Mithuko mithanu na miili,” ahiiso mithuko, wala ittheneeri thanu na piili, siniihaniwa “Irooho thanu na piili,” sihimyaka wiiso-. . . wiisooniherya mithanu na miili wa Erooho Yoowaarya sa Okathi Mithanu na Miili wa Ekereja mwa mikhuneelo mithanu na miili sa omoreliwa ikharari athu. Iya siri va: mikhuneelo mithanu na miili, mikhuneelo mithanu na miili, ikereja thanu na piili, ittheneeri thanu na piili, wiisooniherya mithanu na miili, Irooho thanu na piili, mithuko mithanu na miili. Oh, wulu, moota Muluku ory’awe ooloka voomalela saana! Khula. . .

151 Sooheliwa vale mwa mammeru a Bibilia; mammeru a Bibilia ti etthu yoolikanaxa voomalela ekhanle mulaponi. Khamunwerya ophwanya yoovonyeya emosa okhuma Maphattuwelo mpakha Wiisuupulula, mmameruni mwa Bibilia. Khanivo hata nipattuuxa na yoolepa elempwe muhikhanlyaanyu ophwanyaka yoovonyeya emosa muhinatthi osoma iversu tthaaru; masi kahi mBi-. . .

152 Awo anneereryaka mwa miyaakha soovikana imiya piili wira yincererye nuulumo nimos a Mmavekeloni mw’Apwiya, wala okumiha—Mo nimos a. T’olikana voomalela! Khakhanle wuncereriwa-tho wala okumihiwa—Mo. Awo annuupuwelaka wira yaamukhaliha mavekelo awo ooreeraxa vakhani. Awo animweererya olokiha *ela* mwa Yaawo, ni ohela *ele* mwa Yaawo, wala okumiha *ela* mwa Yaawo; eyo kehiyo yooreera tu. Moone, T’olikana voomalela! Iphiro sothene sa Muluku ti soolikana voomalela.

153 Tivo hiyo na oohiloka, masi Owo oohimnye wira, “Mukhale ooloka voomalela ntoko Atith’inyu Wirimu siryaaya ooloka voomalela.” Ninwerya sayi hiyo okhala? Mwa Ephome

yooreeraxa ya Yesu Kristu, wiiliyala hiyo mmansihu ni okhala mwa Yoowo paahi. Nyuwo muri vo. Moota eryaaya yooreeraxa Eyo!

<sup>154</sup> Vaareera, eversiikulu 6 vano nakela-ru memmo. “Mithuko mithanu na miili.”

*Ohoolo wa ehice...yaahikhala ephareya yaakhala ntoko yoowaarya: nto eriyari ya ehice, ni orukurerya wa ehice, yaahikhala axinama axexe oosareya maitho ohoolo ni ottuli.* (Oh, wulu! Nkawehani ila!)...*axinama oosareya maitho—oosareya maitho ohoolo ni...* (Vano, mulipelele)...*ohoolo wa ehice...yaahikhala ephareya yaakhala ntoko yoowaarya: nto eriyari ya ehice, yaahikhala axexe...ni orukurerya...ehice, yaahikhala axinama axexe oosareya maitho ohoolo ni ottuli.*

<sup>155</sup> Vano, “ephareya y’eviituru.” Nyuwo munrowa o...Miyo ki...Ela kehiyo eyooniheryo saana va, masi kintthuna kittikitthe minuutu mmosa. Vano, vano ninthuna nisome va vakhani paahi. Ephareya ya eviituru enthoonyeriwa empa yoolompa ya khalayi, maana Moise aarummwe ni Muluku wira ateke empa moolompa elapo ya vathi ntoko owo soonalyaawe Eyo wirimu. Athu othene annisuwela eyo. Vaareera.

<sup>156</sup> Nto mukihye kikwerethe paahi vakhani va vano, kihimyaka, va naari nivuku mwa Waataana wa Khalayi, vaareera, etthu yootharelana, yaaihaniwa “nipuro Noowaaryaxa.” Nto nipuro nootharelana va aari altaari, neno nihaniwa “nipuro noowaarya.” Nto vakhani ehinaphiye va yaari “ephareya ya eporonse,” eniihaniwa. Mwa moolumo makina, naari nipuro mukuttho...mikuttho saarapihiwaaya—saarapihiwa va sihinatthi waakheliwa va...waltaari; valtaari va eporonse, wala altaari a eporonse vaavo mukuttho waapahiwaaya.

<sup>157</sup> Vano, ninthuna niwehe ela vano vatthu e...vaakhanly’aya. Ni, vano—vano, vaphareya va ya eviituru...yaari ohoolo wa Ehice ni ohoolo wa nipuro noowaarya. Paahi...Vano muupuwele, mithuko mithanu na miili sa eweero saakhala va so, nto yaakela mpasiyani. Munnona? Vano, eyo t’ile enooniherya waarya okhuma nipuro noowaarya va. Vano, nyuwo mwa...nnari, khamurina olepa ela vo vahikhanle wira munoothuna paahi, masi eyo...Kookhalana etthu ekina va miyo kaakwerenthe-aka mmansaka, kaatthun’aka wira kooleleni. Masi vano, moone, ela yaaihaniwa ephareya y’eporonse; khiyaari yuulupale siiso, yaaheliwe ntoko vooপুরoni mpaani m’olompa. Eyo yaaphwehiwe ntoko so va, yaari ephareya y’eporonse, yaari epasiya yaapakiwe ni eporonse memmo awo yaarapihaaya mikuttho. Mikuttho sihinatthi opahiwa wala okupaliwa, saahaana orapihiwa.

158 Oh, eyo khayaarowa opaka elaleeryo naanaano va, Totori? Oh, wulu! Eyo khiyaarowa—eyo khiyaarowa paahi... Eyo ennikithananiha, “soorapihiwa.” Khula mukuttho ohinatthi waakheliwa wa Muluku, ohaana toko orapihiwa. Sayi? Kahi vootupha murima, masi woorapihiwa ni Masu. Vano, naamuwerya otthikela ottuli nipiye vatthu rabbi ula muYuta...okathi waalaley’aka mutthak’ole wa maasi oovalaanya, mwaanyompe ooxeerya, maasi yaasukiwe, yaakhalihwa maasi oovalaanya. Ni hiyo nihinatthi ophiyerya orwa wa Muluku ni waamini w’ekeekhai, nihaana toko orwa ni maasi oovalaanya. Ayo, mulopwana. Muhaana orwa n’ixeeni? Masu!

159 Oh, mukihiye koone sinto kinoowerya olavula paahi wira nyuwo mu...khula mmosa avare eyo. Vano, mukhale muupuwelaka wa erooho. Murule ekofiyo y’okhottoni nto mukhale muupuwelaka wa erooho vano, okhala wira va enoorwa etthu. “Woorapihiwa ohinatthi waakheliwa waltaari,” ohaana toko orapihiwa ni maasi oovalaanya.

160 Vano, mukhunle ni miyo naakuvaka mwa aEfeso 5, nvarele opuro anyu paahi mutthikele ottuli, makukhu vakhani paahi ottuli, wa aEfeso kapiitulu 5 versiikulu 26:

*Wira akhalihe yooreera arapihaka... (Ekereja, owo onihimyaawe.)*

161 Moone, vano, mukihiye kitthike vakhani-tho ovikana yeeyo. Mutthike ntoko versiikulu 21, mphavelaka:

*Mwiiwelelaneke mmosa ni mukwaawe mmoovaka Muluku.*

162 “Mwiiwelelaneke.” Muthukumano, mmwiiweleleke pastore anyu. Pastore, mwiiweleleke muthukumano anyu. Nikhuru naamukhaani nakhumelela, muhikhale hata epantte emosa, mwiiweleleke muthukumano wothene. Muthukumano, nyuwo mwapacerya nikhuru, mmwiiweleleke pastore anyu mmoovaka Muluku. Munnona? Oh, munna! Hmm!

*Athiyana, nwiweleleke aiy’anyu, ntoko Apwiya, (Okhala wira awo t’apwiya anyu.)*

163 Akavi anuwela yeeyo, nyuwo athiyana? Eyo ekeekhai voolikana. Bibilia ohimmye siiso wopaceryani. Nlelo ti siiso.

*Athiyana, nwiweleleke aiy’anyu, ntoko Apwiya.*

*Okhala wira mulopwana tori muru wa muthiyana, siiso Kristu okhanlyawe muru wa ekereja: ni owo ti moopoli a erutthu.*

164 Siiso-tho mulopwana. Nyuwo othene moosuwela eyo, nyuwo atthu muthenle ni munnunwe, wala aana yinnunwe voophiyerya wira musuwele ephiro ya ekumi. Vaareera.

*...ntoko Apwiya.*

*Okhala wira mulopwana ti muru wa muthiyana, ntoko Kristu okhanlyawe muru wa ekereja: ni owo ti moopoli a erutthu.*

*Tivo siiso ekereja enimwiwelelaaya Kristu, nave athiyana ahaana ewiwelelaka asiyyaya mwa sothene.*

*Alopwana, mwaaphenteke axaar'inyu, ntoko Kristu ophentalyaawe ekereja, oivahereryaka mwaneene mwa yeeyo; (Muhimunyakeleke! Mwaairaka siiso, khamumphwanela okhala iya. Ti yeeyo!)*

*Wira owo awerye . . .*

Nwiryane, ela eri va! Mwiiwe vano:

*Wira owo areerihe ni arapihe ni maasi a o . . .*  
[Muthukumano oniira, "Masu."—Mol.] Hmm!

<sup>165</sup> Vano, khula mulipa-ookokhorela onkhalakhala aphieryaka Yeela ohaana orwa ni Masu. Aakhala anci-enexa anrwa enamuna ekina. Kinnaamini ihantisi sikhaani ni itthu, mwaha wa "amaama akhwiye miyaakha sinci-ene sivinre ni awo animoolipelelani Wirimu," eyo eri saana *nuumala* Masu oheleliwa. Atthu anci-ene anrwa waltaari okhala wira antthuna okumana n'amey'aya Wirimu. Eyo eri saana, mwaahaana wira yeeyo, masi kahi mwaha wa yeeyo munrweel'anyu waltaari. Munrwa waltaari mulapaka itampi sanyu okhala wira Kristu ohookhwelani, ni Masu!

<sup>166</sup> Vano, khula mukuttho ohinrwa vootthariha Masu khonkupaliwa nto. Eyo ekeekhahi? (Oh, munna, okinanara ohimya ela. Oh, okinanara ohimya eyo. Mukilevelele mwaha wo ohimya.) Mwaha wa yeeyo Miteko 19 omphwanyanyaaya mBibiliani, "Muhaakhela Erooho Yoowaarya okhuma okathi mwaaminni anyu?"

Awo yiirale, "Hiyo . . . hata wira yookhala . . ."

Khwira, "Vano, mpatisiwe sayi? Muhikelenle-ni Mu?"

<sup>167</sup> Awo jaarwiiye enamuna ekina woohikhala Masu! Khwira, "Oh, hiyo noovira mwa nikano, hiyo nipatisiwe . . . Yohani."

Owo khwira, "Eyo khenrowa ovar'etthu. Yohani aapatisa mwaha wo orukunuxa murima paahi, kahi wo oleveleliwa itampi."

<sup>168</sup> Nto awo vaaiwaly'aya Yeela, awo yaahipatisiwa-tho. Mwaha wa xeeni? Ni Masu! "Oorapihiwa ni maasi a Masu." Masu ahimye wira, "Nsina na Yesu Kristu!" Ethhu p'itthu enkuxa etthu ekina wa Yeeyo ti yoowoothiwa!

<sup>169</sup> Vano, munn'aka oophentiwa, koosuwela wira ela efiita nave. Vano, muhikhale oowiiniwa murima. Mukihiye kihimye ela ni mphento wa Muluku, ewoora ehaattamela kihinweryaaka-tho omaala mwa itthu iya, vakhiviruxa wa Orwa. Munnona? "Oraaru ti wa xetwani!" Miiyo kinihimya

eyo SIISO ANIHIMYA T'APWIYA! Nkawehani okhummyaaya-wo. Okhumme Omuthukumanoni wa oNicea okathi ekereja Katolika yaaphiyenryaaya oruma. Nuulumo "oraaru" nnakhala khannihimmwa muLiivuruni mothene mwa Bibilia. Ni wa aMuluku *araru*, eyo ti ya omooroni. Ori Muluku mmosa. Eyo ekeekhahi volikana.

<sup>170</sup> Vano, nyuwo muniira nto, "Nyuwo munaamini wira atthu ala othene a—akhanle a oraaru t'a omooroni?" Nnari, mulopwana. Kinaamini wira awo t'aKristu. Masi ewoora ehaattamela, munna, vaavo awo akhanlyaaya oovonya mwa exariya.

<sup>171</sup> Khula mutthu, khula nipuro, khula okathi, onthuna olavula mwaha owo, arwe wa miyo; khula murumeyi, pixipu, pixipu muulupale, etthu p'itthu mukhanly'anyu. Ni ela enookaravariwa, enoorowa mulaponi mothene. Miyo kinveka ni ophentana wa oxinna, wa khula mutthu onikiiwa mufiitani mu mulaponi mothene, onrowa orwa akooniye yoosoma emosa ya Yolempwa wala eparaakrafu emosa mwa khula wahala (okhanle wahala eekeekhai) vaavo mutthu ti mutthu otonko awe opatishiwa mwa nsina "n'Atithi, Mwaana, ni Erooho Yoowaarya" mpakha awo wiitthokiha ni ekereja Katolika, kinoorukunxa mwiixuttiho aka. Khula mutthu aapatishiwa mwa Nsina na Yesu Kristu! Nto axinn'aka oophentiwa, maitho anyu t'ohoona wa itthu iyo. Nvekele wira Muluku oovaheni Muthuko!

<sup>172</sup> Vano, mwakhalana Yolempwa wira mukhaliherye eyo, kinookhala koolipelelakani wala wiiwelela wiitthana wanyu. Nyuwo mwa...nyuwo...Nuumala efiita ela, nyuwo muneetta vootthuna ohisuwela wa muroohoni mwaahikitharimule mwa yeeyo. Mwaatthunaka osuwela ele ekhanle Waarya ni ekhanle epiphi, nrowe nimukohe Muluku. Muupuwele, miyo kinihimya SIISO ANIHIMYA T'APWIYA! Nyuwo mwaaminiki vale wira miyo ka murumeyi Awe...Nto yahaakhanle vootthariha Masu, yaamukhala yoovonyeya. Vano yaahikhale vootthariha Masu, muteko anyu orwa okookolela, uh-huh, moone eniiraneya. Uh-huh. Iwo ovonyaa!

<sup>173</sup> Miyo kinnaamini wira atthu ikonto sene a oraaru aniwaamini aMuluku araru t'owoopowa, okhala wira awo khansuwela hata evirikanelo. Ninoorowa ophiyerya yeeyo ohoolo mmutthakani.

<sup>174</sup> Vano, nyuwo othene muheemexe efiita anyu ni munakhuma mpaani, nyuwo axinna a oraaru; nwiriyane Ela. Masi mukilaathi paahi mmaale minuutu vakhani. Nyuwo muhaana wa yeenyu. Nyuwo muhaana wa muthukumano anyu. Munnona? Muhihye waakhela ifiita, mukhale ni Yeeyo paahi. Mwaavyaavye Eyo ni Masu moone Eyo yaahikhale oratta-ene. Bibilia ohimmye wira, "Nweheke sothene."

<sup>175</sup> Koosuwela wira ti yoohitthuniwa, Yesu aari siiso, siiso ti waaryaaya Mutthaka, kweekwe. Nyuwo mwaakiphenta okathi



waarwiiyaaka khwaavoniha aretta ni ooriipiwa murima eriyari anyu, mwaahuupuwelela okhala yuulupale, mittitthi suulupale ni oteka ekereja. Vano, Yesu aairale etthu emosaru mpakha nihiku nimoso Owo aahaana ophiyerya Ekeekhai. Nto okathi Owo iiraly'awe, hata miloko mithanu na miili yaahimuhiya Owo. Nto Owo khwaarukunuwela akina, muloko n'aili, khwira, "Ni nyuwo munnitthuna orowa?"

Nto Petru khuhimya moolumo ale oosuwanyeya, "Pwiya, naatthuna orowa woowi, maana Masu Anyu paahi t'akhanle Oohimala?"

<sup>176</sup> Nto Masu a Muluku paahi t'ari Oohimala! Ni mukiphwanyerye nipuro pi nipuro Muluku otonko awe okhalana mutthu aapatisiwe ni nsina "n'Atithi, Mwaana, Erooho Yoowaarya."

<sup>177</sup> Mmurowele Matewu 28:19, "Tithi, Mwana, ni Erooho Yoowaarya," vaavo Matewu ohimme awe wira, "Vano murowe, mwawiixuttiheke atthu a maloko othene, mwaapatisaka mwa Nsina na n'Atithi, Mwaana, Erooho Yoowaarya"? Ni khala mutthu onuupuwela wira "Tithi, Mwaana, Erooho Yoowaarya" nsinaa, eyo enooniherya wira yookhala etthu evonyeiye ni osoma waya. (Vano, wa naxikola a ekalaase ya neethanu nenli waahimeerya eyo mapixipu aniwa *Yeela*.) *Tithi* khanihiyo nsina, *Mwaana* khanihiyo nsina, ni *Erooho Yoowaarya* khanihiyo nsina. Iyo *itiitulu* sintthara *Nsina* (na Tithi, Mwaana, Erooho Yoowaarya), nenlo nikhlanle Yesu Kristu.

<sup>178</sup> Muupuwele, eyo kehiyo mwa onyema, eyo enihimmwa mwa mphento ni mittittimiho sa ereerelo murima, ni mphento ni nlemeliho wa Erutthu yothene ya Kristu weiwo onlattuliwaaka n'axinn'aka a oraaru (ni mulaponi mothene) wira kirwe kilaleye mmuthukumanoni mwaya. Masi miyo nkinihimiyaka eyo kakhala eriyari anyu. Kintthuna kikhale...Voohikhala wira munookivekela mmansinyu, nto kinoorowa oparookiya ni nyuwo ni olavula ni nyuwo mwaha wa yeeyo. Masi ohoolo wa muthukumano anyu, eyo yaamwaatannya. Ti muteko anyu waakhela Muupululo ni orowa wiixuttiha nikoto nanyu, nyuwo mwa makhampusi a nikoto. Miyo kinlavula n'arumeyi. Nyuwo mwaahisuweleke saana, murwe, rowe nikilaathi nitthokelele hoothe. Bibilia ohimmye wira, "Nweheke sothene, nto muthanleke sooreera."

<sup>179</sup> "Ephareya ya eviituru," vaavo waarapihiwa-vo mukuttho...Nto hiyo ninrapihiwa...Oh, muhiliyale eyo, hiyo nnootthikela mwa yeeyo okathi vakhani, "Oorapihiwa ni maasi a Masu." Vano muhaana wiiwa Masu muhinatthi okela mme, okhala wira enamuna emosa paahi mukhanly'anyu omwaattamelaka Muluku, onkhala mwaha wo waamini. Eyo ekeekhai? "Waamini onrwa mwaha wo wiiwa, wiiwa Masu," erapihaka akhili ahu. Kahi wira nikumane ni mutthu, kahi wira

nikumane n'atiithi, kahi wira nikumane n'amaama, kahi wira nkikumane ni mwaana (sothene iyo ekeekhaii, hiyo nnimwiira eyo), masi etthu yoopacerya nirinaahu orwa-wo ephiro ya Muluku wira naattamele; ninoorapihiwa naaiwaka Masu a Muluku.

<sup>180</sup> Mwaha wo waamini hiyo ninneetta. *Mahala*, “etthu Muluku owiireny'aweni.” Ti yeeyo. Nyuwo munimwaamini Muluku, nyuwo munnimwaamini Muluku; nto mulapakaru, mooleveleliwa.

<sup>181</sup> Ntoko kaalavul'aka ni munna mmosa nsana, owo aahitapanyeya vakhani mwa yeeyo, nto miyo khwira, “Nkawehani, munna, mwaahimmyeru etthu wira mwaananarihe moonelo amwaar'inyu, voowaakuva mwaanwoonela othunku, munimunlaseya mwaha wo wira, munoosikula mmurimani mwanyu. Ti yeeyo. Masi muhaana orowa waaleela yeeyo. Muhaana orowa wira, 'Oophentiwa, miyo—miyo kinnoona othunku ohimya ele.' Vano nyuwo muhiiniwa murima voomalela.” Vano, ti siiso ery'aya ni Muluku.

<sup>182</sup> Mutthu aarowa orowa ni wira, “Kihaananariha moonelo aya, khenvirikana hata vakhani, kinimwaaleela wira kinnoona othunku, masi vekeekhai nkinoona,” nyuwo mwa namirima miili. Munnona? Ti yeeyo. Eyo khenkhalakhala yaakheliwaka ni Muluku.

<sup>183</sup> Nyuwo muhaana wiiniwa murima voomalela mwaha wa itampi sanyu. Vano mwasuwela wira muhiiniwa murima mwaha wa itampi sanyu, nto vo “Orukunuxa murima, nto mpatisiwe mwa Nsina na Yesu Kristu wira muleveleliwe itampi sanyu, nto munimwaakhela nlevelelo, munimwaakhela Erooho Yoowaarya.” Moone, vookhweya paahi, Muluku ookhaliha yookhweya.

<sup>184</sup> Va e . . . hiyo ninniweha va “mphareya ya eviituru,” yaalikana ni waaryaxa. Vano, ephareya ya eviituru enthoonyeriwa, enlikanihiwa ni ephareya ya eporonse. Ela ti ephareya ya eviituru, Wirimu. Moise oonale ntoko ephareya y'eviituru khupaka ele yihaniwa “ephareya ya eporonse,” altaari a eporonse, mukuttho wa eporonse . . . altaari a eporonse kiireke.

<sup>185</sup> Moosuwela eporonse etthu enihimyaaya mBibiliani? Ehukhumu. Owo aahipaka enowa ye eporonse. *Enowa* enihimya-ni? Ekanyeryo *y'enowa* yaahimya “etampi emanle olamuliwa,” omatta wEdeni, okathi, “Nxitta nanyu nnoovulaliha muru awe; muru awe onoovulaliha nxitta.”

<sup>186</sup> Nto *eporonse* enthoonyerya “Olamula wa Muluku,” altaari a eporonse, vaavo mukuttho waapahiwaaya; epasiya ya eporonse, vaavo waarapihiwaaya ni maasi a Masu. Munnona? Mo- . . . Eliya, mahiku awe, aahirowa khuweha osulu, khwira, “Osulu ononeya ntoko eporonse.” (Olamula wa Muluku elapo ekhoottiwe.) Oh, wulu! Eporonse, eporonse!

187 Vano hiyo nri “vapasiyani.” Nto nyuwo mooweha epasiya ela yaari yoohikhal’etthu ni yaari yoowooneela ntoko waarya. Mwaha wa xeeni? Ekereja yaahivuluxiwa!

188 Vano, vano, ninniweha ohoolo waya, nnya, okathi masantu a Moohaawani ankhumelelaaya, ninniphwanya-tho yoosareya mooro. Maahisuwela. . . Mwaanitthuna osoma yeeyo? Nirowe mwa Wiisuupulula vano, kapiitulu 15, versiikulu 2, nisome vatthu ninoon’ahu mooro ola wa eporonse emaara ekina. Vaareera:

*Nto kaahoona nlaikha nikina. . . Kaahoona ekanyeryo ekina wirimu, (Khweeli.) yuulupale ni yootikiniha, malaikha mathanu na maili yaarina. . . ihasara thanu na piili sookiserya; okhala wira ti mwa seiyo ommaliheriwaaya oviruwa wa Muluku.*

Vano “oviruwa” wa Muluku. Nwehe:

*Ni kaahoona ntoko yaari ephareya ya eviituru yootakanxeriwa mooro: (Vano, nwehe.) ni ale yaakhuma waaxinttale-aya nxeni, ni elatarato aya, ni ekanyeryo aya, ni nummaru na nsina naya, yeemenle vasulu va ephareya ya eviituru, yaarina. . . atthakare a Muluku.*

*Nto awo yaaniipa nsipo na Moise murumeyi a Muluku, . . .*

189 Oh, munnoona? “Okathi w’ohaawa.” Oh! Munimwaakuva? [Muthukumano onnaakhula, “Nnari.”—Mol.] Vaareera, nwiriyane, nrowe niwehe etthu va.

190 Ninrwa sayi? Nihaana orwa (Ekereja ela y’Amalapo) wa Masu ala, ephareya ya eviituru, maasi, maasi a Masu (Eyo ekeekhahi?), osuwela Masu siiso Awo alempwaly’aya. Vano mukuttho onimwaakheliwa ni osarihiwa Erooho Yoowaarya okhuma muhina, waaryaka oviraka moWaaryani wa okathi uwo. Wa yeela. . . Va Eyo enoorwa okhuma nipuro noowaarya ekelaka va, ekhumaka vattheneerini ekeleka va. Munniiwa saana?

191 Nwehe, vano, woomalelani w’okathi ula, Yohani, okathi woonaly’awe ephareya y’eporonse vale, yaari “yowooneela ntoko waarya.” Yaari exeeni iyo? Masu yaahikumihwi elapo ya vathi, ookuxiwa Mukereja, nto eyo yaari “yowooneela ntoko waarya,” khiyaakhanle-tho Ephome, okathi wa Ekereja waahimala.

192 Vano, mwa Wiisuupulula 15, ale yaahanle a Osuulu wa muthiyana, yaawo yaari atthu ooreera murima a Moohaawani yaavinre Moohaawani, yaahiphwanyiwa (Nkawehani!) yeemenleene vasulu va ephareya. Ni yaari yoosareya mooro, ephome, malumi a mooro elataka, mooro wa Muluku. Awo yaahiphwanya oxintta nxeni (Rooma), nummaru naya, eleetera ya nsina naya, ni elatarato aya (Mwaataano wa Ikereja), ni yaahikhuma. Ni mwaha w’olaleya wa Moise ni Eliya, maprofeta ale anli anrowa omurweela Isarayeli wira yaakumihe i. . .

nikhuru nla n'atthu, masantu ale a Okathi wo Ohaawa, okathi uwo wu onrowa okelihiwa, yaari. . .

193 Moone, Ekereja yookuxiwa vano, masi muupuwele Mwaara ori Veehicensi. Okathi wa Moohaawani. . . Waakhala moomweneni, ota, ni yaahaaruuha mamwene aya othene ni nttittimiho aya ni ovuwa Mmuttettheni. Naphiyaru mwa Wiisuupulula 22, nyuwo munimoona. Mwaalepaka vale yeela ni ovarelela, naphiyaru vaavo munimoona etthu enihimyaahu. Khanirina okathi wo ovara paahi khula etthu yaamukhaani ni osoma osulu ni vathi, masi okwannya mapuro maalupale a yeeyo. Vano nihiku nimosa, khino, Apwiya yatthuna vale, ninookhalana okathi munci-ene wira nilavule yeeyo.

194 Vano, atthu ala ooreera murima a Okathi wa Moohaawani yaakhumelenle, yaahivira moohaawani wuulupale. (Ekereja khenrowa ovira Moohaawani! Munnoona wira awo yaari Moovuwani?) Nto va ari atthu ooreera murima a Moohaawani, ale ooreerihwa yaarina. . . okhalaka wira otthekeka waka ni wawinyu awo ahinatoko aya wiiwa Masu. Vakhala wira yaahiiwa Yaawo khukhootta, anrowa omooroni; awo yaahiriheliwa mw'epiphini okhala wira awo yaahikhootta Masu. Masi vakhala wira awo khanatoko wiiwa Yaawo, Muluku t'axariya, Okathi wa Moohaawani onaarweela yaawo.

195 Vano, nwehe minuutu mmosa paahi. Atthu ooreera murima oorapihiwa ni Masu mamosaru yaawo, okhala wira altaari mmosaru, ephareya emosaru ya eviituru ni Masu mamosaru. Wiisuupulula 2:5, Wiisuupulula 15: (wala kiireke): 2 mpakha 5. Nwehe, minuutu mmosa paahi. Vano, hiyo khinnatoko waaroihela awo Masu, tivo awo yaary'aya—awo yaaryaaya siiso. Hiyo khinnatoko waaroihela Masu, ninoorowa okhalihwa oowaakhula. Tivo khaninrowa owerya waaphwanya atthu othene; Ekereja khenrowa (okathi ula) ele erina Ekeekhai. Okhala wira awo anoorowa ovira Moohaawani, awo kaahiyo Atthu ale ooreera murima akhwiye ottuli wu okathi ule wa ekereja, okhala wira owo ohimye wira "Awo anikhuma Moohaawani wuulupale," ni Ohaawa wuulupale nlelo ori ohoolo, numala Ekereja orowa Owaani.

196 Oh, eyo eri vo! Oh, miyo okisivela! Nwiriyanee! Nrowe nikelele ohoolo vakhani tho, kintthuna koone enamuna xeeni ya Masu awo yaaiwaly'aya. Vano, nrowe nipacerye-tho eversiiikulu 2 ya kapiitulu 15.

*Ni kaahoona ntoko yaari ephareya ya eviituru yootakanxeriwa mooro: ni ale yaakhuma waaxinttaleyaya nxeni, . . . ni elatarato aya, . . . ni ekanyeryo aya, . . . ni nummaru na nsima naya, yeemenle vasulu va ephareya, yaarina . . . atthakare a Muluku.*

197 Vano, moone, awo khayaatonko okela-mo, masi yaahiiwa Masu. Awo yaahiiwa Masu. Vano, nwiriyanee, moone enamuna

xeeni ya Mwiixuttiho awo yaaiwaly'aya, moone vakhala wira eyo ennilikana ni Ekereja vano.

*Ni awo yaaniipa nsipo na Moise murumeyi a Muluku, (Eyo ti, numala Moise olapuwela epannte ekina.) ni nsipo na Mwapwittipwitthi, yiraka, Suulupale ni sootikiniha ti miteko sanyu, Apwiya Muluku Oowerya sothene; (Mwaapwittipwitthi uwo ti pani?) Apwiya Muluku Oowerya sothene; iphiro sanyu ti sa exariya ni sooromeleya, nyuwo Mwene a athu oowaarya.*

198 Munnoona etthu awo yaamusuwenly'aya Owo okhala? Kahi mutthu a neeraru mwa oraaru, masi "Apwiya Muluku Oowerya sothene, Mwene a Athu ooreera murima!" Nwiriyaane! Moolikana? eversiikulu 4:

*Tani ohinrowa owoovani nyuwo, O Apwiya, (A-p-w-i-y-a suulupale, Elohim) ni ovuwiha... Tani ohanle ohinrowa owoovani nyuwo, . . . ni ovuwiha nsina nanyu? . . .*

199 Awo yaarapihiwe ni maasi mamosaru munrapihaniwaanyu vano, wiiwa Masu, ni waamini ni owerya wa Yesu Kristu okhanle Oowerya sothene. Owo ti Muupululo wothene wopaceryani. Etthu yothene eputaputeleiye mwa Muupululo wa Ole okhanle Yesu Kristu, "Muluku aaipanke erutthu eriyari ahu!"

*. . . Suulupale ni sootikiniha ti Nsina nanyu, . . .*

*Tani ohinrowa woova . . . ni ottittimiha nsina nanyu? nyuwo . . . mwa . . . maana nyuwo paahi muri ooreera murima: tivo maloko othene animoorwa okokhoro ohoolo wanyu; okhala wira ikano sanyu ti soowooneya.*

200 Mwa moolumo makina: Ninoona ele enihimya ohaakhela Awo, ikano Sanyu ti soowooneya. Tivo hiyo neemenle va, hiyo noorapihiwa vano, ninrapihiwa ni maasi nuumala ovira Okathi wa Moohaawani. Hiyo ninnikhalaka ooromeleya wa Nyuwo ni noowaaminini Nyuwo, nto vano neemenle vasulu va ephareya ya eviituru, ni ninnoottittimihani ni woovuwihani Nyuwo ntoko eyooniheryo ya Erooho Anyu Yoowaarya. Ni mithuko Sanyu ti s'eekekhai ni ikano Sanyu ti sa exariya.

201 Oh, wulu! Naamuwerya okhala esumana emosa mwa yeeyo. "Opatiiso wa Erooho Yoowaarya," nrowe nikwerethe etthu va vano, minuutu mmosa paahi, kookhalana etthu kintthun'aka wira kikwerethe. Vano, nrowe . . . nihinkuxeryani paahi ele vo vaavo varyaahu.

202 Vano, naweha vale, va eri elatarato yuulupale. Vano, va nri nipuro Noowaaryaxa. Vaareera. Va nri nipuro noowaarya. Ni va ti voopacerya, ehinatthi ophiya vale, eri e—ephareya.

203 Vaareera, vano nwehe. Hiyo nimmwaattamela sayi Muluku? "Waamini onrwa mwaha wo wiiwa, wiiwa Masu a Muluku,"

anooniheriwa okhuma nipuro Noowaaryaxa wa namitthaka a okathi.

204 Ottuli wu, ni wira. . . Mpaani moolompa mwa Salomoni, yaanivaha eyooniheryo, mithuko iye sooniherya waarya wa vapasiyani vale ya eporonse. Tivo, *va*, nlaikha na okathi wa ekereja ninooniherya mmaasini mme ole okhanle Mutth'ula *va*, ooniheryaka omoriwa Wawe ikharari, Masu Awe, olamula Wawe, Nsina Nawe. Sothene sinooniheriwa muhina mu memmo munivalaanyiwaanyu mwaha wo waamini Yaawo. Munniiwa saana?

205 Nwehe moota ela ereeralyaaya *va*, hiyo naalavula yeeyo nihiku nikina. Nwehe *va*, *va*, "Tivo nikhalihiwaka naxariya, ookhalihwiwa naxariya mwaha wo waamini." Vaareera, *vaneeni*, nuumala orapihiwa, "ooreerihiwa." Vano, *nto*, "oosarihiwa Erooho Yoowaarya." Okhalihwiwa naxariya, oreerihiwa, opatiiso wa Erooho Yoowaarya! Munnoona yeeyo? Waari sayi Mutthaka Awe? Okhalihwiwa naxariya mwaha wo wiiwa; oreerihiwa t'ile eniir'anyu; ni wa ele mwiiralyaanyu mwaha wo oxukhurela yeeyo, Muluku ohootthittani ekanyeryo ni Erooho Yoowaara.

206 Vano, nyuwo, munn'aka muPatista, kintthuna kookoheni etthu emosa. Nyuwo muniira, "Exeeni-tho Abrahamu aakhanly'awe wiiraka woohikhala omwaamini Muluku? Nto Muluku khumukhalaha naxariya."

207 Ti yeeyo tu owo aawery'awe wira, vaava *va*, Owo aahimwaamini Muluku. Masi Muluku, wira okupali waamini wawe, aanvanhe ekanyeryo ya olyihiwa masoma khimutthitta ekanyeryo, ooniheryaka wira Muluku aahaana o- . . . aahikupali waamini wawe. Nto nyuwo mwaahimyaka omwaamini Muluku, nave khimunatoko otthittiwa ekanyero ni Erooho Yoowaarya. . . aEfeso 4:30, nyuwo mwaathuna vale olepa, aEfeso 4:30, "Muhiriipihe murima Erooho Yoowaarya ya Muluku yeeyo mutthittiwaanyu ekanyeryo!" Ni khamunthittiwa ekanyeryo mpakha mwaakhele Erooho Yoowaarya.

208 Eyo enkhalaha mpakha liini? Mpakha muhakalaliho ontharelana? "Mpakha woopoliwa wahu, Nihiku nenlo no woopoliwa." Khiivo enamuna yo wiihuluxa Eyo. Khamunwerya wiihuluxa Eyo, okhala wira Eyo khenrowa wiihuluxa nyuwo. Munnona? "Okhala wira mootthittiwa mpakha Nihiku no woopoliwa wanyu." "Khiivo hat'etthu y'ohoolo, hat'etthu ya vano, soowoopiha, etala, ntthona, okhwa, wala hat'etthu, enwerya onimwalaniha ni ophenta wa Muluku ori mwa Kristu." Paulo ohimnye wira, "Miyo kookupali mara yeeyo!" Eyo eri vo! Eyo eri vo, mootthittiwa ekanyeryo mpakha Nihiku no woopoliwa wanyu.

209 Nwehe, enniniruuha wa yookiserya—Ettiminku yookiserya emaara ekina. Kookhalana okathi? Miyo paahi. . . Nwehe, nwehe

ela, erooho...erooho, munepa, n'erutthu. Vaareera, moone: erutthu, munepa, erooho.

<sup>210</sup> Vano, mukihye kittikitthe ele koopakeleni etthu va. Vano, kinrowa okweretha etthu va, nkaakhalanne okathi wo okweretha Ettiminku evinre vano kookhalana yookwerethiwa va yoomi vanipattuuxani va na epaphelo ya ncano. Kintthuna wira mulepeke nto munoowerya woona enihimy'aka, vano, nyuwo murina ilaapi sanyu. Vano, *ela* erutthuu; ni *ola* munepa; nto *ela* ti (elepeliwo yuulupale E-r-o-o-h-o) Erooho, Erooho Yoowaarya. Vaareera. Vano, ti yeeyo epakaniwaahu.

<sup>211</sup> Nyuwo mwaweha vale *va*, nipuro noowaarya, nipuro Noowaaryaxa; *va* altaari, nipuro noowaarya; nto *va* ephareya—ephareya, ti vaavo nyuwo muniw'anyu Masu, “Waamini onrwa mwaha wo wiiwa, wiiwa Masu,” ovalaanya, ephareya ya ovalaanya, ephareya ya ovalaanya. Vano, nwehe ela. Vano, eri evolowelo emosa paahi yo ovolowana *mu*, nto eyo ti wii muhaana orwa *va* toko. Eyo ekeekhahi?

<sup>212</sup> Vano, kaanithuna kaarina opuro, kaamuhela *va*, “a—aharusi.” Okathi ni... “Niira na Othelana,” mukina. Munnoona moota mulopwan'ola aakenlyaawe *va* Oniirani na Othela, ni owo aarwiiye mwa enamuna ekina? *Va* waari Mukhora. Yesu ohimye wira, “Miyu ka Mukhora.” Nto meesa ala a woohelani yaapwehiwe *va* n'atthu othene yaakilaanthe erukurenrye, nto va aari mulopwana mmosa nno ahaarina Ekuwo ya Niira owanrene. Nto okathi Mwene okenly'awe, Owo iirale, “Mphin'ye sayi va, mpatthani aka? Nwenrye sayi ovolowa mu?” Eyo yooniherya wira khaavolonwe aviraka Mukhora ola. Owo aavolonwe vacanelani wala epantte ya wiithela, wala mwa eyaaminelo wala muromolelo. Owo khaavolonwe aviraka Vamukhora!

<sup>213</sup> Okhala wira ale a khalayi a onikhuma nsuwa nlelo aakhalana etthu emosaru, mutheli onrowa othela, owo onoolattula ni onimwaavaha ikuwo atthu othene owo aalattunlyaawe.

<sup>214</sup> Oh, moota murim'aka onrukureryaaya n'urukurerya kuupuwelaka yeeyo! “Khaavo onwerya orwa wa Miyu ehikhanle wira Atithi Aka anoomulattula toko, ni othene ole Atithi akivahaly'aya onimoorwa wa Miyu.” Niihaniwe sayi hiyo? Ohinatthi opattuxiwa olumwenku masina ahu aheliwe muLiivuruni mw'Ekumi ya Mwaapwittipwitthi, wira noone Waarya, wira naakhele Erooho Yoowaarya, wira neetteke Memmo. Masin'ahu (okathi Mwaapwittipwitthi iivw'awe) aheliwe muLiivuruni okathi mmosaru Nsina na Mwaapwittipwitthi niheliwaaya memmo. Biblia, hiyo nnoophiyerya yeeyo okathi vakhani, ohimye wira, “owo aahiwootha othene mulaponi yaawo masin'aya ahilempwe muLiivuruni mw'Ekumi ya Mwaapwittipwitthi okhuma opattuxiwaka-ru olumwenku.”

215 Nwehe, nto vakhala wira owo . . . mutheli mwaneene, okathi owo eemela-awe vamukhora. Nto mutthu aamuruuha epaphelo yo olattuliwa, khwira, “Ela eri va.”

216 “Kooxukhuru.” Owo aakuxa epaphelo yo olattuliwa, khupweha vathi va, khunwariha yoowo ekuwo wira othene yooneyeke oolikana. Okisivela yeeyo! Munnona? Mwa owerya wa Muluku, Mukereja ya Muluku mukumi, thaaciri, masikhini, epottha, ootaphuwa, ooriipa, mukunya, ookhwila, a ncano, othene anooneya vamosa maana awo awarihiwe ni Owerya omosaru wa Erooho Yoowaarya. Munnona?

Vano, eyo yaahooniherya wira owo khaavolonwe aviraka Vamukhora.

217 Vano, nwehe va. Oh, mutthu eerenrye-ru ovolowa nipuro Noowaryaxa (mutthu, mwiixuttihi a Bibilia akileele), mutthu aapacerya ovolowa nipuro nla Noowaryaxa ahivinre va, owo aamookhwa. Mwaana a Aroni aahikuxa mooro woohireerhiwa nihiku nimoso, mooro mmosa wa muromolelo (okathi Ole wahaaryaaya mooro wa muromolelo), nto awo yaakhwiiye vamukhora. Eyo ekeekhai? Ahiiso aana a Eli yaari yaawo, kookupali. Aana a Eli yaarookelihiwa mpaani, okathi eyo yaathonyeryaaya aana a Aroni yoowo aari namukuttho.

218 Vano, vano, yookhala enamuna emosa yo okela mw'erutthuni. Erutthu ila eneettiheriwa sayi? Vano, nwehe oratta-ene vano ni mukhalane ilaapi sanyu soolikana. Va ori mukhora epant'ila onvolowa mw'erutthuni: mmosa, miili, miraru, mixexe, mithanu. Vano, mookhalana eyo yookwerethiwa? Vano, mukhora woopacerya va ti: woona, wunkhela, wiiwa, ni esivelo, wiimurya, wiiwa, ni esivelo ni okwannya wala waapapela (khula emosa enkhalo, khiva mulattu). Vano, iyo ti miyoonelo mw'erutthuni. Eyo ekeekhai? Akavi answela yeeyo? Miyoonelo mithanu na mosa sineettiherya erutthu. Vano, hiyo nookhalana munepa vammalaanyu ovira mwa yeela. Miyoonelo siri ota, eyo enamuna ya ota.

219 Vano, muhina mu sookhala mmosa, miili, miraru, mixexe, mithanu, mikhalelo mithanu mmunepani. Vano, muntthuna olepa? Woopacerya otthokelela, otthokelela. Wa nenli osuwela. Nto waneeraru wuupuwela. Nto wa neexexe ankhili. Nto wa neethanu ophenta.

220 Vano, moolepa sothene? Mwahilepe, mukileele vano. Mookhalana sothene soolempwa? Woona, esivelo, waapapela, wiimurya, ni wiiwa; erutthu, eyo ti ivolowelo sa mw'erutthuni.

221 Munepa ti otthokelela, osuwela, wuupuwela, ankhili, ni ophenta, ti miyoonelo wala mikhalelo, ntoko miyoonelo sa munepa. Nto munepa ti mukhalelo wa erooho ori muhina, okhala wira munepa onkumiherya paahi mukhalelo wa etthu eri muhina mwanyu. Onkuxa nipuro na oreerhiwa, munepa,



onkhala mmuxovoni mmosaru vale. Vaareera, vano, khula...  
 athhu othene aalepa eyo yothene? Vaareera.

222 Vano, wa mukhor'ola ori mmosa paahi, mukhora mmosa, onihaniwa "otthuna mmansawo." Nyuwo mwa mukhulupale a etthu enkela mmo. Nto eyo eniira exeeni? Exeeni ila? *Erutthu* ehaana orapihiwa, epasiya; oreerihwa, *va*; osarihiwa ni Erooho Yoowaarya, *va*, nto ela enikhala ehice ya ophuka wa Muluku tho, vaavo Muluku onkhala-awe mmurimani mwanu, nto nyuwo mwaira etthu yoonanara, muniira, "Ooh, wulu, kiihira yoonanara."

223 Athhu kamosa-kamosa aniira, "Khenkilamula miyo o—owara maihi ookhuveya," athiyana. "Khenkilamula wiipintari makwarikhwa wala wiitho, wala etthu p'itthu. Khenkilamula orowa moowiinani. Khenkilamula ohimya yoowooha ekhaani yoohtakhala. Khenkilamula ottikha iturufu vaniirani vaka na iturufu." Moosuwela mwaha wa xeeni? Khamurina hat'etthu wira elamule. "Eyo khensikuliha muupuwelo aka." Nyuwo khamurina muupuwelo ntoko enowa ehirinaaya ikhootwa. Tivo nyuwo paahi. . . Khamurina hata muupuwelo, kiiivo hat'etthu vo wira yoosikuliheni. Nyuwo mwa a molumwenkuni!

224 Masi miyo kinnootharimulani wira mmuhiye Yesu Kristu avolowe *mu* nto mweererye wira emara emosa! Munna, munookhala oolamuliwaxa munrowaanu okhuma ni otatha muru anyu wa etthu iyo vekeekhaixa ntoko siryaaka keemenle va, okhala wira Owo t'owaarya. Nwiriyaane, kinihimya Yoolempwa, "Mwaaphentaka itthu iyo sikhanye olumwenku, itthu sa molumwenkuni, okhala wira ophenta wa Muluku hata khokhanle mwa nyuwo."

225 Yiireiye sayi? Otthuna mmansinyu. Xeeni mwaarowaanyu wiitthana eyo 'otthuna mmansinyu,' Munna Branham?" Okhala wira enimukhaliha-tho mulopwana ni muthiyana siiso ntoko Atamu ni Hawa omatta wEdeni. Mwa xeeni? Miri miili! Otthuna mmansinyu, *ola* mmosa okhwa. *Ola* mmosa Ekumii, otthuna mmansinyu. Ohureya. . . Otaphuwa wa othanla! Muluku aamuhenle mutthu oopacerya, Atamu ni Hawa, vaava va mwa otaphuwa wa othanla. Owo onoohelani nipuro nimosaru. Nto enamuna emosa paahi mukhanly'anyu olokikhaka ela muhina *mu* onkhala otthuna wanyu mmansinyu. Aleluya! Otthuna mmansinyu! Muhaana otthuna wira Otthuna wa Muluku. Nyuwo muhaana wiituluxa otthuna wanyu mmansinyu wira muhiye Otthuna wa Muluku okele, maana ela ti evirelo emosa paahi eneettiherya mmurimani.

226 Oh, nyuwo pooti witakaniha mukereja, nyuwo aPatista ni aPrespiteriyaano. Ni nyuwo aMetotista ni Anawetta a Osantu pooti orwa mooreerihwani. Masi muhaana otthuna wira Otthuna wa Muluku, otthuna mmansinyu, ohiya Erooho Yoowaarya okela *mu*, wira ekumiherye. "Ithoonyeryo iya

sinimwaatthara ale anrowa waamini. Mwa Nsina Naka anoowoomola axetwani. Awo *anoolavula* ilavulelo isya. Anoowiixaatherya matata aretta wala anoowurya itthu siniva, ni sikina. Ithoonyeryo iya sinimwaatthara ale anrowa ohiya otthuna waya okhala Otthuna Waka, ni miteko sinvar’aka nave-tho awo anoovara.” Kinroromela wira khamunihaleela Eyo. Wookhala otthuna wo wira Otthuna wa Muluku. Munnoona entthun’aka ohimya?

<sup>227</sup> Nwehe va, olavulaka mwaha wa nipuro noowaarya, epasiya. *Va* ori waarya, mithuko (mmosa, miili, miraru, mixexe, mithanu, mithanu na mosa, mithanu na miili), khula mmosa wa seiyo wookhalana waarya. Iyo simphwanya vayi waarya waya? Waarya waya onoonihereya vayi, Owo onoonihereya vayi? Khonoonihereya va vanloothoni mwa muromolelo mmosa. Owo onoonihereya ottuli nno mwa Masu! Awo maasi oovalaanya. Whish!

<sup>228</sup> “Wira orukunuxa murima n’uleveleliwa itampi” (Luka 24:49) “waahaana olaleeriwa mwa Nsina Nawe maloko othene, okhuma oYerusalemu.” Orukunuxa murima ni oleveleliwa itampi waixuttihewe sayi oYerusalemu? Mpakha vayi? Owo ohaana orowa molumwenkuni mothene. “Murukunuxe murima,” ohimye ti Petru, mwa Miteko 2:38, “mpatisiwe ni Nsina na Yesu Kristu wira muleveleliwe itampi sanyu.” Mutthak’owo ori wira orowe mulaponi mothene, vano nto emalelo enimoorwa. Vano emalelo enookhala, nuumala Mutthak’*ola* orowa mulaponi mothene.

<sup>229</sup> Moota xeeni, mithuko iya va sinooniheryaaya waarya muromolelo Metotista, Prespiteriyaano, wala wa Pentekosite? Ahe, vekeekhai nnari!

<sup>230</sup> Eyo enooniherya *va* ntoko ole “MIYO KOOKHALA,” kahi “Miyu kaakhala.” Kahi atthu araru wala axexe oovirikana, masi Muluku okilaanthe-ene vale aisooniheryaka Mmansawe wa khula emosa wa ikereja iyo. Nwehe ottuli iwe moone etthu awo yiiralyaaya (ninoomalaru ovira mwa wahala owo), awo yaamooniherya Owo ntoko Owo saary’awe, ntoko Owo siryaawe, ni ntoko Owo sinrowaawe okhala okathi wothene.

<sup>231</sup> “Ole aari . . .” Yohani amalakaru wona Eyo, owo iirale, “Ole Aakhala, ole Onkhala, ni Ontthuna Orwa, Muluku Oowerya sothene, opattuxa wa Muluku, Alfa, Omeka, Ephattu ni Emalelo.” Iwo ti Waarya w’ekeekhai wira woonihiriwe. Munnona Yoowo? Amen! Whish!

<sup>232</sup> Soovira iwoora muloko ni piili, nto miyo—miyo kihaana . . . Nwiriyaane, nrowe naakuve wira mulepe paahi. Okinanara woopisihani vanci-ene, masi nkisuwenle liini onrowaaka owoonani-tho. Munnona? Ni kintthuna wira musuwele ela, apatthani, ela Ekumii. Vano, nkawehani, nkinihimya wira mwaha wo wira miyo kinoohimya Eyo. Vakhala wira miyo—miyo

kinooniherya muthinto yoowo wa...nto miyo ka...nyuwo—nyuwo khamunsuwela saana murim'aka. Miyo nkimpavela wooniherya, “Oh, ela paahi ti...Nyuwo khamuhiyo hat'etthu.” Miyo nkineererya wira yeeyo. Vakhala wira khimwaakhenle Waarya, kimpavela woothoonyeryani Mmosa va. Kahi ole ori vapulpitu va, Ole vale Veehiceni vale. Nto Ehice ele ehaana ophierya okhala mmurimani mwanyu, vano munimoona vekeekhai etthu emosaru enoonihereya va.

<sup>233</sup> Exeeni *ila* osulu nno? Eyo enooniherya *Ela*. Nto *ela* t'Ila, Masu. Oorapihiwa ni maasi a Masu, ni Masu; oorapihiwa (mwa maasi oovalaanya) okhuma itthu sa molumwenkuni—olumwenku, ni Masu. Masu anihimya wira Owo mmosaru nsana ni mahiku othene. Awo khanihimya wira, “Owo mmosaru okathi wa Pentekosite, ottuli mw'awiixutti, vano nto okathi wootharelana Owo oorukunuwa.” Nnari, Owo mmosaru! Munnona? Khamukhanle wiirihaka Awo ohimya hat'etthu ekina. Naamuwerya paahi okhala mwa emosa paahi wa itthu iyo mwa iwoora, masi kinroromela wira nyuwo munnivara Eyo vano. Muluku oowiihanani, munimwaakhela Eyo. Ti yeeyo kinaamini aka. Vaareera, mulopwana.

<sup>234</sup> Vano, exeeni iyo? Okhalihwiwa naxariya, oreerihwiwa, opatiiso wa Erooho Yoowaarya; munepa, erutthu, erooho; sothene imosaru. Vano, muthuko onooniherya Masu. Masu eekeekhai anooniherya exeeni? Exeeni muthuk'ola, vaakhanle wira waaphwanya woonihereya waya okhuma Moovuwani wa Shekinah mu? Waarowa wooniherya Ovuwa wa Shekinah. Eyo ekeekhai?

<sup>235</sup> Vakhala wira mwaakhenle oseminaariyu, waarya wanyu, munimooniherya eseminaariyu. Mwaakhela oseminaariyu ya oMetotista, munimooniherya Emetotista. Munimooniherya! Mwaakhelaru oseminaariyu ya Pentekosite, munimooniherya Epentekosite. Masi nyuwo mwaakhela-ru Yoowo Moovuwani mwa Muluku, vamwiiwani woovarela... .

<sup>236</sup> Vano, okathi Moise okhumaly'awe Ohoolo Wawe, owo aahaana ohela etthu owiitho wawe, tivo, atthu khayaawerya hata onweha. Eyo ekeekhai? Owo aahisareya owerya wa Muluku.

<sup>237</sup> Sitefano, mutthu oosareya Erooho Yoowaarya. Weererya omweemexa, vano, waari ntoko weererya ottipiha empa, nihiku na ettheke epattaka; ottipiha mooro...ni empa epattaka mooro nihiku na ettheke. Oh, vanci-ene awo—awo waatep'aya wiiseela, owo waamutepa. Vano, khimwaawerya omweemexa owo. Naanaanoru, okathi yaamuruuhalyaaya Mpwaro wa Ahumu, Bibilia ohimye wira, “Owo eemenle vale, aakhala ntoko nlaikha.”

<sup>238</sup> Vano, nkinoona wira “nlaikha” naahimya wira owo aari Ookhala mmosa Eemenle vale; masi, nlaikha ninnisuwela orattane etthu nnihimyaaya. Ti siiso khula nlaikha, namitthaka

a okathi wa Ekereja, khorina y'otthika ni woona etthu eseminaariyu enuupuwel'aya. Owo onnisuwela etthu Muluku ohimmy'awe mBibiliani mw'Awe, ni owerya onooniheryaawe wira olipiherye wira Owo mmosaru nsana, olelo, ni mahiku othene. Owo khonoova, owo onihimya voolikana-ene etthu ensuwel'awe okhala Ekeekhai. Nto Muluku eemenele-ene vaavale olipiheryaka Eyo ni muthinto mmosaru wa ithoonyeryo ni mitikiniho, vano ni Masu mamosaru. Nlo nlaikha!

<sup>239</sup> Sitefano eemenle vale, khwira, "Kosuwela etthu enihimy'aka." Khwira, "Nyuwo oolipa murima ni oohinnuwihwiwa mmurimani ni mmaaruni, okathi wothehe munikhootta Erocho Yoowaarya. Ntoko siiraly'aya axitiith'inyu, siiso nyuwo muniir'anyu!" Khwira, "T'ani w'axitiith'inyu yahaawiivale maprofeta vano khwaatekela ikhapuri saya?"

<sup>240</sup> Nyuwo miromolelo, t'uvi wa nyuwo ohinre etthu emosaru? Munnona? Oteka ipa suulupale sa ixiri sootteela ni ipa s'alipa-ookhwa ni itthu nno, vano nto olavula sa Muluku! Nyuwo mwa yaawo mmuhenle Owo mpaani mwa alipa-ookhwa, nyuwo mwa yaawo mmuhenle Owo mukhapurini. Eyo ti etthu ene yaamuhenle Owo mukhapurini ottuli wu, yaari ekereja ya empa yuulupale yootteela, muromolelo, aFarisi ni aSatukhi yaamuhenle Owo mme vano nto khuneererya oteka eyuupuxeryelo ya Yeeyo.

<sup>241</sup> Mukihiye kooleleni wira Kristu ti Ookhala mukumi. Owo kahiyo etthu ekhwiye, Owo Etthu emosa "ohihimunwe mwa alipa-ookhwa ni mukumi voohimala-tho." Oh, munna! Vekeekhai! Eyo eniira exeenii? Ennooniherya exeeni? Enooniheriwa okhuma va, yaarowa okhala exeeni iyo? Eyo yaarowa wi- . . . T'evi ekhanle eyooniheryo y'ekeekhai ya Yoowo? Vano etthu yoopacerya yaarowaaya wooniherya, naarowa okhala Nsina Nawe. Eyo ekeekhai? Eyo yaarowa wooniherya Nsina Nawe. Etthu enttharelana enooniheryaaya, waamukhala owerya Wawe. Munnoona entthun'aka ohimya? Eyo yaamooniherya sothene Owo okhanly'awe.

<sup>242</sup> Vano vakhala wira *ela* enooniherya wa okathi ula *va*, itthu sothene Owo aary'awe, nto Owo mmosaru! Wawu, ovuwa! Ovuwa! Exeeni iyo? Eyo enimooniherya Owo ntoko Owo saaryaawe, ntoko Owo siryaawe, ntoko Owo kweekwe onrowaawe okhala, okhala wira enrwa ekhumaka Veehiceni va Muluku; Yesu Kristu mmosaru nsana, olelo, ni mahiku othene; Muluku mmosaru, Owerya omosaru, Ovuwa omosaru, sothene imosaru. Owo mmosaru nsana, olelo, ni mahiku othene. Oh, munna!

<sup>243</sup> Nrowe nikelele-tho ohoolo vakhani paahi. Vano, nrowe nikuxe ele ehanle ya eversiikulu 6 ila va, ya kapiitulu 4. Kihaana soohimya kamosa-kamosa silempwe va ya yeeyo, ni kinthuna kaakuve kimalihe kawerya vale. Vano, e—ekina,

numala okhuma ekap- . . . numala okhuma eversiiikulu ila, eyo enoorukurerya paahi, ehimyaka etthu awo yiiralyaaya. Nrowe noone vakhala wira ninoowerya omalela vaavo.

. . . *eviituru* . . . *ephareya ya eviituru* . . . (Vano, hiyo noosuwela ele yaari iyo.) *eriyari ya ehice*, . . .  
Soopattuxiwa *xexe* sikumi, *axinama* . . .

<sup>244</sup> Vano, vano, akavi arina etaphulelo yoowuuluuliwa ya Bibilia? Mw'etaphulelo anyu yoowuuluuliwa, enihimya "Soopattuxiwa sikumi." Ahe, miyo kaaniikoha moota King James ula va ohimmy'awe wira sikumi. . . yaari "*axinama*" axexe? Ahe, kaahiphwanya a Ekreku—otaphuleliwa wa moolumo a Ekreku, ni kirowela otaphuleliwa wa moolumo a Bibilia khoona etthu eyo yaahimyaaya. Vano, va t'ile ekhanle. Vano, nwehe oratta-ene. Nuulumo nitaphuleliwe va, vano nyuwo mulepe wira mwaavyaavye, nave, wira mukupali. Moone, kintthuna wira mulepe ele enihimy'aka, ni . . . mwawerya vale ni mwatthuna vale. Vaareera, etaphulelo yoowuuluuliwa eniira, "Soopattuxiwa sikumi," mwa yeeyo. Vano, nwehe:

*Nto . . . mmo . . . yaahikhala axinama axexe oosareya maitho ohoolo ni ottuli.*

<sup>245</sup> Nto eyo enkelela ohoolo khunaahimya "*axinama*," yeeyo enrowaahu ophiyerya muhina mwa minuutu mmosa. Vano, *enama* va ennooniheriwa. Muhaana osoma wa mukerekhere mBibiliani mwanyu, mwaha wa—mwa *axinama*? Mwaarina-ene, murowe moosmani wa mukerekhere. Kinniweha wira Totori Scofield va ookweretha mw'awawe. *Axinama* enihimya, owo ookhalana va, enihimya, "Soopattuxiwa sikumi." Oh, wulu! Vano, nwehe. Nuulumo na Ekreku vo yookhala, "Z, o piili, m" . . . ahiiso "Z, o piili, n" ti, "Z, o piili, n." Vano, mu—mw'Ekereku, eniihaniwa Zoon enihimya "Yoopattuxiwa."

<sup>246</sup> Vano, kahi siiso . . . mwaatthunaka osoma naanaano va. Khanirina okathi. Kaarowa osoma, masi nkirina. Mulepe Wiisuupulula 11, 13, ni 17. Vano, vaavo *enama* varyaya, ikapiitulu mwa Wisuupulula 11, 13, ni 17, eniihaniwa *axinama* enamuna emosaru; masi *axinama* vo, otaphuleliwa ti "t-h-e-r-i-o-n," therion. Nuulumo, nuulumo n'Ekreku *therion*, nenlo nnihimya "enama, ya mutakhwani yoohixintteya." *Therion*, yeeyo enihimya "enama ya mutakhwani, yoohixintteya.":

<sup>247</sup> Masi Zoon enihimya "Yoopattuxiwa," moone, "Soopattuxiwa xexe (Zoon) sikumi." Kahi *axinama* a "mutakhwani," *therion*; masi, "Zoon, Soopattuxiwa sikumi."

<sup>248</sup> Nto *therion* ti "ya mutakhwani, yoohixinttiwa yoowali." Mwa moolumo makina, mwawehe vale kapiitulu 11, "enama ya oRooma." Kapiitulu 13, "Estadu Unidu." Ekapiitulu 17, "soopiili Estadu Unido ni Rooma," sa ikereja sa muromolelo soolipihereya ni Ekatolika ennaakhaliha oohirukunxeya murima, oohixintteya ni Ehapari yooereera. Whish! Oohixintteya!

249 “Attotopeliwe Muluku, hiyo nnoorwa nikhumaka ekereja yuulupale Metotista, Patista, Prespiteriyano, muromolelo wa Pentekosite. Hiyo noosuwela etthu enihimy’ahu! Khaavo onihoolela...onrowa onileela!” Eyo eri vo. Oohixintteya! Oohirukunxeya murima! Atthu oohiphenta! Oohaataniheya! Oowootherya akhw’aya! Oohisuumaaliha! Ni oowaathanya ale ooreera murima! Yooneyaka ntoko o . . .

250 [Nipuro vahiitthu mufiitani—Mol.]...nnimoona yeeyo naanaano. Nto waamukisivela okhera etthu iyo kapattikapatti naanaano va, masi miyo...wira ekele mufiitani mu, khula enamuna. Masi khanirina okathi wo wira. Vano, nyuwo munniwa saana. Akavi aniiwa oratteene? Mwiire “Amen.” [Muthukumano oniira, “Amen.”] Moone, ala ari . . .

251 Exeeni ekhanle Zoon, Z o piili n? Soopattuxiwa sikumi. Pooti oromoliwa Zoon, Z, o piili, n. Mwaarowa oromola sayi yeeyo, “Zoon”? “Zoon,” miyo kaamwiira.

252 Ni *therion* ti t-h-e-r-i-o-n, *therion*, moone. Tivo eyo enihimya “axinama oohixintteya, a mutakhwani, oowali.” Eyo t’ile axinama awo . . . Mukuxe yawinyu . . . Mukuxe otaphuleliwa wanyu wa moolumo a Ekreku murowe moone nlo nahaakhanle nuulumo nimosaru. Nwehe mmo moone. Mukuxe yawinyu—mukuxe eliivuru anyu ya soosoma ya Ekreku, mukuxe Emphatic Diaglott anyu. Vano, musuwele eyo yahaakhanle ekeekhai, wira eyo ekeekhaii, wira enihimya “enama yoohixintteya,” mwa Wiisuupulula 11, 13, ni—ni 17.

253 Nto va mwa Wiisuupulula 4, enihimya “Yoopattuxiwa ekumi,” kahi *enama*; masi eniihaniwa “enama” masi kehiyo. Etthu emosaru mwa Ezekiyeli 1:8, 1 mpakha :28, ti yeeyo. Khino niphiverye yeeyo muhina mwa minuutu mmosa.

Vaareera, “Oohixintteya, oohirukunxeya murima, enama ya mutakhwani.” Yoohixintteya!

254 Masi *iya* ti “Soopattuxiwa sikumi.” Awo axeeni? Awo kahiyo Malaikha. Moosuwela, nrowe nisome Wiisuupulula 5, wiithela wa nikukhu. Wiisuupulula 5, versiikulu 11:

*Nto kaahiweha, ni . . . kinaiwa nsu na malaikha manci-ene* (“malaikha,” oowaatta) yaarukurenrye *ehice* (“Ni” eyo etakanxo.) *ni axinama ni . . . mahumu: . . .*

255 Moone, “ni,” etakanxo. Munnona? Awo khayaari Malaikha, nnakhala mahumu, iyo saari “Soopattuxiwa sikumi” Veehiceni. Oh, khenosivelani yeela? Soopattuxiwa sikumi! Awo kahiyo Malaikha, okhala wira ela ennooniherya vaava va, moone:

*. . . kaahiweha, ni . . . kinaiwa nsu na malaikha manci-ene* erukurenrye *ehice ni axinama ni mahumu: . . .*

256 Vano sookhala mixovo miraru soovirikana va. Kinroromela wira nyuwo othene mookhalana enamuna ela va vano. Vano, kintthuna kiwooniheriyeni. Sookhala mixovo miraru

soovirikana sa yeeyo, ikhalelo tthaaru soovirikana (Vano, nwehe.) sirukurenrye Ehice.

<sup>257</sup> Va eri Ehice. Vano, yoopacerya Veehiceni va ti Soopattuxiwa xexe sikumi. Voohiya eyo aakhala miloko miili ni maxexe (ntoko so) mahumu ekilaanthe vasulu va ehice, vasulu vāya—ihice saya, ihice sikhaani mukhitte. Nto voorukurerya yeela, sookhala mittitthi suulupale sa Malaikha sirukurenrye Ehice. Munnoona entthunaaka ohimya? Awo othene t'ovirikana, mmosa ni mukhw'awe. *Aakhala* Malaikha; *va* ari mahumu; nto *va* siri Soopattuxiwa sikumi.

<sup>258</sup> Nrowe nihikhume mwa yeeyo minuutu mmosa. Nrowe nikhale vaavo minuutu mmosa, "Soopattuxiwa sikumi." Axeeni awo yaahikhale Malaikha, yaahikhale athhu avuluxiwe? Axeeni awo? Mwaanitthuna osuwela? Va t'ori otaphulela waka. Kinroromela wira ti woolikana; kookupali wira ti siiso. Awo makwarta a Muluku a Veehiceni Vawe. Vano, ninrowa ottikittha ela okathi vakhani paahi. Vano, moone, awo—awo kahi Malaikha nnakhala athhu. Awo khahiyo axinama a mutakhwani. Iyo ti Soopattuxiwa "Soopattuxiwa sikumi."

<sup>259</sup> Vano, *va* eri Ehice ya Muluku. Nto *ala* makwarta Awe. Nrowe nisome vakhani paahi yeeyo wira nisuwele muhina mwa minuutu vakhani. Moone, awo Malaikha a Muluku ahiiso makwarta a Muluku a Veehiceni Vawe, ni awo...Nrowe nikuxe...paahi—minuutu mmosa paahi, nrowe nitthikele mwa Ezekiyeli. Miyo—miyo kookhalana itthu iya silempwe va, ni miyo okinanara ovira vasulu, koosuwela wira ela e...[Nipuro vahiitthu mufiitani—Mol.] Nrowe nitthikele mwa Ezekiyeli kapiitulu 1, nipacerye versiikulu 12 mpakha 17, minuutu mmosa paahi.

*Nto khula mmosa etta orowaka ohoole:...*

<sup>260</sup> Vano, ninrowa oweha minuutu vakhani...Ni nyuwo muupuwele versiikulu 7 ila va, vano, nwehe etthu awo yaalikananaaya va muversiikuluni 7 ya ekapiitulu emosaru ya Wiisuupulula, "axexe awo."

*Nto mwaamunama oopacerya aalikana ni kharamu,...mwaamunama a neenli aalikana ni mwaanyompe,...mwaamunama e neeraru aari wiitho...aarina...wa mutthu, nto mwaamunama a neexexe aalikana ni...axawawe avavaka... mwaamunama a neexexe...aalikana ni xawawe aavava.*

<sup>261</sup> Vano, okathi Ezekiyeli oonaly'awe Ovuwa wa Muluku, owo aahoonā etthu emosaru Yohani oonaly'awe. Munnuupuwela Ettiminku evinre mootā naarin'ahu "Ovuwa wa Muluku," ni khoona elatarato vaavo Owo aatthunihenryaawe wira Eyo ekumihawe ni hiyo? Munnuupuwela yeeyo? "Ovuwa wa Muluku," etthu emosaru Ezekiyeli oonaly'awe, etthu emosaru Yohani

oonaly'awe, Eyo eri va olelo. Ennimukhalaha Yesu Kristu mmosaru okathi wa Ezekiyeli, etthu emosaru yaari muumu mulaponi, Muluku mmosaru yoowo ori vaava ni hiyo olelo; mmosaru nsana, olelo, ni mahiku othene; Ole Aakhala, Yoowo Onkhala, ni Ontthuna Orwa; evolowelo ya mmunepani, erutthu, ni erooho; ephareya ya eporonse (Masu), Mulipa-ooreeriha munepa ahu, ni Namasariha ni Erooho Yoowaarya. Etthu emosaru, moone, vamosaru!

262 Vano, nwehe ela. Vaareera:

. . . ni *erooho* . . . mapuro othene *awo yaarowaaya*; . . . vano . . . *orowa, awo yeettaka; ni awo khiyaarukunuwa yeettaka*.

263 Awo khayaawerya orukunuwa. Vakhala wira yaarowa epantt'ila, yaarowa ntoko mutthu; erowaka epantt'ila, yaarowa ntoko xawawe; erowaka epantt'ila, yaarowa ntoko enyompe; erowaka epantt'ila, yaarowa ntoko kharamu. Awo khiyaawerya orowa ottuli! Awo yaahaana orowa ohoolo mapuro othene yaarowaaya, khula mmosa wa axinama. Vano, *enama* enihimya exeeni mBibiliani? Owerya. Vaareera, enihimya "owerya."

264 Vano:

*Vano olikana waya akumi awo, nto yooneya ntoko makhala a mooro anipatta, ni ntoko . . . sa . . . wooneya ntoko mithuko: mooro waaniviravira eriyari y'akumi awo; nto mooro owo waanaarya, mooro owo waanitutha ntoko overunya.*

Owo Mulukuu. Mmooroni mmo waanikhuma Waarya; kahi waarya wa molumwenkuni, vano, Waarya Woohimala.

*Nto akumi awo yaanitthimaka ni yaanilikana (Nrowe noone). . . akumi awo yaanitthimaka ni yaanilikana, yooneyaka ntoko overunya.*

*Kaawehaka akumi awo, kaahoona nttheke nimosa vathi vakhiviru v'akumi, wa ithoni saya xexe.*

*Mukhalelo wa mattheke . . . muteko aya waalikana ni . . . waarya wa . . . nluku noowaarya: nto awo ooxeexe yaamulikana: nto mukhalelo aya ni muteko aya waari . . . naari nttheke eriyari ya nttheke.*

265 "Ekanyeryo xeeni va, Munna Branham? Exeeni iyo?" Enihimya wira makwarta ala—makwarta ala yaari nivuku na Muluku . . . Awo yaarisa mmukwahani, yeettihaka mattheke okathi Ezekiyeli aawonne-awe; masi okathi Yohani owoonne-awe, awo yaahiphiya vopuroni vaya voolikana Wirimu. Nivuku na Muluku naari elapo ya vathi, neettihaka mattheke, okathi waakuxaaya okhuma nipuro eroihaka nipuro, yaahimya wira yaari mmukwahani, awo yaahikuxa nlo ephiro yothene eviraka mothakoni ni ephiro yothene evolowaka mpaani moolompa ni siiso; masi vano ninaakheliwa osulu okhala wira okathi



wa Ekereja woomala, ni ninaakheliwa Moovuwani. Munnona? Nlo nrimweemexiwa vano, Wirimu, ni Malaikha othene ni itthu sirukurenrye. Ninnaaphwanya nuuvira okathi vakhani erulaka ikhilempa saya ni yuuramelaka vathi wiitho waya envuwihaka Yoowo. Munnona? Yaari makwarta a Muluku a mpaani moolompa, a nivuku.

<sup>266</sup> Vano, nwuupuwele makwarta a Muluku a nivuku, ahiiso mukhuneelo. Vano, muupuwele. Akavi, Yohani aawoonale, akavi? Axexe. Akavi owo—owo aawoonale—awe? Owo aawoonale axexe, nave, Soopattuxiwa sikumi xexe. Vano, awo oowanli yoonanse yoowoona emosaru.

<sup>267</sup> Nto xexe nummeru na elapo ya vathi. Mwaanisuwela yeeyo? Akavi ansuwela vano nihinatthi okela mwa yeeyo, *xexe* nummeru na elapo ya vathi? Vekeekhai! Ntoko aHeperi axexe. . . . Nlo ti na elapo- . . . Nlo nummeru na elapo ya vathi, na “nvuluxo, nvuluxo.” Vano, musuke eyo mmuruni mwanu, “nvuluxo,” okhala wira kinoorowa ohimya yeeyo, minuutu mmosa paahi, voolipa saana. Moone, “Nvuluxo!” Vano, yaahikhala aana araru aHeperi muttukutthani mwa mooro, masi Aneexexe khurwa, waari ovuluxiwa. Laasaro aari mmahiye mahiku mararu, masi vaphiyalyaaya na neexexe owo aahivuluxiwa. *Xexe* nummeru na Muluku “nvuluxo,” vano eyo yooniherya wira Ookhala ala yaahaana okhala etthu ya elapo ya vathi.

<sup>268</sup> Kinroromela wira khanvolaxiwe etala vano. Kinroromela wira etthunelo anyu wa erooho eri vakhani—eri vasulu vakhani va wa erutthu anyu vano. Munnona? Vaareera.

<sup>269</sup> Vano, nwehe, “Awo aakhalana maitho” (mwa Ezekiyeli mu) “ohoolo ni ottuli ni muhina.” Nrowe nisome paahi yeeyo. Nwehe va, moone. Munnoona va, kookupali wira awo aahimya va, “axinama,” ithoni xexe, ntoko xawawe, ni mapupha, oosareya maitho ota, muhina. Nkawehani va:

*Nto axinama axexe ni khula mmosa aarina mapupha  
mathanu na mosa mwa yoowo; . . .*

<sup>270</sup> “Nto awo yaanivava,” ni siiso, “ni yaahikhalana maitho ota, muhina, ni ottuli.” Eyo yaahimya mwaha w’osuwela waya. Awo yaanimusuwela ole aakhala, ole onkhala, ni onttthuna orwa; okhala wira awo yaari Vamukhuneeloni, vakhiviruxa mpakha hata yahaakhanlyaaya mutthu. Makwarta a mpaani moolompa, ahiiso, kahi makwarta a mpaani moolompa (Makwarta a mpaani moolompa, ikonto imiya xexe ni ikonto xexe.), masi ola okwarta wa mukhuneelo, makwarta a Veehiceni, Ehice, vaavale vakhiviru ni Muluku, “Soopattuxiwa sikumi,” etthu yootharelana wa Muluku, yeemenle-ene vale. Osuwela waya, awo annimusuwela ole aakhala, onkhala, onttthuna orwa. Awo yaahikhalana “maitho ota,” yooniheryaka ele yaaweryaaya woona, ele yaatthuna orwa; “maitho muhina,” ansuwela sothene naanaano; ni “maitho ottuli,” yaamusuwela ole aakhala. Ole

aakhala, ole onkhala, ole onthhuna orwa, emooniheryaka moovirani w'okathi wa ekereja "Ole aakhala, Ole onkhala, ni Onthhuna orwa; Yesu Kristu mmosaru nsana, olelo, ni mahiku othene."

271 Nvarelele vano. Ninrowa okhomakela eyo voomalela vakwaaturu muhina mwa minuutu vakhani. Nwehe. Vano, minuutu mmosa paahi.

272 Enooniherya osuwela waya, ni yaahooniherya wira yaanisuwela, annisuwela. Awo yaanisuwela okathi w'ohoolo wothene ni vano ni ottuli, ni sothene sa yeeyo!

273 Ni yawaya...Awo yaari oohikhulumuwa. Awo khiyaakhulumuwasa nnakhala. Awo khiyaakhanle okhalaka oolupanyana ni mutthu, owo onnikhulumuwa. Masi awo yaari oohikhulumuwa, awo yaamwiipa, "Oowaarya, oowaarya, oowaarya! Oowaarya, oowaarya, oowaarya! Oowaarya, oowaarya, oowaarya, Apwiya Muluku Oowerya sothene! Oowaarya, oowaarya, oowaarya!" othana wothene ni ohiyu wothene moovirani mwa khula okathi. "Oowaarya!"

274 Nrowe nitthikele ottuli minuutu mmosa paahi. Nrowe nitthikele ottuli, kookhalana Yoolepwa emosa mmuruni, Yesaya 6, voowaakuva. Nwehe! Yesaya aahoona etthu emosaru voolikana-ene.

275 Khula yoowoona ya Apwiya...Ti yeeyo enihimy'aka. Vakhala wira soowoona ninkhalan'ahu olelo khasihiyo soolikana ni soowoona sa mBibiliani, weeso ti soovonyeya. Iyo sooniheryaru, ahiiso, khula muupululo onimooniherya Muluku etthu p'itthu woohikhala ele Owo aary'awe kweekwe, owo muupululo woovonyeya. Ekereja yothehe etekiwe vasulu va yeeyo, Matewu 17.

276 Nrowe noone, Yesaya, kapiitulu 6. Profeta ola mmiravo aahikhala alipanaka miyoono sa mwene ooreera murima, ni owo aahimuthumela mithinto sothene sa ikuwa sooreera. Ni owo aari profeta, ni aanikhala saana nipuro...Masi nihiku nimos a mwene aahikhwa, vano owo aahaana o—owo aahaana wiisaakiha. Tivo aaronwe mpaani moolompa wira alompe. Okhala wira aaroopacerya okhuma nle naari nipuro na mwene iwe, vano, wira aphwanye e...Mwene ooreera murima aari mutthu mmosa ooreera murima. Masi owo aarookhuma ni khoona moota atthu yaakhal'aya, tivo owo khukokhora mpaani m'olompa. Vano, nwiriyaane.

*Mwaakha okhwiye-awe mwene Usiya kaahiwoona  
Apwiya ekilaanthe veehicensi, yoorakama ni  
yootittimiheya, ni niveru naya naahisareya mpaani.*

277 Ovuwa! Exeeni ekhanle "niveru Naya"? Eyo eri vo, "Malaikha, Ookhala," niveru Nawe naamutthara Yoowo. Niveru t'inle nirwa ottuli, munnona?

*. . . niveru naya naahisareya mpaani.*

Ni osulu waya yaahikhala-wo maserafi: ni khula mmosa a yaawo aahikhhalana mapupha mathanu na mosu; ni maili aanikhuneela owiitho wawe, . . . ni maili aanikhuneela inawu sawe, nto ni maili aanivava-no.

*Nto mmosa aanimukhuwelela mukina, yiiraka, Oowaarya, oowaarya, oowaarya, ti APWIYA a anakhotto: elapo yothene yoosareya . . . nttittimiho.*

*Nto okathi mapotto a mukhora yaahittikinyeya mwaha wa nsu na ole aakhuwela, vano mpa mwaahisareya-mo mwiixi.*

278 Wulu! Oh, wulu! Eyo enooniherya wira soowoona iyo vekeekhai imosaru voolikana wa khula mmosa w'axilopwana awo. "Oowaarya, oowaarya, oowaarya!" Awo t'ohikhulumuwa, othana n'uhyu, "Oowaarya, oowaarya, oowaarya, t'Apwiya!"

279 Nrowe nitthikele ottuli minuutu mmosa paahi vano, wira nikupali wira nookhalana alopwana ala oratteene. Emaara yoopacerya makwarta ala yaaromoliwaaya, ti mwa Maphattuwelo. Vano, muupuwele, sothene sinlaleyaahu sihaana okhuma mwa Maphattuwelo mpakha Wiisuupulula. Khula okathi muntthun'anyu okhala mwaanyiheryaka, murwe mukikohe. Munnona? Ohaana okhala Bibilia othene, kahi epante ya yoowo paahi, okhala wira Muluku khonrukunuwa! Etthu Owo aary'awe mwa Maphattuwelo, Owo t'oryaawe olelo, ni Owo t'aryaawe okathi w'eriyari. Owo okathi wothene mmosaru! Munnona? Vano, mwa Maphattuwelo, okathi Makerupi ala. . . Ti siiso kiphiyenryaaka waaphwanya, Kaahaana otthikela ottuli wira kisuwele ele yaary'aya wopaceryani.

280 Nrowe nikhunle mwa Maphattuwelo 3:24, okathi vakhani paahi vano. Maphattuwelo, kapiitulu 3 versiikulu 24. Munniphenta Yeeyo? [Muthukumano oniira, "Amen."—Mol.] Vaareera. Vano, nrowe nipacerye versiikulu 22. Miyo—miyo okisivela Ela paahi! Ela etthu emosa kintthun'aka paahi ohela va, yo waacererya vakhani paahi, masi enookhala efayita vanciene nihiku nlo.

*Nto APWIYA . . . yaahihimya wira, Vano, mutthu oolikana . . . mmosa a hiyo, . . .*

281 Vano, axinn'aka athiyana oophenteya ni oophwanelaxa ni oophentiwa (Mukihiye kihimye eyo siiso.), muhuupuwele wira kimpwetexa nttittimiho wa o—ororomeleya ni nniya na ophwanela, ni nooreeraxa na omuthiyana. Miyo kimpavela wooniherya va etthu muthiyana. . . Xontte! Ni nyuwo mufiitani, nyuwo athiyana munrowa wiiwaka efiita ela, nkineererya woothanyani, miyo ka murumeyi a Apwiya paahi wira kiruuhele Waarya. Etthu ya vathixa ni yoohureya ni yoonanaraxa elapo ya vathi ti muthiyana owo akhalaru ootakhala. Ni nniya

nooreeraxa nikhanle wa mulopwana, ohiya woopowa wawe, ti muthiyana ooloka. Ni kinlavula ni ole a vathi, oohilakeya, oohononeya. Ni kinrowa owoonihani vaava niryeeene vaavo, ni wira kiwooniheryeni paahi mwaha wa xeeni miyo... Bibilia oniixuttihaawe wira athiyana ehikhaleke alaleyi, mapastore, awiixuttihi, wala etthu p'itthu ekina mukereja. Vano, nwiriyane ela paahi:

*Nto APWIYA... yaahihimya wira, Vano, mutthu oolikana... mmosa a hiyo, (Vano, Owo khonahimyeke wira muthiyana oolikana ni mmosa, "mutthu oolikana ni mmosa.")... ni onnisuwela yooreera ni yootakhala... (Muthiyana khaa; owo aahootothiwa. Munnoona?)*

282 Vano, Paulo ohimye wira, "Nkinimutthuniherya muthiyana wiixuttiha wala olamulela, masi... okhala wira Atamu t'opacenrye opattuxiwa nuumala khupattuxiwa Hawa. Ni Atamu khootothiwe, masi muthiyana aahootothiwa." Tivo muthiyana khaakhanle mmosa a Muluku. Owo khaasuwela hata evirikanelo, owo aarimootothiwa. Munniiwa eyo? Mwaiwaka vale, mwiire "Amen," vano miyo... [Muthukumano oniira, "Amen."—Mol.]

*... APWIYA... yaahihimya wira, Vano, mutthu... mmosa a hiyo, onnisuwela yooreera ni yootakhala: ni onnisuwela... nto vano, wira ahookole ntata, orukule muhokorokho wa mwiri wa ekumi, olye, wira okhalane ekumi mahiku othene:*

*Tivo APWIYA... yaahimoomola omatta ya wEdeni, wira olimeke etthaya memmo waakumihwaawe.*

*Vano awo yaahimoomola mutthu; yaahaahela Makerupi epantte ya onikhuma nsuwa wa ematta ya wEdeni, ni xoowa aavava... xoowa a mooro yoowo aarukurerya ipantte sothene, (Munniwoona axinama axexe? Siri ipantte xexe paahi mukhanly'anyu orowaka, moone: onikhuma nsuwa, onkela epheyo, onkela nsuwa, ni okuusini. Makerupi ala yaahikhalana xoowa a mooro vamukhora wa omatta... ) wira elipeleleke ephiro ya mwiri wa ekumi.*

283 Okhala wira mutthu aaphiyerenrye-ru okuxa Mwiri wa Ekumi, nto owo aamuwerya okhala mukumi mahiku othene.

284 Nto makerupi ala, toko ahimmwe, yaaheliwe omukhora wa onikhuma nsuwa wa ematta, erowaka ipantte xexe. Kaahaana okhaliha eyo ovirikana vakhani n'ile; Nkikhanle olamulelaka exariya mwa sooruma sa Muluku ni itthu siiso, masi miyo—miyo paahi... wira musuwele etthu enihimyaaka. Vale eri ematta ya wEdeni. Nto ola mukhora va, onihuleya va, onhakhinyeyela ota, nto vamukhora yoola yaahikhala Makerupi. Makerupi! Ni, muupuwele, khenihimya wira, "Kerupi mmosa," ehimye wira,

“Makerupi.” Makerupi yaaheliwe iwe wira esukeke Exeeni? Mwiri wa Ekumi. Ti Yoowo awo yaaryaaya wira esukeke, Ephiro ya Mwiri wa Ekumi. Ephiro, T’ani okhanle Ephiro? [Munna mmosa oniira, “Yesu.”—Mol.] Woonihereya vayi? *Va* ti nipuro noowaarya, *va* ari Makerupi.

<sup>285</sup> Vano, nwehe, mulepe yothene ela. *Va* nri Noowaarya—Noowaarya. . . nipuro Noowaryaxa, nipuro Noowaaryaxa, *nla* nipuro noowaarya, nto *va* eri ephareya, ni *va* siri mithuko sa waarya, mithanu na miili sinooniherya Waarya okhuma *mu, mu, mu, mu, mu, mu, mu*. Munnona? Iyo sinooniherya exeeni? Iyo sinsuka ni sinooniherya ni Mooro wa Muluku Ephiro enrowa Omwirini wa Ekumi. Moone, khokhanle orwaaka okhuma *va*, eseminaariyu Prespiteriyaano wala eseminaariyu ya Pentekosite, ohaana orwa okhumaka *Va*, wooniheryaka Waarya. Vaareera.

<sup>286</sup> Mwaweha vale, ala—Makerupi ala Yohani aawoonalyaawe va yaahaana okhala oocaliwa ni okhapelela Mwiri wa Ekumi, tivo ocaliwa waya waahaana okhala n’atthu. Wala musome Maphattuwelo, nitthikelaka-tho Maphattuwelo, “Awo yaakhapelela Mwiri wa Ekumi, yaasuka Yoowo, Ephiro ya Ekumi.” Ephiro wa Ekumi! Eri sayi Ephiro eyo? Yesu ohimnye wira, “Miyo ka Ephiro yeeyo. Miyo ka Yoolya yeele ekhumme wa Muluku a Wirimu. Mutthu onlya Yoolya ela, owo onookhala mahiku othene.” Vano yookhala Ephiro yoothikela Mwiri yoowo wa Ekumi. Munniiwa?

<sup>287</sup> Vano, mwa yeela, kintthuna kooniherye vano ni olakiherya yeela: owo altaari. Vano, ola aahaana okhala altaari omatta wEdeni. Miyo kinimooleelani mwaha aya. Nyuwo munnuupuwela wira oowanli Kayini ni Apeli yaahirwaasa nno wira ekokhorelase? Tivo eyo enooniherya wira altaari a Muluku aaheettihiwa khukhalihwiwa va omatta wEdeni, ni ephiro emosa paahi y’otthikela wEdeni enkhalala ni altaari. Ela tho va, moone, otthikela wEdeni nviraka waltaari. Ni awo yaari wira ekhapeleleke ephiro ele iwe, wira awo ehiwerye otthikela iwe mpakha altaari ula okhuneeliwa n’ephome.

<sup>288</sup> O Muluku, atthu khanwerya woona? Moone, hat’etthu woohikhala Ephome! Ehaana okhala ettipiheryo, mukhuneelo vo, altaari ula a olamuliwa ohaana okhala mukhuneelo; nto okathi altaari ula, Ephome yakumihwaru, vale ninrowa okhala Nihiku nenlo na olamuliwa mooro wa oviruwa wa Muluku wira osukeke-tho Mwiri uwo. Etthu emosa paahi enrowa okela-tho mukhor’ola wa wEdeni, enrowa okhala ni Ephome ya Yesu Kristu. Munnoona yeeyo?

<sup>289</sup> Vano, nwehe. Ayo, vano Kayini. . . Oh, *va* ori Kayini; ni *va* ori Apeli, Apeli. Vaareera. Vano, amiravo oowanli yaahirwa mpakha mukhor’ola wira ekokhorele. Eyo ekeekhai? Siiso aakhanle altaari a Muluku. Eyo ekeekhai? Nto ohoolo w’altaari

ula yaahimuteka oorantteliha, altaari mukina. *Va* ori altaari eekeekhai a Muluku, ori mmurimani mwa mutthu. Vano ookhala altaari mukina vathi *va*, aathoonyerya nipuro Noowaaryaxa mwa nipuro noowaarya.

<sup>290</sup> Oh! Oh! Kinoona ntoko otthuna olavula ilavulelo. Oh, wulu, Ovuwa wa. . .Khamunwerya woona wira Ti yoolikana? Nwehe paahi! Oh, etthu kihimenryaaka eyo, okhala wira nkinwerya ophwanya moolumo aniphiyerya mwa nntaava naka n'Enkelesi wira kihimye moonelo aka. Moone, etthu ehaana ohimya.

<sup>291</sup> Ntoko Munna Rowe, namuhupi mmosa wa Mukhulupale. . . oophiyaka Makhulupale axexe wala athanu oovirikana, owo iirale, "Oh, Munna Branham, ohiyu umosa miyo kaahirwa vamuthukumanoni." Owo khwira, "Miyo nkaasuwela etthu yo wira," owo khwira, "Miyo keemenle vate vale." Nto owo khwira, "Oh," khwira, "Miyo kinnaaphenta Apwiya ekumi aka yothene." Owo khwira, "kinnikhalaka e" (kinoona wira) "Episkopaali." Owo khwira, "Ni koona wira kaanaasuwela Apwiya." Owo khwira, "Nto ohiyu umosa miyo kaahiwehaweha, nkaasuwela etthu yo wira." Khwira, "Miyo—miyo nkaarowa ovolowa ni hat'etthu, masi" khwira, "Kaahiiwa Masu ekhumaka. Oh, Awo yaahipacerya orwa." Owo khwira, "Miyo kipacerya weetta nno ni nno vate va eheema, keettaka nno ni nno," nto khwira, "vaavale vene nkaawenrye olipelela wira kiphiiye vamukhora, kaahiipurula vathi vaya okathi wiiriwaaya wiihana wa waltaari, nto miyo khutthimakela waltaari khumora, khwira, 'Apwiya, miyo ka natampi!'" Ni khwira, "Vano Awo khukisariha ni Erooho Yoowaarya Aya."

<sup>292</sup> Nto khwira, "Miyo kinniwerya olavula mattaava mathanu na mararu oovirikana," okhala wira owo namuhupi. Munnona? Owo ti. . .owo ori mu. . .owo—owo na—namuhupi wa Mukhulupale, ni. . .mapuro othene okhuma Woodrow Wilson erowaka. Owo onnikhalaka namuhupi a wa khula mmosa wa Mukhulupale ahu, namuhupi wa ilapo s'okhopela, onniwerya olavula khula nntaava na ilapo s'okhopela. Owo khwira, "Miyo voomalela kinnisuwela khula nntaava ninsuweliwa ni ninlempwa molumwenkuni." Masi khwira, "Nkaareere osareya ovuwa nkaawerya orumeela hata nimosa w'awo wira kimuttotopete Yoowo, vano Apwiya khukivaha nimosa na naanaano na Wirimu wira kaattotopete-No." Oh! Ooh! Nyuwo muri vo.

<sup>293</sup> "Esukaka mukhor'ola." Kayini ni Apeli yaahirwaasa va wira ekokhorele. Tivo siiso aakhanle altaari awo ammusuk'aya. Eyo ekeekhaii, Makerupi ala?

<sup>294</sup> Etthu ekina, nwehe va yookhala eyooniheryo ekina. Kayini. . .Nkanweheni Bibilia vano! Miyo kaamoorumani okhunla, masi eyo. . .khencala, nyuwo muniphwanya mwa Maphattuwelo. Vaareera, nwehe. Kayini aarookhuma, Kayini

aarookhuma Ohoolo w'Apwiya okhuma vamukhora wa omatta. Vano Ohoolo w'Apwiya siiso aakhanle altaari, nto altaari aari vamukhora. Ovuwa! Oh! Vaareera. Nlo nipuro n'okhala na Muluku, waltaari Wawe. Vano, Kayini aahikhuma Ohoolo w'Apwiya, okhuma nipuro nla. Muntthuna mulepe? Maphattuwelo 4:16, mwaatthunaka olepa. Vano, vano, nyuwo mookhalana yothene, ti siiso, moolepa?

<sup>295</sup> Vano, kookhalana etthu ekina tho entthun'aka okweretha wa minuutu mmosa paahi. Kinwehererya paahi wira hata emosa wa ikhutte sanyu khasinoovya, wala etthu p'itthu wawinyu. . . Vano, nwehe. . . Muhiye sivyeeke, khiva mulattu, iyo sinoopweteya khula enamuna. Nrowe—nrowe nuupuwele va, ela ti—ela t'itthu ekhanle—ekhanle y'ekeekhai.

<sup>296</sup> Moise aahiwelihiwa Wirimu, Moise, aakuxiwe okhuma vathi mpakha Wirimu ni aahimoono altaari a Muluku. Eyo ekeekhai? Miyo kimpavela wooniherya muupuwelo aka va. Nyuwo moosuwela etthu emphavel'aka wira, khamunuupuwela? Vaareera. Owo aarookhuma Ohoolo wa Muluku. Nto okathi okhuruwaly'awe okhuma Ohoolo wa Muluku, owo khwira, Mo-. . . Muluku aahimuleela Moise, "Mpake itthu sothene vathi soolikanihiwa ni Erimu." Eyo ekeekhai? Vaareera.

<sup>297</sup> Vano, nto vairalyaawe, okathi opanke-awe Nivuku no Waataana, owo aahaahela Makerupi aili wira esukeke nivuku. Munnoonu exeeni iyo? Yaari empa y'olompa. . . aari altaari, makwarta a Ehice. Makerupi aili, Owo iirale "Mwaapake a eporonse ni muhele mapupha aya ekwannyanaka so," okhala wira vekeekhai ti yeeyo owo oonaly'awe Wirimu.

<sup>298</sup> Ti yeeyo vekeekhai Yohani oonaly'awe Wirimu, Makerupi ala axexe ipantte xexe sa nivuku na Ehice Wirimu. Awo yaari makwarta a nivuku. Makerupi, makwarta vamukhuneeloni.

<sup>299</sup> Nyuwo mwaatthuna osoma Yoolempwa eyo (hiyo khanrina okathi w'okela mwa yeeyo), mulepe Okhuma 25:10 mpakha 22.

<sup>300</sup> Vano, awo ansuka mukhuneelo okathi Muluku onkhal'awe Moovuwani mwAwe wa Shekinah. Ovuwa wa Shekinah waari vayi? Vamukhuneeloni. Eyo ekeekhai? Awo ansuka Ovuwa wa Shekinah weiwo. Hmm! Whish! Nwiriyan, apatthani! Nto eyo enrowa wooniherya wira khula mulavilavi khokhanle orwaaka iwe n'ukuxa Eyo. Muhaana okhala oolikana muhinatthi orwa Ohoolo Waya.

<sup>301</sup> Nkanweheni Aroni, mwa ethoonyeryo. Ohinatthi. . . Vano, muupuwele, muthukumano mahiku ale khivaaweryaneya waattamela mwa hata enamuna. Masi okathi Aroni aavolowaawe. . . Imaara kavi owo aarinaawe ovolowaka-Mo? Emaara emosa khula mwaakha. Moota xeeni aarinaawe. . .? Owo aahaana owara ikuwo khata, saapakiwe ni matata khata, muthinto mmosa wa ikuwo w'omeekha. Owo aahaana owara enamuna emosa. Owo aahikhalana muhokorokho mmosa ni

esimpi, yeeyo khula okathi ettaawe eyo yaamuruma “Oowaarya, oowaarya, oowaarya, t’Apwiya.” Owo aattamela mukhuneelo, waarina ephome.

<sup>302</sup> Ni owo aahaana ottikittheliwa ni makhura khata, oowunkhelihiwa ni yoowunkhela khata yoopakiwa ni ethutu ya Saroni. Nto Yesu aari Ethutu yeele ya Saroni. Ni, nwehe, ethutu etthu yooreera, yookhalana yoowunkhela mwa yeeyo. Masi yoowunkhela ehinatthi okhumela, ethutu ehaana onyakattiwa, vano nto yoowunkhela enoowammwa mw’ethutuni. Yesu, mwa ekumi Awe, yaari ekumi yooreera voomalela yaatonko okhaliwa; masi Owo khaakhanle okhalaka siisaale, okhala wira Owo aahaana ottikitthela Ekereja Awe (wira yaattamele Waarya Wawe), tivo ekumi awe yaawammw’aya. Nto Erooho Yoowaarya emosaru yaari mwa Yoowo eniheliwa Mukereja, ni Owo onnimukhaliha Owo mmosaru nsana, ni olelo, ni mahiku othene, Ethutu ya Saroni, yoowunkhela aya. Mutthu onaattamela nipuro nla Noowaaryaxa ohaana okhala oottikittheliwa ni Erooho Yoowaarya. Nto owo eettaka, “Oowarya, oowaarya, oowaarya, t’a . . .” (Kahi ni sikaro mwaano mwawe.) “Oowarya!” (Kahi ni mukala awe woorukunxiwa.) “Oowaarya, oowaarya, oowaarya,” owanre-ene owaarya wa Yesu Kristu. Hmm! Moota Nyuwo muryanyu oothamaleya! Oh!

<sup>303</sup> Vano, “mukhuneelo.” Vano, mukhuneelo ori mmurimani, nipuro vaavo waarya wa Yawawe—Ovuwa Wawe mwa An’awe othene, Ovuwa wa Shekinah mmurimani mwa mutthu. Va ori murima wa mutthu. Eyo ekeekhaii? Owo mukhuneelo? Munvira sayi mwa yeeyo wira nvolowe Mmo nviraka inamuna iya soovirikana? Nviraka mwa otthuna mmansinyu, otthuna mmansinyu. Enkela *mu*, khuvira *vale*, khukhuma *exeeni*? Ovuwa wa Shekinah. Exeeni—exeeni okhanle Ovuwa wa Shekinah? Ti Mukhalelo wa Muluku. Nto mulopwana eettaka, wala muthiyana, onooniherya Ovuwa wa Shekinah. Owo khonrowa ipa sa cuuku ni—ni wira itthu siiso, n’ukhumela nno n’ukhootta Masu. Voohicala etthu atthu anihimyaaya, owo orina murim’awe wooheliwa mwa etthu emosa: Muluku. Ni owo akhalaru oowitthaniwa ni Muluku vekeekhai vano Yesu oniisooniherya Mwaneene mwa yoowo ni Ovuwa wa Shekinah, airaka itthu imosaru Owo iiraly’awe ottuli wu; wooniherya Ehapari yooreera emosaru, alaleyaka Masu mamosaru, Masu mamosaru yiisooniheryaka mwa mphimo mmosaru waaryaaya wu, vekeekhai siiso ntoko yaary’aya oPentekositeni onophimmwa-tho. Oh, wulu!

<sup>304</sup> “Mukhuneelo.” Ezekiyeli ni Yohani owanli yoonale itthu imosaru. Vano, nwehe, vano nihanle ophiya okhomoni, muhina mwa okathi vakhani paahi. Vano, va ti vatthu kintthun’aka wira nvare etthu. Oh, xontte muhialele! Vano, akavi ansuwela wira Makerupi ale saari *Soopattuwiwa sikumi* ni kahi axinama? Awo yaari i . . . muloko wa osuluxa.



305 Vano, Nlaikha muloko wa osuluxa onvikana mutthu wala muloko wa vathixa? Vaareera, mulopwana. T'uvi okhanle muulupalex, mwaana a Muluku wala Nlaikha? Mwaana a Muluku! T'ani Muluku aarowaawe omwiiwaxa, Nlaikha neemenle iwe ohoolo Wawe nivekelaka etthu, wala mmosa a nyuwo othene avekelaka? Mmosa a nyuwo othene! Moone, okhala wira nyuwo mw'ana alopwana n'athiyana. Awo—awo arumeyi. Munnona? Awo arumeyi, ni nyuwo mw'ana alopwana n'athiyana. Vano munnoona oruma orin'anyu, hiyo nnimoova paahi orumeela.

306 Vano, kintthuna wira nwehe va, ela ti yooreera. Oh, wulu! Mukihiye kiphiye va ni kituphe etthu ya yeela wira kiwerye ophiyerya ela. Mukuxe ilaapi sanyu vano, va t'ile vekeekhai kaatthun'aka wira mukwerethe. [Munna Branham onkweretha vakwaaturu—Mol.] Khino vanreerela kipake eyo yooyevaxa vakhani. Vano, Isarayeli mmukwahani mwaya, okathi awo yeemexaaya iheema, vano nwehe ela saana, awo yeemexa iheema: mmosa, aili, araru, axexe. (Nnari, kinoona wira koovonyela.) Mmosa, aili, araru; mmosa, aili, araru; mmosa, aili, araru; mmosa, aili, araru; ti siiso awo yeemexaaya iheema erukurenrye mukhuneelo. Vano, miyo koosuwela, nyuwo othene moosuwela eyo, nyuwo moowehe ni moosoma mwa Waataana wa Khalayi.

307 Vano, epantte ya onikhuma nsuwa, epantte ya onikhuma nsuwa, vaava *va*, kinoolepa wira nvare saana. Epantte ya onikhuma nsuwa, epantte ya onikhuma nsuwa kweekwe aari Yuta. Ola ti mukhora, Y-u-t-a, Yuta. Nto ni Yuta...aari muru wa mahimo mararu ni epantera aya; mahimo mararu ni epantera aya, epantera ya Yuta. Munnuupuwela...Akavi yoonale *Sooruma Muloko*, ya Cecil DeMille *Sooruma Muloko*? Vaareera. Wala, munsoma muumu mwa Yoolempwa, mwa Yoolempwa vo, kiireke, aahikhala Yuta epantte ya onikhuma nsuwa. Vaareera.

308 Epantte onkela nsuwa, *nno*, (Vano mulepe, musome mu... eri mwa Okhuma, ni sikina, okathi waakhum'aya.) aari Efrayimi, E-f-r. Ni owo aarina mahimo mararu ni epantera aya. Vaareera, Efrayimi.

309 Vano, epantte ya okuusini aari Rupeni, R-u-p, ni mahimo mararu, ni epantera aya.

310 Ni epantte onkela ephoyo aari Dani, Dani ni mahimo mararu, nto mahimo mararu ni epantera aya. Vaareera.

311 Vano, eyo t'inamuna awo yeemexaaya iheema. Vano, muupuwele, nrowe nisome vano mwa Yoolempwa vano wira nivare yeela oratteenexa voolikana. Miyo kinoopacerya-tho eversiikulu 7:

*Nto mwa...mwaamunama aalikana ni kharamu, ni a neenli...aalikana ni mwaanyompe, (wala enyompe*

yoolopwana yaamukhaani) *ni mwaamunama a neeraru wiitho wawe waalikana ni mutthu, nto mwaamunama a neexexe aari...ni...mwaamunama a neexexe aalikana ni xawawe aavavaka.*

*Nto axinama awo axexe khula mmosa aahikhalano mapupha mathanu na mosa; ni yaahikhalana maitho mapuro othene ni mpuwa: ni awo khiyaahiyererya othana ni ohiyu, yiiraka, Oowaarya, oowaarya,... Apwiya Muluku Oowerya sothene, yaawo yaakhala, yaawo ankhala, ni antthuna orwa.*

*Okathi axinama ala yaanvuwihaaya ni omuttittimiha ni omuxukhurela ole aakilaanthe veehicensi, yoowo onkhala mahiku othene,*

*Mahumu miloko miili ni maxexe yaanuurama ohoolo wawe ole aakilaanthe veehicensi, ni emukhorelaka ole onkhala mahiku othene, ni yaanirihela ikhilempa saya—yaanirihela ikhilempa saya ohoolo wa ehice, yiiraka,*

*Nyuwo ti mumphwanela, O Pwiya, waakhela ovuwa...nttittimiho...owerya: okhala wira ti nyuwo mpattunxe itthu sothene, ni mwaha wa otthuna wanyu iyo...soopattuxiwa.*

<sup>312</sup> Vano, vano, nwehe. Epantte onikhuma nsuwa—epantte onikhuma nsuwa, owo oonale muthinto xeeni wa ethoni? Mwaweha vale, aari kharamu, kharamu, k-h-a-r-a-m-u, owo t'ari epantera. Owo t'ari e—owo t'ari epantera y'okhulupale ya Yuta. Okhala wira Owo ti...Yesu aakhumme mwa e... Ekeekhai! Ni Owo ti Kharamu a nloko na Yuta.

<sup>313</sup> Vano, akavi atonko omoona sotiiyako? Anci-ene a nyuwo moosuwela exeeni iyo: ettheneeri. Munnona? Owo aari Bibilia oopacerya a Muluku. Vano, exeeni enipacerya, nummeru noopacerya mwa sotiiyako, elatarato yoopacerya? Ti harus! Eyo ekeekhai? Nto t'evi ekhanle yookiserya? Leo, kharamu. Orwa Woopacerya ni Orwa wa Neenli wa Kristu, yothene eyo vale. Awo aakhalana kankuru owiikimanyiwa...ahiiso okathi wo wiikimanya ti vaavo siri ihopa sowiikimanya, okhanle okathi wa kankuru, ni hiyo ninkhala niviraka mwemmo.

<sup>314</sup> Nto nwehe mpiraamiteni okathi owo otenke-awe, okathi wa Enookhi, khula nluku naari mwemmo. Awo yaaniwerya ophima itthu iyo voolikana saana ni ohimya khalayi ene ikhotto ni itthu. Itthu sothene ti soomalela ohiya Nluku noomaliherya. Mwaha wa xeeni? Mooweha vapapheloni vanyu va etoolare? Mukumihe nwehe, ekhuneelo aya khekhanle-vo. Mwaha wa xeeni? Khenatoko omaliheriwa. Kristu ti Nluku noomaliherya nikhoottiwe, Owo aari Nluku noomaliherya nikhoottiwe. Owo onnoorwa vahilekenle. Nkawehani moota Ekereja ele, ottuli wu okathi wa Lutero, yaaraaya yootaphuwa vathi; vano khukhala

yooyeva, vakhani-tho yooyevaxa, vakhani-tho mpakha ophiya va; vanikhumaaya okathi wa Pentekosite, nto enoophiyerya khula nluku wira nilikanele saana wira eheliwe ekhuneelo ele vale, Ekereja enrowa omuruuha Yesu mmosaru nsana, olelo, ni mahiku othene. Yoolikana-ene ntoko sinweryaney'aya okhala!

Vano, Owo aari Kharamu a nloko na Yuta.

<sup>315</sup> Vano, khula mutthu otonko omusoma Bibilia onnisuwela wira nummeru na Dani naari, wala etthu—etthu Dani... Oh, kintthuna ohimya wira, ayo, ele aari Dani? Awawe, owo aari xawawe. Ti yeeyo. Owo aari xawawe. Ookhala onkhala omusomaka Bibilia. Owo aari xawawe.

<sup>316</sup> Vano, Rupeni aari ti mutthu ene. Owo aari oopacerya, ole oomalela ootteettheya a nikhuru. Yakope khohimye siiso mwa—mwa Maphattuwelo 49? “Rupeni, nyuwo mwa oopacerya a ikuru saka; masi ntoko maasi, nyuwo moowela voolilini vaka ni mooveeha olili aka,” ni ookhala ni hawala a atithi awe. Moone, iwo ti ohureya wa mutthu. Munnona? Mwaamunama khorina ohureya iwo, kharamu, khiivo hata emosa wa itthu iya erina eyo; masi mutthu ohaana, oneetta ni mwaara a mukhwaawe ni sikina. Ntoko paahi... Etthu emosaru paahi, sothene soomalelihiwa.

<sup>317</sup> Vano, ela vathi va, *ela*, Dani aari xawawe. Ni, *ela*, Rupeni aari wiitho wa mutthu. Nto Efrayimi ti enyompe. Vano, munnoona elatarato ene vo? Efrayimi... Eyo t'inamuna awo yeemexaaya iheema, mBibiliani.

<sup>318</sup> Vano, nyuwo mwaweha vale, Dani muru wa mahimo mararu, Yuta ti muru wa mahimo mararu, Rupeni ti muru wa mahimo mararu, ni Efrayimi ti muru wa mahimo mararu. Ixexe tthaaru sinkhala muloko ni piili, mahimo muloko ni maili a Isarayeli. Moone, khula nimosa ni epantera aya; ni epantera ya Yuta aari kharamu; epantera ya Rupeni, mutthu; epantera ya Efrayimi, enyompe; epantera ya—ya—ya Dani aari xawawe.

<sup>319</sup> Vano, nkawehani-tho va etthu Yohani ohimmy'awe wira, “Nto mmosa aarina ethoni...” Nrowe nisome va vano, noone paahi sinto kehiyo etthu emosaru ntoko yaaryaaya Wirimu:

*...mwaamunama oopacerya aalikana ni kharamu, (Yuta)...mwaamunama a neenli aalikana ni mwaanyompe, (eyo enyompe ekhaani yoolopwana) ... mwaamunama a neeraru wiitho wawe waalikana ni mutthu, nto mwaamunama a neexexe aari...xawawe aavavaka.*

<sup>320</sup> Voolikana-ene mahimo a Isarayeli ehelaka iheema voorukurerya, esukaka, awo ti makwarta elapo ya vathi a ihaakhi sa nivuku. Oh, Aleluya! Khamunoono?

<sup>321</sup> Va! Ikharari, m-u-k-h-u-n-e-e-l-o, “mukhuneelo.” Khiivo etthu yaawerya orwa khula nipuro waattamela nenlo ehikumanne ni mahimo ala. Okumana ni xeeni? Kharamu;

okumana ni mutthu, osuwela wa mutthu; ni okumana ni ekhavalalo ya muteko, ntoko enyompe; wala okumana ni xawawe, waakuva waya. Munnona? Erimu, vathi, eriyari, ni mapuro othene; moone, awo yaari makwarta. Ni vasulu naari Nripu na Mooro. Munna, khiivo yaakwannya mukhuneelo ehaattamenle . . .

<sup>322</sup> Nto etthu emosa paahi yaawerya waattamela waari ovira mphomeni. Aroni aavolowa mmwe emaara emosa mwa eyaakha n'iphome. Vano munnoona? Vano, nwehe. Khula muru wa mahimo mararu osukaka mukhuneelo, mukhuneelo wa Waataana wa Khalayi. Vano, nyuwo moolepa eyo, athu othene? Vano, va ori emosa esya, munna. Nwiriyaane ela, nto ninoorowa. Vano, muupuwele, awo yaari makwarta a Waataana wa Khalayi. Akavi atonko osoma eyo mBibiliani, munsuwela wira ti siiso? Moone, awo ti mwakwarta a Waataana wa Khalayi.

<sup>323</sup> Vano hiyo ninkhala okathi mukina. Ovuwa! Oh, miyo okisivela okathi ula! Ankhi nyuwo? Vano, Muluku ookhalana mukhuneelo olelo wira osukiweke. Munnaamini yeeyo? Mukhuneelo omphwanyaneya vayi? Mmurimani mwa mutthu. Okenle vayi mmurimani mwa mutthu? Nihiku na Pentekosite okathi Erooho Yoowaarya (okhanle Muluku) jaarwiiyaaya mmurimani mwa mutthu. Eyo ekeekhai? Vano, nrowe nilepe ela va, ni mukhale oolikana wira mukwerethe mwaathuna vale. Pentekosite, P-e-n-t, kinoohela Pentekosite. Ola mukhuneelo, Erooho Yoowaarya. Ohela muhina mu . . . Moosuwela, wira nikhalihe yoophwanelelaxa, nrowe nihele muhina mu "Epompa" yeeyo enihimya . . . mwaapalame, moone. Vaareera, esukaka mukhuneelo, vano Muluku ookhalana makwarta a mukhuneelo olelo? Vano eyo . . . Vano, nwehe moota ekwerethiwaaya vooreera.

<sup>324</sup> Miyo kaahikilaathi nihiku nlo khoona ela, nto kaahalela otupha ni otthimakasa orukurerya orukurerya ni orukurerya ekhatera, kiiraka, "Ovuwa! Ovuwa! Ovuwa! Ovuwa! Ovuwa," kirukureryaka, kirukureryaka. Charlie, miyo kinimwiira vootepa ovikana siniir'aka mutakhwani imaara sikina. Munna Nellie muthiyana, kiiraleru siiso, mwaamukoomola owannyu naanaanoru. Huh? Oh, miyo kaahiviriha okathi woovuwa. Vano, nwehe yaari exeeni, etthu Apwiya yiirale-aya.

<sup>325</sup> Vano, Pentekosite, numala Pentekosite, aahilepa Eliivuru emosa ya (Exeeni?) Miteko sa Erooho Yoowaarya, M-i-t-e-k-o. Eyo ekeekhai? Miteko simpacerya ni xeeni, etthu yoopacerya yo ovolowa-no moowoopowani? Miteko 2:38. Va eri ele yookiserya, emaara ekina. Eyo ekeekhai? "Othene aya yaari oosareya Erooho Yoowaarya nto khupacerya olavula ilavulelo sikina. Nto Petru khuyenya khulaleerya mutthaka. Awo khwira, 'Niireke exeeni? Ninrowa okela sayi mwa yeeyo?' Owo khwira, Miteko 2:38, 'Murukunuxe murima, mpatisiwe khula mmosa a nyuwo, Nsina na Yesu Kristu.'"

326 Vano, muupuwele, Muluku ookhalana makwarta kamosa-kamosa a yoowo—a mukhuneelo yoowo. Exeeni mukhuneelo owo awo ansukaaya? Vaareera. M-a-t-e, Matewu, epantte ya onikhuma nsuwa; Luka, Luka; Marku; ni Yohani. Ihapari sooreera saya sothene sinlipiherya Eliivuru ya Miteko enrwa, awo annisuka eyo khula nipuro muntthunaanyu oweha.

327 Nrowe nikuxe emosa paahi, emosa paahi, khanirina okathi. Kookhalana miloko miili wala soovikana silempwe va, masi nrowe nikuxe emosa paahi wa mwah'ola wa woopowa. Ninoorowa okhalana okathi wo ovekela? Nnari, ewoora emosa, vano miyo kinoana wira khaninrowa okhalana voohikhala wira nyuwo othene munootthuna waavekelela aretta. Vano, miyo kookhalana . . . Miyo kookhalana okathi munci-ene paahi. Munnona? Vaareera.

328 Vano, nwehe ela! Matewu, Marku, Luka, ni Yohani, exeeni iyo? Nummeru na elapo ya vathi, na Ihapari sooreera, xexe. Vaareera, nwehe.

329 Vano, Matewu 28:19. 28, vano, ti vaavo nyuwo axinna a oraaru munrowaanyu, vaavo, 28:19. Vaareera. Matewu, epantte yookiserya ya ekapiitulu, ohimmye wira, “Vano murowe, mwawiixuttihe atthu a maloko othene, mwaapatisaka mwa Nsina n'Atithi, Mwaana, Erooho Yoowaarya”; masi va onoorwa Pentekosite, nto Petru khwira “Murukunuxe murima, mpatisiwe mwa Nsina na Yesu.”

330 Yookhala etthu evonyeiye vo. “Matewu, nyuwo mwa kwarta ole a mukhora wa epantte onikhuma nsuwa?”

331 Mukhora ori sayi? Mukhora ene exeenii? Yesu. Yesu ohimmye wira, “Mukhora ti woophunyeya.” Eyo ekeekhai? Onlempwa . . . Onlempwa sayi, w-o-o-p-h-u-n-y-e-y-a ahiiso w-o-o-p-h-u-r-e-y-a? *W-o-o-p-h-u-n-y-e-y-a* enihimya “maasi,” “maasi ti mukhora.” Munkela sayi? “Murukunxe murima, khula mmosa a nyuwo mpatisiwe mwa Nsina na Yesu Kristu,” ennithukula mikhora. Eh! Whish!

332 “Oh, masi, Munna Branham, nyuwo muhaana Matewu 28:19 vo.” Eyo ekeekhai voolikana. “Masi, Matewu, nyuwo mwa kwarta a yeeyo?”

“Vekeekhai, miyo ki kwarta oomalela.”

333 Vano mmukuxe Matewu 1:18 moone etthu enihimyaawe, moone vakhala wira onnisuka—onnisuka yeela. Moone vakhala wira Matewu 1:8 onimusuka Matewu 1 . . . 28 ni Miteko 2:38. Moone vakhala wira onnimusuka!

*Oyariwa wa Yesu Kristu wiireiye so: . . .*

“Va ori Muluku Tithi, Muluku Mwaana, Muluku Erooho Yoowaarya,” awo aneereryaaya ohimya.

*. . . oyariwa wa Yesu Kristu wiireiye so: Okathi. . .  
amej'awe Maria yaahaakameliwa ni Yosefe, awo*

ehinatthi *okhala vamosa, owo aahiphwanyiswa orupanle ni owerya wa Erooho Yoowaarya.*

Aanixa? Eyo ennaakhaliha oowanli okhala Mmosa!

Nto *iya . . . sothene . . . siireiye, wira . . . Ni vano . . .*

Vano Yosefe *iyawe, aari mutthu a exariya, . . . ahithhunaka omulaleya, aahuupuwela omuhiya mwa enamuna ela.*

*. . . vano, nlaikha n'Apwiya, nikhuruwaka, naahimukhumelela (Moosuwela.) nto khwira, Yosefe, nyuwo mwaana a Davidi, muhoovelele omwaakhela Maria okhala mwaar'inyu: maana ole orupaliwe mwa yoowo onrwa mwa Erooho Yoowaarya. (Munnona?)*

Vano owo *onoomuyara mwaana, . . . onrowa wiihaniwa nsina nawe YESU: . . .*

Eyo *yaari . . . sothene . . . siireiye, wira simaliheriwe . . . ni profeta, . . .*

Yeeyo, *mwali harus*i onoorupala . . . (Yesaya 9:6) . . . *mwali harus*i onoorupala, *ni . . . onoomuyara mwaana, nto owo onoomwihana nsina nawe . . . [Muthukumano onira, "Emanuweli."—Mol.]*

334 Owo onnisuka? "Tithi, Mwaana, ni Erooho Yoowaarya," Tithi, Mwaana, ni Erooho Yoowaarya, ela paahi: ititiulu wa Nsina nenlo nimos. Vano kwarta oneemela vaavale olipiherye. Munniiwa saana? Oh, wulu! Vano, akavi ansuwela yeeyo? Ela eri va! Owo ti kwarta.

335 Vano, nrowe paahi . . . Kookhalana nikuttha nothene na sikina sa woopoliwa, mukuxe iya sikina. Masi vakhala wira ninrowa okhalana eliinya ya mavekelo muhina mwa minuutu mmosa paahi, mwa minuutu soophiyaka muloko paahi nrowe neehererye etthu ekina va minuutu mmosa paahi. Nrowe nikuxe Soolempwa kamosa-kamosa vano. Kilempe vayi yeela? Iya va. Vaareera.

336 Vano nrowe nikuxe noone sinto Matewu osulu nno vano onoosukerya ovoniha wa Muluku. Mookuxa ilaapi sanyu n'itthu vano, wira mulepe yeela? Vaareera. Moone sinto Matewu onnikawanya . . . onoosuka. Nrowe nimukuxe Matewu 10:1.

337 Nrowe nikuxe noone sinto Yohani . . . mmosa paahi wala aili, nrowe naakuxe aili, wala mmosa wala aili wa iye akhanle ala, Yohani 14:12, ni 15:7.

338 Noone sinto awo annisuka ovoniha wa Muluku erukurenrye Ehice ya Muluku! Marku 16, Marku 11:21 ni 22.

Luka 10:1 mpakha 12, ni Luka 11:29 mpakha 31. Nrowe naatthare amosa-amosa a yaawo, noone vakhala wira annisuka ehaakhi wa ovoniha wa Muluku siiso ntoko awo ansukaaya

mukhora wa opatiiso mwa Nsina na Yesu. Ninoowerya owehatho mwa khula mmosa a yaawo. Ti yeeyo.

339 Vano nrowe nitthikele ottuli paahi nimoone Matewu 10:1. Nitthikele ottuli paahi vano wira hiyo... vano nto ninoorowa omaliha muhina mwa minuutu sikina soophiyaka mithanu paahi, minuutu muloko, omalela waatta, Apwiya yatthuna vale. Vaareera, nrowe nimukuxe Matewu 10, noone sinto Matewu onnisuka Miteko s'arummwa.

340 Muupuwela wira—wira Muluku khonimuhela kwarta wa Masu Awe? Moone vakhala wira enyompe ele, kharamu, mutthu, xawawe nlelo khakhalanse vamikhora iye elapo ya vathi va naanaano va? Va siri Ihapari sooreera, Ihapari sooreera xexe. Munnona? Nto, nwehe, khula epantte awo yaarowaaya yaarowa ewehaka ohoolo. Awo khanvirikanyana mmosa ni mukhwaawe, awo ankkalasa mmosa ni mukhwaawe. Munnona? Mmosa onrowa ni owaraala wa mutthu; mukina onrowa ni waakuva wa xawawe; mukina ti mukukhula... Mmosa ti namalaleya, wira avave ntoko namalaleya, moone; mukina ti mukukhula; mukina t'okhomaala; mukina t'owaraala. Moone, yoosukiwa ipantte sothene, Muluku asukaka Ehapari yooreera ela ya Erooho Yoowaarya! Mwaamini Yeeyo, munna! Vaareera.

341 Vano nrowe nimukuxe Matewu 10:1.

*Vano vaawiihanne-awe awiixutti awe muloko nanli,  
owo aahaavaha owerya... (Hmm!)*

Yaathukumanne empa y'osulu,  
Othene evekelaka mwa Nsina Nawe,  
Yaahipatisiwa ni Erooho Yoowaarya,  
Ni owerya wo ovara muteko waahirwa;  
Etthu Owo aawiireny'awe nihiku nle  
Owo onoowiirelani,  
Kinnitthapa ohimiyaka wira ka mmosa a  
yaawo.

342 Oh, mummaalihe mwaana minuutu mmosa paahi vano. Nwiriyaane paahi, nwiriyaane oratta-ene:

*...nto aahaavaha owerya wo woomola irooho  
sootakhala,...*

343 Amukukhula anci-ene paahi annihiya irooho sootakhala okhala mukereja mwawe memme; athiyana anniwara, wira, maira a iturufu, amusewe a cuuku, wiina, soolya sa soopa, khula... Oh, ikharari!

*...oxintta irooho sootakhala, wira yoomole, ni  
ovoniha iretta sothene sootakhala sothene.*

344 Munnimoona kwarta owo okilaanthe-ene vale vamukhora? Kwarta a Ehapari yooreera wira alipiherye eliivuru iyo ya Miteko elempwe!

<sup>345</sup> Vano, kaahimwiiwa muxuttihi mmosa woohikhala khalayi, iirale, e . . . e . . . mmosa mulopwana mmosa muulupale, mutthu ooreera murima, kaamusuwenlyaaka, khunvaha ntata, munna mmosa ooreera murima. Owo iirale, “Masi Miteko s’arummwa yaari ethhokiheryo ya Ekereja paahi.” Huh! Mwa moolumo makina, owo aarina ethhokiheryo ota *nno*, moone. Okathi, Miteko s’arummwa saaryaaya muhina, ni Ihapari sooreera iya itthokiheryo wira sikhalihe Eyo yo wiiraana ni ekhapelele Yeeyo. Munnoona moota mu—mu—muupuwelo wa mutthu onwery’aya wira etthu p’itthu. Miyo kaamuupuwela etthu emosaru yahaari mwaha wa Yoowo. Munnona?

<sup>346</sup> Ethhokiheryo, Pentekosite khaari ethhokiheryo ya Ehapari yooreera. Ihapari sooreera sooxeexe itthokiheryo wira simulipiherye Pentekosite! Vaamanlyaaya okhaliha ethhokiheryo ela, Pentekosite aahikhumelela. Eyo ekeekhaii? T’evi elempwe voopacerya, Eliivuru ya Miteko wala e—wala arummwa? Arummwa. Yesu aaneetta ovaraka miteko ni ohimya itthu saarowa orwa, nto Matewu, Marku, Luka, ni Yohani, makwarta awo maxexe yaahirwa khunalepa itthu sothene yoonaaaya sikhumelelaka, ehimyaaka siiso ntoko eryaaya, moota yaarowaaya okhumelela, moota yaarowaaya wiiraneya. Vano naanaanoru awo khurukurerya Eyo ni ethhokiheryo, nto wa Eyo yaanirwa! Amen! Matewu, Marku, Luka, ni Yohani, ti ethhokiheryo, wala muteko onkhapelela empa yuulupale y’olompa-mo, Ehice, Eparakha ya Pentekosite.

<sup>347</sup> Kahi muromolelo wa Pentekosite, munna mulopwana, muthiyana, awo arisa ottuli ota wa etthu yothene, uh-hum, ottaiwenexa ovikana khula ikereja sikina. Iyo siri ottaiwene ovikana saary’aya aLuteraano. aLuteraano yaahikhala ooloka vakhani waavikana awo, ni eyo ekeekhaii, oolattanaxa. Vekeekhai voolikana ene, Gene, okhala wira, vano, nkimoonale Yesu ota wa ekereja Luteraana, atthunaka ovolowa, masi atthunaka . . . okhala wira kinoona wira Owo khonakhaleke opacerya wene. Masi Owo—Owo aari mukereja Pentekosite nto khoomoleliwa ota. Ti yeeyo.

Vano, Matewu 10:1.

<sup>348</sup> Vano nirowe va mwa Yohani 14:12 noone vakhala—vakhala—vakhala wira Yohani onoorowa olipiherya ni osuka itthu sooreeraxa sa Pentekosite. Mwa Yohani, kapiitulu 14 eversiikulu 12, Yesu alavulaka:

*Vekeekhayi, vekeekhayi, kinooleelani wira, Ole onikaamini, miteko sinvar’aka nave-tho owo onoovara; ni miteko suulupalexa ovikana iya onoovara; okhala wira miyo kinrowa w’Atithi aka.*

<sup>349</sup> Oh, munna, mukhora ole iwe, weiwo xawawe aakilanthi-awe vaavale vale okhala wira owo ti muteko w’onomalaleya, moosuwela, avavaka ntoko xawawe. Eyaakuvelo, onoowela



olukamaka mutteth'ole w'eprofeta osulu iwe, moone, onniwerya woota itthu khalayi ene ni ohimya itthu saakhala, seiyo sinkhala, ni sintthuna orwa. Munnona? Okilante-ene vale osukaka, ohimye wira, "Miteko Miyo sinvar'aka!" Nkanweheni xawawe owo, moone.

350 Va ori kharamu, murumeyi. Yesu aahaavaha owerya. Vano Owo onnikhapelela, Owo onnikhapelela Miteko 2:38. Owo onnimulipiherya osulu iwe, kharamu ule.

351 Va enoorwa eyaakuvelo ele ya Ehapari yooreera, ni xawawe ola, airaka, "Miteko iya Miyo sinvaraaka nave-tho nyuwo munoovara. Soovikana iya nyuwo munoovara," nvaveke molumwenkuni mothene ni Yeeyo! Ntoko epompa waakumihiwe muru wa muxirikha aya, ni khuyeeheriwa, ephome, otatheliwa ephome vathi, ekhuwelaka, "Oowarya, oowaarya, oowarya, t'Apwiya," omureeriha namakuttula. Ayo.

352 Vano, kihaana mukina vale Yohani 15:7. Nrowe nikhunle nilukame kapiitulu 15, versiikulu 7:

*Nyuwo mwakhala mwa miyo, vano, nave masu aka . . . (kahi masu a oseminaariyu) . . . masu aka yakhala mwa nyuwo, nvekeleke etthu p'itthu nyuwo munthunaanyu, nto munimwiireliwa.*

353 Eyo ekeekhahi? Vano Ehapari yooreera eyo yoosukiwa vaava va. Eparakha ela ya Pentekosite ensukiwa ni Yohani ni Ehapari awe; Ensukiwa ni Matewu, Ehapari awe.

354 Vano, nirowele Ehapari yooreera ekina, Marku, kapiitulu 16, noone sinto Marku aanisuka Eparakha yeela ya Pentekosite. Marku, kapiitulu 16. Vano, nrowe nipacerye va ntoko . . . numala . . . enlavula mwaha w'ohihimuwa. Vano, nrowe nitthikele mpakha nipiye ntoko e—eversiiikulu 14 ya Marku 16:

*Numala aahiisooniherya w'ale muloko ni mmosa okathi waalyaaya, nto aahaapwapwela mwaha wo ohaamanini waya ni olipa murima, okhala wira khiyaakupanli ale yaamonne ahihimunwe.*

355 Awo khiyaawaaminni ale yaaphavela waaleela mutthaka. Moone, eyo p'inamuna ery'aya olelo. Atthu yirina onamoonna wa Erooho Yoowaarya; atthu yiirale, "Ethiru, awo nikhuru na masantu oophirikeya." Nto Owo aahaapwapwela mwaha wo olipa waya murima, moone, ni ohaamini waya; yaamusuwenlyaya Owo moohihimuwani Mwawe.

*Vano owo aahaahimeerya wira, Murowe mulaponi mothene, mwalaleerye ehapari yooreera soopattuxiwa sothene.*

356 Exeeni? Olaleya e . . . ela . . . eri Ehapari yooreera emosa paahi; makwarta maxexe. "Mwalaleerye Ehapari yooreera ela soopattuxiwa sothene!" Vano, muupuwele, Owo onkuxa mwa soopiili, makwarta othene maxexe (Matewu, Marku, Luka, ni

Yohani), moone, “Mwalaleerye Ehapari yooreera soopattuxiwa sothene!”

*Ole onrowa waamini khupatisiwa onimooopowa; nto ole ohinrowa waamini onoolamuliwa.* (Moone, nyuwo muhaana okela moopatiisuni va.)

*Ole onrowa waamini khupatisiwa onimooopowa;... ole ohinrowa waamini onoolamuliwa.* (Oh, munna, mwaamini, xontte!)

*Nto... (Elupanyeryo, wira elupanye moolumo makina vamosa.)...Nto ithoonyeryo iya sinimwaatthara ale anrowa waamini;...*

<sup>357</sup> Ahe, vano, nrowe noone, aMetotista anihimya exeeni? “Nyuwo mwaweryaru okhuwela, okhala makhalelo ooreera.” Apatista anihimya wira, “Mwaamini paahi ni mpatisiwe.” Episkopaale anihimya wira, “Mweemele ntoko Episkopaale, siiso, ni muurameke okathi oniipiwaaya.” aKatolika anihimya wira, “Mmuhimye ‘Mutteeliwe, Maria.’” aPentekosite aniira, “Mwiitakanxe muromolelo ahu. Mpatisiwe mwa Nsina na ‘Tithi, Mwaana, ni Erooho Yoowaarya.’” Eyo eri vo. Munnona?

*...ithoonyeryo iya sinimwaatthara ale anrowa waamini; Mwa nsina naka... (Hmm. Nnari “Tithi, Mwaana, Erooho Yoowaarya” ehimyaka yeeyo.)... Mwa nsina naka awo anoowoomola axetwani; anoolavula ilavulelo isya;*

*Anoovara inowa;...yawurya etthu eniiva, kkenaakumelela etthu yootakhala; anoowiixaatherya matata aya aretta, awo anoopenuwa.* (Amen! Oh, munna!)

<sup>358</sup> Vano mutthikele 11, vano nto nihanle olikana wira nimalihe. Matewu 11, ni kihaana 20 ni 21, Yesu alavulaka. Othene ala ti Yesu alavulaka, vano, khaavo hata mmosa a yaawo ohikhanle-awe Yesu onlavula, khula mmosa.

*Nto mmeeloni mwaya, okathi awo...yaattamelaka oPetaniya, owo aahivoliwa etala:*

*Nto aahoona mwiri wa efiku... .*

<sup>359</sup> Owo p’ukathi Owo aatakhalinhe-awe mwiri (owo ti Matewu 21). Miyo kihaana...: 12, xontte mukilevelele. Marku 11:21 ni 22:

*Petru aahuupuwela nto aahimuleela, Mwiixuttihi, moone, mwiri wa efiku mutakhalinhaanyu mphironi... .*

*Vano Yesu aahaakhula khimuhimeerya wira, Mmwaamini Muluku.* (Munnona?)

*Tthiri vekeekhayi kinooleelani wira, (vano, eri muhina)...kinooleelani wira, Ole onrowa wiirela*

*mwaak'ola, Muthaame-vo, mwairehele mphareya; ohihoveyaka mmurimani mwawe, masi...aaminiki wira itthu iyo onihimyaawe sinimwiiraneya; owo onoowerya okhalana...owo onookhalana sothene onihimyaawe.*

<sup>360</sup> Mmiravo, mukhora w'okuusini onsukiwa ni enyompe. Mukhora wa onkela epheyo onsukiwa ni kharamu, mukhora wa onkela epheyo...Kintthuna ohimya mukhora wa onikhuma nsuwa. Nto mukhora wa onkela epheyo onsukiwa ni xawawe onvava, Yohani, namalaleya. Vano meetiku epantt'ila nno, Luka, mutthu.

<sup>361</sup> Vano, nrowe noone etthu Luka enihimya'awe. Mmukuxe Luka, ekapiitulu 1-...Kookupali wira nookhalana Luka 10:1 mpakha 12, iwo o—iwo orummwa. Nyuwo othene moosuwela exeeni iyo, masi...Luka, ekapiitulu 10, nto 1 mpakha 12. Vaareera, naamuwerya okelela ohoolo ni osoma yothene eyo, masi khaninrowa okhalana okathi wo wira yeeyo. "Murowaseke..." Kinrowa opacerya eversiikulu 3:

*Murowaseke: nto, nwehe wira kinoorumani ntoko ipwittipwitthi eriyari ya müici.*

*Muhikuxe murupa, hata esaakho,...*

<sup>362</sup> Moone, "Muhirowe mwa nsina na muromolelo khata. Murowe ntoko Miyo soorumme-akani. Munnona? Muhivolowe muroromelaka wira munoorowa ophwanya itoolare ikonto emiya mwaha wa muhakalaliho ola; vaahikhale, muhirowe. Munnona. Mutthokihe ikampaanya sanyu." Owo iirale, "Murowe weiwo Miyo onoorumaakani." Moone.

*Muhikuxe murupa, hata esaakho, nnakhala ixapattho:...muhimukohe ehaali hata mutthu mphironi.*

<sup>363</sup> "Muheemele ni wira, 'Miyo kinoorowa koone moota e... siniir'aya itthu iya...moota ala...' Muroweke paahi weiwo Miyo onoorumaakani. Muhimuxikhe hata mutthu mukina."

*Nto wa khula etthoko nyuwo envolowaanyu,... mwiire, Murettele okhale etthoko yeela.*

*...akhala weiwo mwaana a murettele, murettele anyu onoothika...onookhala ni yoowo: aahikhale, onimooohokolowelani-tho.*

*Nto okathi ene yoowo mukhaleke, etthoko yeeyo (kiireke) mukhaleke, mulyeeke nwuryeke itthu sinvahiwaanyu: (Vano, etthu ila yothene ya "ohikhuura enama, ni sikina." Wulu, Muluku aka! Munnona?) okhala wira namuteko onniphwanela oliviwa. Muhivireke etthoko ni etthoko.*

364 Orowa ni maJones olelo, woolyaani wa ohiyu, ni orowa ni a—anli akina mmeeloni mwaya, ni anli akina emaara ekina. “Mukhale vaavo vo!”

Ti siiso kaarowaka vamuthukumanoni, nyuwo moosuwela, xeeni enkhalel’aka wooteeli, n’ukhala weiwe, iwe vekeekhai ti nipuro omphwanyaka murettele. Munnona? Muhivireke etthoko ni etthoko!

*Ni khula muttethe onrowaanyu ophiya, weiwo atthu yawaakhelani, mulyeeki itthu seiyo sinvahiwaanyu:*

*Mwaavoniheke aretta—mwaavoniheke aretta ari weiwo, ni mvaalaleeryeke wira, Omwene wa ori... Muluku woophiya wa nyuwo.*

365 Masi vano, ahe, mukihiye kosome eversiikulu enttharehana:

*Masi khula muttethe nyuwo onrowaanyu ophiya, mwaahaakheliwe, mukhumele ota...wa muttethe mu...nihiku...nenlo,...*

*Hata ntthupi na mpooma, nipharenle mwa—mwa hiyo, hiyo... (Nrowe noone vano)... Hata n... Ni... Hata ntthupi na mpooma mwanyu, nenlo nipharenle mwa hiyo, ninootathelani nyuwo: nto musuweleke ela, wira omwene wa Muluku woophiya wa nyuwo.*

*Masi kinooleelani wira, nihiku noolamuliwa onookhala omoreliwa ikharari oSotoma, ovikana epooma eyo.*

366 Oh, munna, olipa xeeni wooreerihwa! Awo yaahoonene, yaahiwaakheleni, mukeleleke ohoolo, mwiire paahi, “Vaareera, mwaahikitthuneke, kinootatha ntthupi, ni muxapatthoni mwaka, ni kinorowa.” Mwa moolumo makina, mwiire, “Miyu nkinakuxeke hat’etthu; vakhala wira kihoolya etthu p’itthu, kinimoolivani yeeyo, nto muroweke.” Owo ohimnye wira, “Vekeekhayi...” Nto khula mmosa wa mittethe iyo awo yaarowanse-aya khuhaakheliwa, khula mmosa woosama ni khokhanle olelo. Ni khula muttethe—muttethe waawaakhenle, wookhala mpakha olelo. Eyo vo.

367 Vano, mukina-tho, vano nto nimalihaka. Nrowe noone, nookhalana 10. 11:29 mpakha 31, Luka 11:29 mpakha 31, nto ninrowa omaliha. Oh, miyo okisivela Yeela!

*Nto atthu vaathukumann’aya...*

368 Nrowe noone, kookhalana... Owo ti Luka, Luka 11:29? Ayo, kionoona wira ola onookhala yoowo. Ayo:

*Nto atthu vaathukumann’aya, owo khupacerya wira, Nla nloko nootakhala: nimphavela ethoonyero; nto khenrowa...okhala...hata ethoonyeryo... yovahiwa, ehikhanle ethoonyero ya profeta Yona.*

*Tthiri siiso Yona saakhanle-awe ethoonyeryo ya oNiinive, vano...siiso-tho Mwaana a mutthu onookhala ethoonyeryo wa nloko nla.*

*Pwiyamwene a okuusini onoovenya... woolamuliwani ni...ni atthu a nloko nla, ni onimwaaphuka: okathi owo okhumme-awe wookiseryani wa elapo arwaaka wiiwa miruku sa Salomoni; vano, vaava, ookhala-vo muulupale oonvikana Salomoni.*

*Atthu a oNiinive anoovenya woolamuliwani ni atthu a nloko nla, ni...animwaaphuka: okhala wira awo yaahittharuwa ni olaleya wa Yona; vano, vaava, ookhala-vo muulupale oonvikana Yona.*

369 Exeeni miyo enihimyaaka vano? Kimalihaka, kihaana ohiya ekina aya ovira. Masi, kimalihaka, kintthuna kihimye ela okhala wira nkireere woopisihani. Exeeni Owo onihimyaawe va? “Ninoophiya nihiku nimosa atthu ootakhala ni nloko, nooraruwa,” (Vano muupuwele!) “anrowaaya ophavela ethoonyeryo. Nto nla nloko nootakhala ni nooraruwa.” Ni Owo ohimye wira, “Nloko nenlo nnimwaakhela ethoonyeryo.” Nwehe moota enlikanaaya ni Bibilia othene, ethoonyeryo ya Yona. “Yona aari mmirimani mwa nankumi mahiku mararu othana ni ohiyu; siiso Mwaana a mutthu ohaana okhala mmirimani mwa—mwa etthaya mahiku mararu othana n’uhiyu.” Enrowa okhala exeeni? Ethoonyeryo ya ohihimuwa. Munnona? Ethoonyeryo ya ohihimuwa enoopakiwa varyari va nloko nootakhala ni nooraruwa, ni enoopakiwa Muliivuruni mwa Miteko. Yesu oohihimuwa mw’alipa-ookhwa, khukela mwa Petru, Yakopo, ni Yohani, n’arummwa, vano awo khupaka Eliivuru ila ya Miteko (khisaari miteko s’arummwa), saari miteko sa Erooho Yoowaarya evaraka muteko *mwa* arummwa.

370 Kahi mutthu olelo; ti Erooho Yoowaarya envara muteko mwa mutthu, wala atthu, moone, moone, envara muteko ene. Kahi mutthu; mutthu mwaapu paahi, moone, masi Erooho Yoowaarya ti Makhura ari mmwaapuni mmo. Munnona?

371 Nto nkawehani etthu awo yiiraly’aya, nwehe ithoonyeryo awo yiir’aya sa Yesu. Awo yaahaana waasuwela okhala wira...Awo—awo yaari oohisuwela etthu, oohisoma, Petru ni Yohani. Masi awo yaahaana waasuwela, awo yaahikhalasa ni Yesu! Awo yaahiira itthu Owo iiraly’awe. Tivo, moone, khula Eliivuru mBibiliani, khula...Iliivuru xexe, Ihapari sooreera xexe sinsuka Eparakha ya Pentekosite ni khula Yoolempwa wira elipiherye oratta-ene etthu awo ahimanse-aya. Nto vano Miteko s’arummwa sinnilipiherya olelo ni Ihapari sooreera xexe wira Yesu Kristu mmosaru nsana, olelo, ni mahiku othene. Nyuwo munnimphenta Yoowo?

Yaahitthukumana emp'ele y'osulu,  
 Othene evekelaka mwa Nsina Nawe,  
 Yaahipatisiwa ni Erooho Yoowaarya,  
 Ni owerya wo ovara muteko waahirwa;  
 Etthu Owo aawiireny'awe nihiku nle  
 Owo onoowiirelani,  
 Kinnitthapa ohimyaka wira ka mmosa a  
 yaawo.

372 Mukihiye kiipe nenlo:

Yaathukumanne empa y'osulu,  
 Othene evekelaka mwa Nsina Nawe,  
 Yaahipatisiwa ni Erooho Yoowaarya,  
 Ni owerya wo ovara muteko waahirwa; (Ti yeyo  
 hiyo entthunaahu olelo.)  
 Etthu Owo aawiireny'awe nihiku nle  
 Owo onoowiirelani,  
 Kinnitthapa ohimyaka wira ka mmosa a  
 yaawo.

Atthu ala hata ehikhalaka atthu oosoma,  
 (Kahi...Siiso ntoko Petru, Yakopo, ni  
 Yohani.)  
 Wala wihimya osuweliwa mulaponi  
 Othene yaahimwaakhela Pentekosite aya,  
 Oopatisiwa ni Nsina na Yesu;  
 Ni anoohimya vano, ottaiwene ni mapuro  
 othene,  
 Owerya wawe nlelo omosaru, (Omosaru siiso  
 ntoko waary'aya.)  
 Kinnitthapa ohimyaka wira ka mmosa a  
 yaawo.

Miyo ka mmosa a yaawo, ka mmosa a yaawo,  
 Kinnitthapa ohimyaka wira ka mmosa a  
 yaawo;  
 Mmosa a yaawo, ka mmosa a yaawo,  
 Oh, kinnitthapa ohimyaka wira ka mmosa a  
 yaawo.

Oh, murwe, axinn'aka, mphavele eparakha  
 yeela  
 Enrowa orapiha murim'anyu wa etampi,  
 Enrowa opacerya orumiha ittiwi soohakalaliha  
 Ni okhaliha munep'anyu ovihiwaka;  
 Oh, eyo enooviha vano mmurimani mwaka,  
 Oh, nivuwihwiwe Nsina Nawe,  
 Kinnitthapa ohimyaka wira ka mmosa a  
 yaawo.

Mmosa a yaawo, mmosa a yaawo,  
 Kinnitthapa ohimyaka wira ka mmosa a  
 yaawo; (Aleluya!)  
 Mmosa a yaawo, ka mmosa a yaawo,  
 Kinnitthapa ohimyaka wira ka mmosa a  
 yaawo.

373 [Nipuro vahiitthu mufiitani—Mol.] Eyo enniwoototha anci-ene w'atthu awo. Ari... Atthu anci-ene ota nno mphironi anrowa okereja, aniira mpannta wa ikereja, t'owootothiwa ntoko Hawa saaryaawe wopaceryani. Awo khansuwela hata evirikanelo.

374 Oh, murwe mukuxe Mwiri w'Ekumi! Vano, waahiya Makerupi... Vano, kintthuna kihimye etthu. Waahiya Makerupi ale esukaka Ehice ela, awo ari ota nno ephavelaka, etthunaka waaruuha atthu, waaroiha Veehicieni, ephavelaka waaruuha yaavirihaka vamukhora, otthikela Mwiri w'Ekumi emara ekina wira ewerye waakhela Ela. Yesu ohimye wira, "Miyo ka Yoolya y'Ekumi kikhumme wa Muluku a Wirimu. Ole onlya Erutthu Aka ni onwurya Ephome Aka ookhalana Ekumi Ehinimala ni Miyo kinoomuhimuxa nihiku nookiserya." Eyo ekeekhaii. Oh, kinnitteeliwa murima vanci-ene!

375 Aretta akavi ari musaala? Nrowe noone matat'anyu, nvenxe matata. Vaareera. Akavi arina... Eyo ti... Ko—koomwiiwa Billy? Ori vayi? Owo ookawa ittikitti sa mavekelo? Moo...? [Nipuro vahiitthu mufiitani—Mol.] Vaareera, t'ani orina... [Nipuro vahiitthu mufiitani.]

376 Vano, nwehe epantt'ila, nyuwo othene. Vano, eyo vekeekhai ti siiso ntoko okathi enrwa'aya vathi va Ovuwa va, moone. Munnona? Munnona? Eyo enoorwa... Owo Waarya nno. Nyuwo muneetta va, moone. Vano, nwehe, iwo paahi—iwo woonihereya paahi, woonihereya paahi, iwo, moone. Kuhiyo Waarya. Va ori Waarya wiithomeiye-ene vaava va, moone, vaava va vamuthiyan'ola. Kirimwiira oovara paahi nto kuupuwela wira Owo waari vasulu va mutthu.

377 Vano, nyuwo munoona mmosa nto miyo kinoona miili. Mmosa aya ti wa erutthu, nto mukina Aya ti wa Erimu. Ookhala mulopwana mmosa okilaanthe ota iwe, eliinya ela owehaka Waarya iwe. Owo orommana. Owo t'a oSeymour, Indiana, ni orina... aarina oyeeheya ephome moottooproni. Mwaaminiru, mulopwana, Muluku onimoovonihani oyeeheya iwo. Amen! Mwaamini vano!

378 Munnaamini ni murim'anyu wothene? Vano Apwiya Muluku, mpattuxa wirimu ni vathi, yakitthuniheryaru wira etthu yo owooniheeryani wira owo Mulukuu, nto munimwaamini ni murim'anyu wothene? Yawinyu—eretta anyu ti mukhalelo wo onanariwa onitannyeya mwaha wa o—o—ohiya okela

mmweerini. Munnaamini wira Muluku onimoovonihani? Nyuwo khamuhiyo a wenzo nave.

<sup>379</sup> [Nipuro vahiitthu mufiitani—Mol.] . . . mulattu anyu xeeni? Ni, mwiiraka siiso, wira Owo aamoovonihani? [Nipuro vahiitthu mufiitani.] . . . aamuwerya wookhalihani mukumi, okhala wira khamuhiyo nyuwo muntthuna okhalihwa mukumi, ti mwan'inyu mulopwana. Munnona? Owo ori oVirginia. Munnaamini wira kinoowerya wooleelani etthu evonyeiye ni yoowo, ni mukhaliheryo wa Muluku? Owo orina makhwatta a murupela. Ti yeeyo. Ni yookhala etthu ekina evonyeiye ni uwo, owo khooponwe. Nto nyuwo munoonvekelela. Vano, Muhano Baker, mutthikele oSomerset ni mwaamini ni murim'anyu wothene, Yesu Kristu onoonvoniha. [Nipuro vahiitthu mufiitani.] . . . ? . . . woovonihani, nyuwo munoomukupali Owo okhala Mpenuxa anyu? Vaakhanle wira mwaaniwerya . . . [Nipuro vahiitthu mufiitani.] . . . mpenuxa. Paulo aahihimya emaara emosa . . . [Nipuro vahiitthu mufiitani.]

<sup>380</sup> Muthukuman'ola w'atthu owiriyanne oratta-ene mpakha va mwa nihiku, Pwiya, vano, Pwiya Muluku, kinvekela wira omoriwa Wanyu ikharari ni oreera murima okhale mwa yaawo.

<sup>381</sup> Satana, miyo kinnootharimulani mwa Nsina na Yesu Kristu, mukhume mw'atthu ala! Awo aakhala yiiwaka Ehapari yooreera. Khamunwerya-tho waavarelela. Ikuru sa xetwani saatthukale atthu ala, sikhume!





*WIISUUPULULA, EKAPIITULU YANEEXEXE MPANTTE III* EMK61-0108  
(Revelation, Chapter Four Part III)

ETTHARANELO YA WIISUUPULULA WA YESU KRISTU

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku voosiisu, mahiku yeettaka 8 mweeri wa Janeiro, 1961, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)